

淵峯奕函

第四函
七冊

淵鑑類函卷三百五

人部六十四 言志

言志五 下

原賦後漢馮衍顯志賦曰馮子以爲大人之德不碌碌如玉硤硤如石風興雲蒸一龍一蛇合道翱翔與時變化夫豈守一節哉上隴阪騰高岡遊精宇宙流目八紘眇然有思凌雲之意乃作賦自廣命篇曰顯志云開歲發春百卉含英甲子之朝兮汨吾西征發軔新豐兮徘徊鎬京凌飛廉而太息登平陽而懷傷悲世俗之險阨哀好惡之無常棄衡石而意量兮隨風波而飛揚陟九

峻而臨截，薛聽涇渭之波聲，歲忽忽而日邁兮，壽冉冉而不與恥功業之無成兮。赴原野而窮處，陟隴山以逾望，眇然覽於八荒，風波飄其並興兮，情惆悵而增傷。覽天地之幽奧兮，統萬物之維綱，究陰陽之變化兮，昭五德之精光。高吾冠之岌岌兮，長吾珮之洋洋，飲六醴之清液兮，食五芝之茂英。嘉孔丘之知命兮，大老聃之貴真。德與道其孰寶兮，名與身其孰親。班固幽通賦曰：系高項之遠胄兮，氏中葉之炳靈。颯凱風而蟬蛻兮，雄朔野以鵬聲。皇十紀而鴻漸兮，有羽儀於上京。魂煢煢與神交兮，精誠發於宵寐。夢登山而迴眺兮，覲幽人之

髣髴惟天地之無窮兮鮮民生之晦在紛屯邐與蹇連
兮何艱多而智寡昔衛叔之御昆兮昆爲寇而喪予管
彎弧欲斃讐兮讐作后而成已變化故而相詭兮孰云
豫其終始雍造怨而先賞兮丁繇惠而被戮粟取弔於
由吉兮王膺慶於所感叛迴宄其若茲兮北叟頗識其
倚伏宣曹興敗於下夢兮魯衛名謚於銘謠妣聆呱而
劾石兮許相理而鞠條道混成而自然兮術同源而分
流所貴聖人之至論兮順天性而斷誼物有欲而不居
兮亦有惡而不避三仁殊而一致兮夷惠異而齊聲木
偃息以藩魏兮申重繭以存荆紀焚躬以衛上兮皓頤

志而弗傾俟草木之區別兮苟能實其必榮要歿世而
不朽乃先民之所程觀天網之絃覆兮實斐謔而相訓
謨先聖之大猷兮亦鄰德而助信虞韶美而儀鳳兮孔
忘味於千載素文信而底鱗兮漢賓祚於異代 魏曹
植元暢賦曰夫富者非財也貴者非寶也或有輕爵祿
而重榮聲者或有反性命以殉功名者是以孔老異旨
楊墨殊義聊作斯賦名曰元暢夫何希世之大人罄天
壤而作皇該仁聖之上義據神位以統方補五帝之漏
日綴三代之維綱僥余生之倖祿遘九二之嘉祥上同
契於稷卨降合穎於伊望思薦寶以繼佩怨和璞之始

鐫思黃鍾以協律怨伶夔之不存考所圖之莫合帳蘊
結而延佇志鵬舉以補天蹶青雲而奮羽舍余駟而改
駕任中才之展御望前軌而致策顧後乘而安驅匪逞
邁之短脩取全真而保素弘道德而爲宇築無怨以作
藩播慈惠以爲圃耕柔順以爲田不媿景而慙魄信樂
天之何欲逸千載而流聲超遺黎而度俗 又幽思賦
曰倚高臺之曲岵處幽僻之閒深望翔雲之悠悠羌朝
霽而夕陰顧秋華之零落感歲暮而傷心觀躍魚於南
沼聆鳴鶴於北林搦素筆而慷慨揚大雅之哀吟仰清
風以歎息寄予思於悲弦信有心而在遠重登高以臨

川何余心之煩錯寧翰墨之能傳

劉楨遂志賦曰幸

遇明后因志東傾披此豐草乃命小生生之小矣何茲
云當牧馬於路役車低昂愴恨惻切我獨西行去巖溪
之鴻洞觀日月於朝陽釋又棘之餘刺踐檀林之柔芳
皦玉祭以懼目榮日華以舒光信此山之多靈何神分
之煌煌聊且遊觀周歷高岑仰攀高枝側身遺陰磷磷
礚礚以廣其心伊天皇之樹葉必結根於仁方梢吳夷
於東隅掣叛臣乎南荆戢干戈於內庫我馬繫而不行
揚洪恩於無涯聽頌聲之洋洋四寓漠以無爲元道穆
以普將翼雋又於上列退仄陋於下場襲初服之蕪葳

託蓬蘆以遊翔豈放言而云爾乃旦夕之可忘丁儀
厲志賦曰覽前志而博觀求余心之所安雖疲駕而才
弱敢舍力而不攀懿躬稼之克在賤善射而隕殘羨首
陽之遺譽憎千駟之餘訕宗舍藏之偉節薄鼎角之自
干嘉法言之令揚悼說難之喪韓鑒登險之敗績顧清
道以自閔瞻亢龍而懼進退廣志於伐檀雖德厚而祚
卑猶不忘於盤桓薰以芬香而自燒兔亦取斃於豪翰
援大雅以爲戒眺龔勝而自歎嗟世俗之參差將未審
乎好惡咸隨情而與議固真僞以紛錯穢杯盃之周用
令瑚璉以抗閣恨騾驢之進庭屏騏驥於溝壑疾青蠅

之染白悲小弁之靡託惡晨婦之蒙厚痛三代之見薄
惟受性之樸拙亮未達乎測度顧鍾子之既没牙輟弦
而不作敦三思之彌憤動循牆之茲恪勉夕改以補朝
履日新而悔昨 韋誕敘志賦曰絜鴻烈之末流蒙祖
考之餘德奉過庭之明訓納微躬於軌則勉四民之耕
耘遂能辨乎菽麥自弱冠而立朝無匡時之異才每寤
寐以歎息思損已而降階遭大魏之革命罔羣士於行
職雖固陋之無用猶收錄而序飾歷文武於機衡擁大
璫於帝側隨倫儕以按牒乃剖符而封殖顧儀服而增
憤心夕惕以愧惡蒙聖皇之宏恩過待罪於卿士奉朝

請於朔望恭禋享於郊祀念余年之冉冉忽一過其如
馳微竒功以佐時徒曠官其何為匪遜讓之足殉信神
氣之稍衰將訴誠於明后乞骸骨而告歸晉夏侯惇
懷思賦曰何天地之悠長悼人生之短淺思縱慾以求
歡苟抑沈以避免嗟聖王之制作所以貴夫善善信循
道以從法何世路之屯蹇始潔操以迄今每適道而靡
違思典言以攝事弗履過而循非恒戰戰以矜慄杜穢
釁而防微斂規節以踐迹冀天鑒之佑誠勤恭肅以端
厲常苦心而勞形桑榆奄其薄沒旣白首而無成世務
多故吾固甘夫無為名不足以爲尚空勞穢以自卑永

無事以安神故幸及之無知 棗據表志賦曰據忝職

門下在帷幄之末與羣士敘齊登玉階侍日月久矣出

為冀州刺史犬馬戀主既有微情且志之所存不能無

言因而賦之曰過承嘉惠擢身泰晨俯躡丹墀仰承三

辰當樂夏之凱南蒙朱陽之和仁接鳴鸞之垂翼因神

蚪之光鱗浮眇末之纖質濟吾身於天津邈盧敖之所

涉捐多士之遺塵登九垓之虛軌覲汗漫之威神情飄

灑而凌雲意髣髴於真人扶搖薄於懸圃增城鬱以嗟

峨被羽衣之飛飛握若蕙之芳華蹈糾紛之絕軌攀大

椿之疎柯意翹翹而慕遠思濯髮於天波悲落葉之思

條情戀戀於昊蒼懷聖德之弘施情燥切而內傷感有
莘之媵臣願致主於陶唐 潘尼懷恨賦曰伊疇昔之
懷憤思天飛以遠迹望循塗而投軌邈朔風以理翮冀
雲霧之可憑希天路之開闢何時願之多違奄就羈以
服役困吳坂之峻岨畏鹽車之嚴策嗟遊處之弗遇奚
鬱悒之難任背宇宙之寥廓羅網罟之重深當屏氣以
斂迹焉遊豫以娛心傳釋板以亮殷望投竿而相姬窮
獨善以全質達兼利以濟時聃安志於柱史由抗迹於
蒿箕理殊塗而同歸雖百慮其何思敢因虛以託談遂
逡巡而造辭 傅咸申懷賦曰何天施之弘普厠瓦礫

於瓊瑛備東宮之妙選奉儲君之聖明穆穆清禁濟濟
羣英鸞翔鳳集羽儀上京芬芳並發我穢其馨德音光
宣我累厥聲豈伊不愧顧影慙形雖自百於隕越懼恩
隆而命輕命既輕而才下諒無補於明時寒賢哲之顯
路而塵損之日滋匪耽榮而忘替實結戀之有違忍厚
顏於寮類甘獲戾而受譏不悟皇恩之彌崇授大梁平
近畿畿云近而防遠情眷眷而含悲悲惻兼懷憂慮實
深雍可南面千載晞心微微小子斯之莫任莫斯之任
求仁在我將反初服畢志訓雅盡烏烏之至情竭歡敬
於膝下進抗疏以歸誠退抽簪而脂車庶所乞之克從

永收迹於蓬廬。曹攄述志賦曰：慕浮雲以抗操，耽簞食之自娛。羨首陽之皎節，歎南山之高疏。哀夫差之溷惑，詠楚懷之失圖。悲伍員之沈悴，痛屈平之無辜。嘉沮溺之隱約，羨接輿之狂歌。顧大雅之先智，緯明哲之所經。微見幾而遂逝，比舍生而親名。道殊塗而同歸，要逾世而並榮。舜拘忤於焚廩，孔怵惕於陳匡。紛迤蹇之若斯，何遭運之可常。情怵惚以回迷，夢乘雲而飛颺。駕麟鳳之靡靡，截龍旂之洋洋。周九州而騁目，登四岳而永望。承聖詰而砥礪，奮羽儀而翱翔。被蘭茝之芳華，帶鍾山之玉英。飾吾冠之岌岌，美吾佩之玲玲。悲盛衰之遞

處情悠悠以紆結攬萱草以掩淚曾一歡而九咽陸
機遂志賦曰昔崔篆作詩以明道述志而馮衍又作顯
志賦班固作幽通賦皆相依倣焉張衡思元蔡邕元表
張叔哀系此前世之可得言者也崔氏簡而有情顯志
壯而泛濫哀系俗而時靡元表雅而微素思元精練而
和惠欲麗前人而優游清典漏幽通矣班生彬彬切而
不絞哀而不怨矣崔蔡沖虛溫敏雅之屬也衍抑揚頓
挫怨之徒也豈亦窮達異事而聲為情變乎余備託作
者之末聊復用心焉武定鼎於洛汭胡受罪於汝墳繇
鳴鳳於百祀啓敬仲乎方震苟天光之所照豈舜族其

必陳厭禋祀於故墟饗禴祭於東鄰禰八葉而相茂舞
九韶乎降神系姜叟於海曲表滄流以遠震仰前蹤之
緜邈豈孤人之能胄匪世祿之敢懷傷茲堂之不構理
或睽而後合道有夷而弗順傅棲巖而神交伊荷鼎以
自進蕭綢繆於豐沛故攀龍而先躍陳傾覆於楚魏亦
陵霄以自濯伍被刑而伏劔魏和戎而擁樂彼殊塗而
並致此同川而偏溺禍無景而易逢福有時而難學惟
萬物之運動雖紛糾而相襲隨性類以曲成故圓行而
方立要信心而委命援前修以自程擬遺迹於成軌運
新曲於故聲任窮達以逝止亦進仕而退耕庶斯言之

不渝抱耿介以成名 又懷土賦曰余去家漸久懷土
彌篤方思之殷何物不感曲街委巷罔不興詠水泉草
木咸足悲焉故述斯賦背故都之沃衍適新邑之丘墟
遵黃川以葺宇被蒼林而卜居悼孤生之已晏恨親歿
之何速排虛房而永念想遺塵其如玉眇縣邈而莫覲
徒佇立其焉屬感亡景於存物惋隕年於拱木悲顧盼
而有餘思俯仰而自足留茲情於江介寄瘁貌於海曲
翫通川以悠想撫歸塗而躑躅伊躑躅之徒勤慘歸途
之良難愍棲鳥於南枝弔離禽於別山念庭樹以悟懷
憶路草以解顏甘董荼於飴苾緯蕭艾其如蘭神何寢

而不夢形何興而不言 梁元帝元覽賦曰歲次旃蒙
月建司空變蕤賓之呂扇廣莫之風蕭子褰帷九水作
牧三宮乃盱衡而言曰唯天爲大唯堯則之唯地爲厚
唯王國之粵我皇之握鏡實乃神而乃聖陳六聯於八
則弘九職於三令惟天縱于副后踰啓誦而爲首旣論
儒而肅成復斷獄於長壽爾其湘水之東即我龜蒙魏
正元而分邑吳太平而定中鎮鱗山之崔嵬傍龍迹而
穹窿將遊目於五湖乃浩覽於姑蘇臨閭門之跨水聳
重闕而開都觀泉亭之涌波崖巍巍而峩峩張素蓋而
縈洲嶼馳白馬而赴江沱登舜橋而延首瞰禹井而淹

留御史之牀猶在督護之門不脩詳夫皇王爰處本無
定所堯都平陽舜在冀方商王居亳成周卜洛故知黃
旗紫蓋域中爲大天地之所合風雲之所會爰八命而
建旗誠非親而勿居應鳴鞞於龍角覆緹幕於熊車經
釣臺而南邁過鄂渚而西浮變青門之三襲爲黃塵之
一丘臨章華而留眄見舊楚之淒涼試極目乎千里何
春心之可傷其渚宮也夾江帶阡布濩井田通達交迸
高門接連人腰水心之劒家給火耕之田爾乃樹之榛
栗椅桐梓漆三巴黃甘千戶朱橘矧高晏於城隅駐五
馬而踟躕乃有青琴碧玉絳樹綠珠西河王豹東野絲

駒蘭釭夕燃合辟斜天照流風之迴雪映出水之初蓮
奉信珪而入朝驅駿駟而乘輶旣總司於戎旅亦兼飾
於豐貂幼墳籍以自娛迄方今而不渝雲氣芝英之簡
懸鍼倒籛之書擬河獻之留真希淳于之席珍臨秋水
之至樂登春臺而自欣鑿戶牖而長望混木雁而兼陳
嗟今來而古往聊絕筆於獲麟 又言志賦曰天文旣
表人文可觀知負宸之未易信握鏡之云難差立極而
補天驗璧合而珠連有庖羲之八索稱朱襄之五弦聞
夏王之鑄鼎重農皇之播田雖車軌之未同亶彌媿於
棟隆戮封豕於海內斬長狄於區中懷宿昔之璵璠並

來遊於菟園悲元瑜之已逝歎靈光之獨存想延賓於
北閣因寘酒於南軒聞鶯鳴而懷友聽長笛其何言夙
有尚於青靜叨再入於鄒郢東窺文命之穴南望鴻崖
之井遂撫運而登庸謬垂旒而卷領雖有愧於前英每
求衣於未明召司烜而照夜觀執珪而滿庭誠雖休以
勿休實旨酒之忘憂絕何楊之妙舞廢繇駒之善謳假
知止與知足復何營而何欲柱何用於黃金案寧勞於
青玉爾乃高步北園用蕩颯煩桂偃蹇而臨棟石宮墜
而祭門對灌木之脩聳觀激水之飛奔澗不風而自響
天無雲而晝昏聞賓鴻之夜飛想過沛而霑衣况登樓

而作賦望淮海而思歸

增簡文帝悔賦曰默默不怡

恍若有遺四壁無寓三階寡趣月露澄曉風柳悲暮庭
鶴雙舞檐鳥獨赴岸林宗之巾憑南郭之几元德之眊
聊縈子安之歎時起靜思悔吝鋪究前史弔古傷今驚
憂歎圯成敗之蹤得失之理莫不關此令終由乎謀始
棄夸言於頓丘重前非於遽子蹟夫履車之人豈止一
途而已又曰已矣哉波瀾動兮昧前期庸夫蔽兮多自
欺不遠而復幸無嗟建功立德有常基冒馳臆斷多失
之前言往行爲可師 北周庾信小園賦曰若夫一枝
之上巢父得安巢之所一壺之中壺公有容身之地况

乎管寧藜牀雖穿而可坐嵇康鍛竈既煖而堪眠豈必
連園洞房南陽樊重之第綠墀青瑣西漢王根之宅余
有數畝弊廬寂寞人外聊以擬伏臘聊以避風霜雖復
晏嬰近市不求朝夕之利潘岳面城且適閒居之樂況
乃黃鶴戒露非有意於輪軒爰居避風本無情於鐘鼓
陸機則兄弟同居韓康則舅甥不別蝸角蚊睫又足相
容者也爾乃窟室徘徊聊同鑿坯桐間露落柳下風來
琴號珠柱書名玉杯有棠梨而無館足酸棗而非臺猶
得欹側八九丈縱橫數十步榆柳三兩行梨桃百餘樹
撥蒙密兮見窓行欹斜兮得路蟬有翳兮不驚雉無羅

兮何懼草樹混淆枝格相交山爲簣覆地有堂坳藏狸
並窟乳鵲重巢迎珠細菌長柄寒匏可以療飢可以棲
遲敝隘兮狹室穿漏兮茅茨簷直倚而妨帽戶平行而
凝眉坐張無鶴支牀有龜烏多閒暇花隨四時心則歷
陵枯木髮則睢陽亂絲非夏日而可畏異秋天而可悲
一寸二寸之魚三竿兩竿之竹雲氣蔭於叢著金精養
於秋菊棗酸梨酢桃攄李萸落葉半牀狂花滿屋名爲
野人之家是謂愚公之谷試偃息於茂林廼久羨於抽
簪雖有門而長閉實無水而恒沈三春負鋤相識五月
披裘見尋問葛洪之藥性訪京房之卜林草無忘憂之

意花無長樂之心鳥何事而逐酒魚何情而聽琴加以
寒暑異令乖違德性崔駟以不樂損年吳質以長愁養
病鎮宅袖以薶石厭山精而照鏡屢動莊舄之吟幾行
魏顥之命薄晚閔閨老幼相攜蓬頭王霸之子椎髻梁
鴻之妻焦麥兩甕寒菜一畦風騷騷而樹急天慘慘而
雲低聚空倉而雀噪驚懶婦而蟬嘶昔草濫於吹噓籍
文言之慶餘門有通德家承賜書或陪元武之觀時參
鳳凰之墟觀受釐於宣室賦垂楊於直廬遂乃山崩川
竭冰碎瓦裂大盜潛移長離永滅摧直轡於三危碎平
途於九折荆軻有寒水之悲蘇武有秋風之別關山則

風月悽愴隴水則肝腸斷絕龜言此地之寒鶴訝今年
之雪百靈兮倏忽精華兮已晚不惜雁門之踦先念鴻
陸之遠非淮海兮可變非金丹兮能轉不曝骨於龍門
終低頭於馬坂諒天造兮昧昧嗟生民兮渾渾 隋蕭
皇后述志賦曰知道德之可尊明善惡之由已屏黜煩
之俗慮乃伏膺於經史綜箴誡以訓心觀女圖而作軌
遵古賢之令範冀福祿之能綏時循躬而三省覺今是
而昨非嗟黃老之損思信為善之何依慕周姬之遺風
美虞妃之聖則仰先哲之高才貴至人之休德質菲薄
而難蹤心恬愉而去惑乃平生之耿介實禮義之所遵

雖生質之不敏庶積行以成仁懼達人之益寡謂何求
而自陳誠素志之難寫同絕筆於獲麟 唐張說虛室

賦曰明月窓前古樹檐邊無北堂之尊酒絕南鄰之管
弦理涉虛趣心階靜綠厭百慮之勞止歸一途之兀然
嗟乎巧智首亂禮樂增矯名起異端利成貪兆役二見
之交戰驅五神而雜擾形何費而不衰性何煩而不夭
每竭源而追未必志多而獲少心元是幻法本皆空大
哉默識守此元通 韓愈閔已賦曰余悲不及古之人
兮伊時勢而則然獨閔閔其曷已兮憑文章以自宣昔
顏氏之庶幾兮在隱約而平寬固哲人之細事兮夫子

乃嗟歎其賢惡飲食乎陋巷兮亦足以頤神而保年有
至聖而爲之依歸兮又何不自得於艱難曰余昏昏其
無類兮望夫人其已遠行舟楫而不識四方兮涉大水
之漫漫勤祖先之所貽兮勉汲汲於前修之言雖舉足
以蹈道兮哀與我者爲誰衆皆舍而已用兮忽自惑其
是非下土茫茫其廣大兮余壹不知其可懷就水草以
休息兮恒未安而旣危久拳拳其何故兮亦天命之本
宜惟否泰之相極兮咸一得而一違君子有失其所兮
小人有得其時聊固守以靜俟兮誠不及古之人其焉
悲

劉知幾思慎賦曰惟夫明達高人賢良志士知滿

損而謙益驗弱生而強死無爲福先無爲禍始節其飲食謹其容止聚而能散爲而不恃潔其心而穢其迹濁其表而易其裏範閭室而整冠循覆車而易軌以道德爲介冑以忠貞爲劔履愛髮膚而不傷保家室以不恥若乃詢木雁於園吏訪光塵於柱史萬石守慎以全榮二疎旣滿而辭仕袁不及於憎愛柳忘情於愠喜漢先主之立誠莫尚中庸衛大夫之所羞獨爲君子余雖不佞嘗從事於斯矣 無名氏韋弦賦曰惟器可象惟賢則之佩蘭則殊於楚客象環有慕於宣尼信建物之表意實善人之所資故知欲不可縱儉以足用德或可移

中以成規識君子之容止見淑人之表儀周旋之中寧
假於宮徵內外相制亦合乎墳簞大哉景行剛柔異性
緩之于韋用和急之於弦表正既守道而恒佩因履端
而不競式彰茂德分意表情禮節既備敬慎孔明參衣
冠而振序列簪紱以齊榮猗二子之垂誠與千古之揚
名 鄭俞性習相近遠賦曰酌人心之善敗惟性習之
所分習者物之遷以動為主性者生之質以靜為君運
情有同於鑄鑄通志亦比夫耕耘或定心以純一或逐
境而糾紛故定心者若疏源而自得逐境者猶理絲而
又棼且物之惑人無窮人之徇物無已近之則歸於正

性遠之則滅於天理雖真固之多端諒御用而由已

李德裕知止賦曰況乎托北阜以爲宅就東山而結廬
仲樂得於清曠陶豈歎於將蕪其遠眺也則伊水陸渾
北繞皇居度雙闕之蒼翠若天漢之逶迤少室東映於
原隰鳴臯西對於林閭其近翫也則檻泉流於一壑嘉
木盈於萬株逕被芳蓀沚映芙蓉聽求友之鳴禽見自
樂之儵魚徒竒樹於台嶺隱翠葉而垂珠得怪石於震
澤聳青岑而韜瑜昔有罷侯種瓜逃相灌蔬竊比君子
亦能荷鋤或引蔓於長坂或導流於清渠放情人世之
外寄迹羲皇之初望夕景於平林眺寒煙於遠墟磨磨

遠而騰倚鳧雁去而相呼酌盈尊以自慰賴鳴琴而不
孤懷綺皓而披素卷想瀛洲而觀畫圖何必尚遍遊於
名嶽蠡長往於五湖嗟夫世於知止之道若存若無李
斯忘於稅駕惠子疲於據梧盡生涯以自若何智力之
有餘庶收光之未晚期終老以桑榆 白居易君子不

器賦曰君子哉道本性知德惟天縱抱乎不器之器成
乎有用之用不器者通理而黃中有用者致遠而任重
蓋識包權變理蘊通明業非學致器異琢成審其時有
道舒而無道卷慎其德舍之藏而用之行語其小能立
誠以脩詞論其大能救物以濟時以之理心則一身獨

善以之從政則庶績咸熙既居家而必達亦在邦而允
釐彼子貢雖賢惟稱瑚璉之器彥輔信美空標水鏡之
資是故非求備者又何足以知之豈如我順我通塞合
乎語默何用不臧何嚮不克施之乃伊呂事業蓄之乃
莊老道德雖應物而不滯終飭躬而有則若止水之在
器因器圓方如良工之用材隨材曲直原夫根淳精於
妙有宅元和於虛受內弘道以惟新外濟用而可久鄙
斗筭之奚算諒挈瓶之固守何器量之差殊在性情之
能否豈不以神爲元樞智爲心符全其神則爲而勿有
虛其心則用當其無故動與神合靜與道俱時或用之

必開臧武之智道不行也則守甯子之愚至乎哉冥心
在我無可而無不可應用不疲無爲而無不爲信大成
而大受非小惠而小知顧庶類曲從則輪轅適用若一
隅偏執則鑿枘難施是以易尚隨時禮貴從宜展矣君
子斯焉取斯 浩虛舟行不由徑賦曰且遵道如砥持
心若弦信無私以白首將抱直以窮年顏生附郭之田
有時窺矣謝氏登山之屐無所用焉旣而披蔓草之荒
涼見遊人之遷迤方檢身於邪正寧繫懷於遠邇楊朱
悲道喪事亦如斯阮籍哭途窮意殊若此當舉直以錯
枉冀風行而草靡苟非賢智之爲心孰能如是 元吳

萊定命賦曰託松柏之幽蔭兮招鹿麋而與儔俯環堵
之湫隘兮猶采椽之彫鏤駕柴車之樸素兮亦炫耀其
華輶等羹藜乎梁肉兮齊衣敝於貂裘窮匪通其不鄙
兮賤無貴以何羞嗤予音之寡和兮譽汝器之無不周
斯視聽之既愜兮曾不遇曠與婁麒麟出而野死兮鳴
鸞鳳之啾啾幸定分之有在兮肯他岐之往謀 明薛
瑄自修賦曰皇降予以衆美兮寔清明而粹全胡賦質
之不猶兮乃蔽昧而強孱自有識而發憤兮窺前修之
闡關誦古訓之數數兮服至理之拳拳雖苦心而極力
兮猶未從容乎矩步忽內怛而自修兮吾知其故善旣

復而或失兮怠與敬其交鶩心暫閑而或蔽兮理與學
其紛互此實進退之機兮肇千里於跬步苟浚擇之不
勇兮將邪羸而正負蓋必於敬於理而保持兮於怠於
欲其屏去既經心以自明兮復誦言以自固庶成性之
存存兮全上天之所賦 王廷相靖志賦曰余幼嘉此
遠遊兮效羽儀於闔闔既反志而靜觀兮渺虛無之靡
汨嗅文籍之靈華兮心固結以如石揭大猷以振世兮
闡鴻龐之未闢仰周孔之遺則兮希聞韶於千載力述
邇而弗及兮徒蠡心而測海 又悼時賦曰豈貪生之
常流兮迷異道而誣世諸有求而莫獲兮反予聰而大

觀予苟不畔於道槩兮行窮困而志完矧沈冥爲真詮
兮終解脫乎憂患要時命之可俟兮胡悒悒以長歎
袁袞閔俗賦曰閔世俗之謠詠獨修姱以練要懲遺烈
以旌植飾鞿羈於中道秉幼清於初服固周容者之所
誚昔姬旦之申繇列如石以矢辭披騷經以繹趣謂追
曲其淪胥紛儀一而心結耿詠贊於曹詩諒軌護之弗
渝又焉能遠夫毀咎戒甄坯之戾緩和脣吻而弗狃考
聖哲之所藏寧孤抗以寡偶彼蘭蒨之昭質兮挺幽谷
而彌芳覽珪璋及筐筥豈改錯其圓方苟啜訾以慙慢
恥志墨其弗章保厥美而委順庶旁燭於無疆 又思

歸賦曰余旣不能狗華以苟祿兮又焉能棲棲於此邦
孔接浙以違齊兮軻濡滯而出晝欽疏傳之炳幾兮脫
桎梏於組綬梁歌噫以竄稽兮梅挂冠以遯吳仲樂志
於園藪兮張興思於尊鱸鴻冥冥於寥廓超繳繒而遠
徂非斯人其誰與歸兮永逍遙於江湖 李好文感志
賦曰余非昧而至愚誠有徵乎前哲聞耕獲於德道兮
內懷寶以自珍豈馭畝之足樂兮聞闡漠而無聞昔樊
須之請稼兮廼獲誦於聖人摯冥冥其鴻飛兮猶釋耒
乎有莘溺耦沮之不反兮又奚足與爲羣悲此志之未
伸兮秉經德之不回心飛揚而披離兮曷日夜而疚懷

沈愷景初賦曰反白雲之故廬兮寄崖谷以自怡神
龍吻其潛淵兮恒日夜其杼思銜六藝之珍駕兮遊道
德之平陸上何微之弗彰兮下何隱之弗燭紹斯文之
末裔兮振浮靡之薄俗敢修辭以耀世兮將以窮天地
之奧闕仰上古之義皇兮復夢寐而索之惟此心之用
昭兮曠異世而見知乃養恬以頤年兮窈連娟而委蛇
物靡晦而弗昭兮度有常而不虧不出戶而知天下兮
何必涉遠而淒其 周沛遂初賦曰竊予生之不辰兮
性闇昧以慣瀆遵軌度以託處兮猶遑遑焉其競逐嗟
先民之既逝兮世貿貿而罔極彼籛箴之眇小兮紛盛

麗以無斃稽堯舜之勲華咎夔輔而稷契揚姁君臣之
胥慶下及於有商尹負鼎以醜夏虺矢誥以釋湯君聖
賢以六七作咸能覩乎往古旦爽開周以八百猶繼之
以申甫緊叔季之雲擾益脂韋而菁闕雖誼辟之代興
憫忠良之罔察肇皇祖之啓運兮滌腥塵而廓寰宇累
八葉之重光兮俊乂登而禮樂起海內外之向風兮抱
一藝而靡遺獨余渺之敝罔兮曷偃蹇而無為詎予行
之未修兮抑帝降之莫違彼華室以悒懔兮予搆泉石
之敝廬服軒冕以赫奕兮有衣裳之在笥錯珍羞以列
鼎兮媿彈鋏而無魚既飽食以自適兮庸馳心於外慕

采西山之薇蕨兮又奚計夫旦暮 陳羽攄臆賦曰子
幼好此奇服兮羌潔清以自修佩明月之寶珠兮披翠
雲之綺裘闔闔開而顯通兮浚雲霓而上征叩天闈以
自獻兮皇旣錫以榮名世方喜通而醜直兮竟鑿枘其
圓方寧擯逐以遐鶩兮理召杜之遺疆旣滋甘棠之百
畝兮又樹之以桃李世旣莫吾知兮傷蛾眉其見嫉蒙
羞忍詬蒲伏轅下兮甘株守以留滯亦旣遭乎家難兮
遂屏居乎聖室幸寶運之中天兮二八踰蹌而在庭思
一命以自效兮期不負乎平生夫豈無箕潁之心兮諶
不忍其陸沈惟予悻直以自遂兮乃逢怒而招尤荃不

鑒子之貞誠兮志不售而見仇羣賢駢駢以彙征兮子
獨胡爲乎此行信前魚之可泣兮抑積薪之見凌臨廣
路而鬱陶兮惟以思夫美人揚雄執戟忽已疲兮更生
十年而不遷予既不及古之人兮又何咎乎時賢命有
所制兮時有所窮物極必反兮庶幾追前修之逸駕亂
曰窮冬飛雪遠帝京兮心旌搖曳指鄴城兮層冰峨峨
平沙千里兮瞻戀魏闕蹇不可已兮遭迴脩塗有懷曷
吐兮白雲在天遠隔吾土兮抑鬱侘傺心遙思兮離家
去鄉曷逾時兮攄誠作誦聊以自慰兮開春發歲忽乎
時其暨兮

原書漢司馬遷報任安書曰僕亦嘗廁下大夫之列陪

奉外廷末議不以此時引網維盡思慮今已虧形爲埽
除之隸在闕葺之中乃欲仰首伸眉論列是非不亦輕
朝廷羞當世之士耶僕與李陵俱居門下素非相善也
趨舍異路未嘗銜杯酒接殷勤之餘歡今舉事一不當
而全軀保妻子之臣隨而媒孽其短僕誠私心痛之且
李陵提步卒不滿五千深踐戎馬之地矢盡道窮救兵
不至士卒死傷如積然李陵一呼勞軍士卒無不起張
空卷冒白刃北嚮爭死敵者愚以爲李陵素與士大夫
絕甘分少能得人之死力雖古名將不過也身雖陷敗

功亦足暴於天下矣適會召問即以此指推言陵之功
欲以廣主上之意塞睚眦之辭未能盡明明主不曉以
爲僕沮貳師而爲李陵遊說遂下於理拳拳之忠終不
能自列交遊莫救視左右親近不爲一言身非木石獨
與法吏爲伍深幽囹圄之中誰可告愬者此真少卿所
親見僕行事豈不然乎且夫臧獲婢妾猶能引淩況僕
之不得已乎所以隱忍苟活幽於糞土之中而不辭者
鄙沒世而文采不表於後世也古者富貴而名磨滅不
可勝記唯倜儻非常之人稱焉蓋西伯拘而演周易仲
尼厄而作春秋屈原放逐乃賦離騷左丘失明厥有國

語孫子臚脚兵法修列不韋遷蜀世傳呂覽韓非囚秦
說難孤憤詩三百篇大抵賢聖發憤之所爲作也僕竊
不遜近自託於無能之辭網羅天下放失舊聞略考其
行事綜其終始稽其成敗興壞之紀欲以究天人之際
通古今之變成一家之言惜其不成是以就極刑而無
愠色僕誠已著此書藏之名山傳之其人通邑大都則
僕償前辱之責雖萬被戮豈有悔哉然此可爲智者道
難爲俗人言也 楊惲報孫會宗書曰惲家方隆盛時
乘朱輪者十人位在列卿爵爲通侯總領從官與聞政
事曾不能以此時有所建明以宣德化已負竊位素餐

之責久矣懷祿貪勢不能自退遂遭變故橫被口語身
幽北關妻子滿獄當此之時自以夷滅不足以塞責豈
意得全首領復奉先人之丘墓乎伏惟聖主之恩不可
勝量君子游道樂以忘憂小人全軀悅以忘罪竊自思
念過已大矣行已虧矣長為農夫以沒世矣是故身率
妻子戮力耕桑灌園治產以給公上不意當復用此為
譏議也田家作苦歲時伏臘烹羊炮羔斗酒自勞家本
秦也能為秦聲婦趙女也雅善鼓瑟奴婢歌者數人酒
後耳熱仰天撫缶而呼嗚嗚其詩曰田彼南山蕪穢不
治種一頃豆落而為箕人生行樂耳須富貴何時是日

也拂衣而喜奮袖低昂頓足起舞誠淫荒無度不知其不可也憚幸有餘祿方糴賤販貴逐什一之利下流之人衆毀所歸不寒而慄雖雅知憚者猶隨風而靡尚何稱譽之有道不同不相爲謀今子尚安得以卿大夫之制而責僕哉 魏文帝與吳質書曰季重無恙塗路雖局官守有限願言之懷良不可任足下所治僻左書問致簡益用增勞每念昔日南皮之遊誠不可忘旣妙思六經逍遙百氏彈琴間設終以博奕高談娛心哀箏順耳馳騁北場旅食南館浮甘瓜於清泉沈朱李於寒水白日旣匿繼以朗月同乘共載以遊後園輿輪徐動參

從無聲清風夜起悲笳微吟樂往哀來愴然傷感
而言斯樂難常足下之徒咸以爲然今果分別各
方元瑜長逝化爲異物每一念至何時可言方今
紀時景風扇物天氣和暖衆果具繁時駕而遨遊
北道河曲從者鳴笳以啓路文學託乘於後車節
同時異物是人非我勞如何又曰昔日遊處行則
連輿立則接席何曾須臾相失每至觴酌流行絲
竹並奏酒酣耳熱仰而賦詩當此之時忽然不自
知樂也何圖數年之間零落略盡言之傷心頃撰
其遺文都爲一集觀其姓名已爲鬼錄追思昔遊
猶在心目而此諸子化爲糞壤可

復道哉歷覽諸子之文對之收淚既痛逝者行自念也
年行已長大所懷萬端時有所慮至乃通夕不瞑志意
何時復類往昔邪已成老翁但未白頭爾 曹植與吳
質書曰前日雖因常調得爲密坐雖宴飲彌日其於別
遠會稀不盡其勞積也若夫觴酌凌波於前笳簫發音
於後足下鷹揚其體鳳觀虎視謂蕭曹不足儔衛霍不
足侔也左顧右眴謂若無人豈非君子之壯志哉過屠
門而大嚼雖不得肉貴且快意當斯之時願舉太山以
爲肉傾東海以爲酒伐雲夢之竹以爲笛斬泗濱之梓
以爲箏食若填巨壑飲若灌漏卮其樂固難量豈非大

丈夫之樂哉然日不我與曜靈急節而有逸景之速別
有參商之闊思抑六龍之首頓羲和之轡折若木之華
閉濛汜之谷天路高邈良無由緣 吳質答太子書曰
奉讀手命追亡慮存恩哀之隆形於文墨日月冉冉歲
不我與昔侍左右厠坐衆賢出有微行之遊人有管弦
之歡置酒樂飲賦詩稱壽自謂可終始相保並騁材力
效節明主何意數年之間死喪略盡臣獨何德以堪久
長徐陳劉應才學所著誠如來命惜其不遂可謂痛切
凡此數子於雍容侍從實其人也若乃邊境有虞羣下
鼎沸軍書轉至羽檄交馳於彼諸賢非其任矣往者孝

武之世文章爲盛若東方朔枚臯之徒不能持論即阮
陳之流也其惟嚴助壽王與聞政事然皆不慎其身善
謀於國卒以敗亡臣竊恥之至於司馬長卿稱疾避事
以著撰爲務則徐生庶幾焉而今各逝已爲異物 又
荅曹植書曰信到奉所惠貺發函伸紙是何文彩之巨
麗而慰喻之綢繆乎夫登東岳者然後知衆山之迤邐
也奉至尊者然後知百里之卑微也身賤犬馬德輕鴻
毛至乃歷元闕排金門升玉堂伏櫺檻於前殿臨曲池
而行觴旣威儀虧替言辭漏泮雖恃平原養士之懿愧
無毛遂耀穎之才深蒙薛公折節之禮而無馮諼三窟

之效屢獲信陵虛左之德又無侯生可述之美凡此數
者乃質之所以憤積於胷襟懷眷而悃邑者也若追前
宴謂之未究欲傾海爲酒并山爲肴伐竹雲夢斬梓泗
濱然後極雅意盡歡情信公子之壯觀非鄙人之所庶
幾也若質之志實在所天思投印釋黻朝夕侍坐鑽仲
父之遺訓覽老氏之要言對清醑而不酌抑嘉肴而不
享使西施出帷嫫母侍側斯盛德之所蹈明哲之所保
也若乃近者之觀實蕩鄙心秦箏發徽二人迭奏塤簫
啟於華屋靈鼓動於坐左耳嘈嘈而無聞情踊躍於鞍
馬謂可北懼肅慎使貢其楛矢南震百越使獻其白雉

又况權備夫何足視乎還治諷采所著觀省英瑋實賦
頌之宗作者之師表也 晉羊祜與從弟書吾以布衣

忝荷重任每以尸素爲愧大命旣隆惟江南未夷此人
臣之責是以不量所能畢力吳會當憑朝廷之威賴士
大夫之謀以余克之舉除萬世之患年已朽老旣定邊
事當有角巾東路還歸鄉里於墳墓側爲容棺之墟假
日視息思與後生味道此吾之至願也以凡才而居重
位何能不懼盈滿受責邪疏廣吾師也聖主明怒當不
奪微志爾 劉琨荅盧謏書曰損書及詩備辛酸之苦
言暢經通之遠旨執玩反覆不能釋手慨然以悲歡然

以喜昔在少壯未當檢括遠詠老莊之齊物近嘉阮生
之放曠怪厚薄何由而生哀樂何由而至自頃譚張困
於逆亂國破家亡親友凋殘塊然獨處愧憤雲集負杖
行吟則百憂俱至時復相與舉觴對膝破涕爲笑推終
身之積慘求數刻之整歡譬由疾疹彌年而欲以一丸
銷之爾夫才生於世而世實須才和氏之璧焉得獨曜
於郢握夜光之珠無緣得玩於隨掌天下之寶固當與
天下共之但離索之日不能不以悵悵爾 習鑿齒與
桓泌以才氣相推鑿齒罷滎陽郡歸與桓書曰吾以五
月三日來達襄陽觸目悲感略無歡情西望隆中想臥

龍之吟東眺白沙思鳳雛之聲北臨樊墟存鄧老之高
南眷城邑懷羊公之風縱目檀溪念崔徐之友肆睇魚
梁追二德之遠未嘗不徘徊移日撫乘疇曙若乃魏武
之所置酒孫堅之所隕斃裴杜之故居繁王之舊宅遺
事猶存星列滿目瑣瑣常流碌碌凡士焉足感其方寸
哉夫芬芳起於椒蘭清響生乎琳琅命世而作佐者必
垂可大之餘風高尚而邁德者必有明盛之遺事若向
八君子者千載猶使想其爲人況相去之不遠乎彼一
時此一時焉知今日之才不如疇辰百年之後吾與足
下不並爲景行乎 齊謝朓與王儉書曰夫所貴天下

之士者何其上則闕景山壑凌氣風霞次則投緡舍築
鬱爲上佐次則服秦楚而辭其功振燕魏而逃其賞凡
此數輩皆英懿之士也自茲以降參差萬緒或迹著明
晦或才兼黠語若桓譚之褻俗馮衍之忤時北海之凝
峭中散之峻絕率以方寸之情喪不訾之德蓋無取焉
若相如之愛竒任節偉長之淹粹弘遠樂廣融通秉楛
夷淡彼四賢者並純神絕景徇物傷意其慕之而未可
以言但心之所暗咫尺千里志之所符滄洲曖然揣而
論之寔山河之不肖者也 梁簡文帝荅徐摛書曰山
濤有云東宮養德而已但今與古殊時有監撫之務竟

不能黜邪進善少助國章獻可替不仰裨聖政以此慙
違無忘夕惕驅馳五嶺在戎十年險阻艱難備更之矣
觀夫全軀具正刀筆小吏未嘗識山川之形勢介冑之
勤勞細民之疾苦風俗之嗜好高閣之間可束高門之
地徒重玉饌羅前黃金在握况嘗粟斯容與自意亦復
言軒羲以來一人而已使人見此良足長歎 王僧孺
與何炯書曰昔李叟入秦梁生適越猶懷恨悵且或吟
謠況岐路之日將離巖網辭無可憐罪有不測所以握
手戀戀離別珍重弟愛同郭李淫淫承睫吾猶抗手分
背羞學婦人顧實不肖文質無所抵蓋困在衣食迫於

飢寒非有奇才絕略高談吐一言可以匡俗振民動一
議可以固邦興國全鉞歸趙飛矢投燕偃息藩魏甘臥
安郢腦日逐隨月支握十萬而橫行提五千而深入將
能執珪裂壤功勒景鍾錦繡爲衣朱丹被轂斯蓋大文
夫之志非吾曹之所能及除舊布新清晷方且抱樂銜
圖訟誣有主一旦陪武帳仰文櫺櫛駢佚之柱下充巖
朱之席上人班九棘出專千里未有躡景追風奔驟之
若此者也蓋基薄牆高塗遙力躓司隸懷懷思得應弦
譬懸廚之獸如離繳之鳥將充庖鼎以餌鷹鷂雖事異
鑽皮文非次骨猶復因茲舌杪成此筆端上可以投畀

北方次可以論輸左校幸聖王留善貸之德紆好生之
施解網祝禽下車泣罪所謂還魄斗極追風奉高蓋士
無賢不肖在朝見嫉女無美惡入宮見妬外無奔走之
友內乏疆近之親是以媾市之徒隨相媒藥一朝捐棄
以快怨者之心吁可悲矣蓋先貴後賤古富今貧李流
所以發此哀音雍門所以和其悲曲又迫以嚴秋殺氣
萬物多悲長夜展轉百憂俱至况復露鋪草色風搖樹
影寒蟲夕叫含輕重而同悲秋葉晚傷雜黃紫而俱墜
悲夫豈復得與二三士友抗首接膝履足差肩攜綺縠
之清文談希夷之至道唯吳憑之遇夏馥范式之值孔

嵩慙其留質憐此行乞爾又荅江琰書曰猥惠嘉音
用蠲疾首發函伸紙朗若披雲等嶰谷之清音比洞庭
之高曲辭則美矣而擬其非倫譬享海鳥以醇醪嘉膳
栖林狃以崇楹曾拱苟非其實立有驚怖況復以一離
訴棄賓實漼然豈復能使一笥可輕八廚斯引且登清
漢乍棄黃汗望影析支爭塗再揖其或蹲林臥石籍卉
班荆不過田畷野老漁父樵客酌醴焚枯嗚嗚相勞羹
藜含糗果然滿腹寧有幡旗貴客車馬大賓獻書盡先
賢之德作頌整前皇之美豈不俯拾青紫坐享大夫況
復詠高梧而賦脩竹背清淮而遊長苑留東閣以從容

登石室而高視豈與夫身沒名隕同年而共毀譽哉

贈北周蕭大圜言志書曰拂衣褰裳無吞舟之漏網挂
冠懸節慮吾志之未從倘獲展禽之免有美慈明之進
如蒙北叟之放實勝濟南之徵其故何哉夫閭閻有優
游之美朝廷多簪佩之累蓋由來久矣留侯追蹤於松
子陶朱成術於辛文良有以焉況乎智不逸羣言不高
物而欲辛苦一生何其僻也豈如知足知止蕭然無累
北山之北棄絕人間南山之南超逾世網面修原而帶
流水倚郊甸而枕平臯築蝸舍於叢林構環堵於幽薄
近瞻煙霧遠睇風雲藉纖草以蔭長松結幽蘭而援芳

桂仰翔禽於百仞俯泳鱗於千尋果園在後開窓以臨
花草蔬圃居前坐簷而看灌圃二頃以供饘粥一畝以
給絲麻侍兒五三可充絰織家僮數四足代耕耘沽酪
牧羊協潘生之志畜雞種黍應莊叟之言獲菽尋范氏
之書露葵徵尹君之錄烹羔豚而介春酒迎伏臘而候
歲時披良書探至頤歌纂纂唱烏烏可以虞神可以散
慮有朋自遠揚摧古今田畷相過劇談稼穡斯亦足矣
樂不可施永保性命何畏憂責豈若蹙足入絆申脰就
羈遊帝王之門趨宰衡之勢不知飄塵之少選寧覺年
祀之斯須萬物營營靡存其意天道昧昧安可問哉嗟

乎生若浮雲朝露寧俟長繩繫景實不願之執燭夜遊
驚其迅邁百年幾何擎跽曲拳四時如流俛省躡足出
處無成語默奚當非直丘明所恥抑亦仲尼恥之 唐
韓愈上鄭相公書曰愈為相公官屬五年辱知辱愛伏
念曾無絲毫事為報荅效日夜思慮以為事大君子當
以道不宜苟且求容悅故於事未嘗敢疑或宜行則行
宜止則止受容受察不復進謝自以為如此真得事大
君子之道 王績荅馮子華處士書曰知吾縱恣散誕
不閑拜揖糠粃禮義錙銖功名亦以俗外相待不拘以
家務至於鄉族慶弔閨門婚冠寂然不與者已五六歲

矣親黨之際皆以山麋野鹿相畜性嗜琴酒得盃所懷
幸甚幸甚近復都盧棄家獨坐河渚結構茅屋并廚廩
總十餘間奴婢數人足以應役用天之道分地之利耕
耘蘆菘黍秫而已春秋歲時以酒相續兼多養鳧雁廣
牧雞豚黃精白朮枸杞薯蕷朝夕採掇以供服餌床頭
素書數帙莊老及易而已過此已往罕嘗或披忽憶弟
兄則渡河歸家維舟岸側興盡便返每遇天地晴朗則
於舟中詠大謝亂流趨孤嶼之詩眇然盡陂澤山林之
思覺瀛洲方丈森然在目前或時與舟人漁子方潭並
釣俯仰極樂戴星而歸歌詠以會意為巧不必與夫悠

悠閒人相唱和也孤住何渚傍無四鄰聞犬聲望煙火

便知息身之有地也 又荅刺史杜松之書曰博士陳

龕至奉處分借家禮并帙封送至請領也又承欲相招

講禮聞命驚笑不能已已豈明公前眷或徒與下走相

知不熟也下走意疎體放抑有由焉兼棄俗遺名爲日

久矣淵明對酒非復禮義能拘叔夜攜琴惟以煙霞自

怡登山臨水邈矣忘歸談虛語元忽焉終夜僻居南渚

時來北山兄弟以俗外相期鄉閭以狂生見待歌去來

之作不覺情親詠招隱之詩惟憂情盡惟天席地友月

芻風新年則柏葉爲尊仲秋則菊花盈把羅含宅內自

有幽蘭數叢孫綽庭前空對長松一樹高吟朗嘯挈榼
攜壺直與同志者爲羣不知老之將至欲令復整理簪
履修束精神揖讓邦君之門低昂刺史之坐遠談糟粕
近棄醇醪必不能矣亦將恐芻狗貽夢櫟社見嘲去矣
君侯無落吾事王君白蓋明王廷陳寄余子書曰爲疎
爲懶不敢爲狂爲拙爲愚不敢爲惡高竹林之賢而醜
其放懷三閭之忠而過其沈智鴟夷之逝而汚其富
唐寅與文徵仲書曰亦將櫜括舊聞總統百事敘述十
經翱翔蘊奧以成一家之言傳之好事託之高山沒身
而後有甘鮑魚之腥而忘其自者傳誦其言探察其心

必將爲之撫缶命酒擊節而歌嗚嗚也

徐禎卿荅獻

吉書曰退處原野抱杖行歌沐耳清渠之濱晞髮茂陰之下而枕以六經漱以羣籍撫景則悠然賦詩臨流則引觴獨酌斯亦達士之所希生人之極歡也

志梁劉峻山栖志曰夫鳥居山上曾巢木末魚潛川下窟穴沙泥豈好異哉蓋性然也故有忽白壁而樂垂綸負玉鼎而要卿相行藏紛糾顯晦踳駁無異火炎水流圓動方息斯則廟堂之與江海蓬戶之與金闔並然其所然悅其所悅子每思濯清瀨息椒丘寤寐永懷其來尚矣所居東陽郡金華山山川秀麗膏澤坱鬱若其

羣峯疊起接漢連霞高林布護春青冬綠迴溪映流則
千仞洞底膚寸雲合必千里兩散所住三面山皆周繞
有象鄂鄂南則平野蕭條極目通望東西帶二澗則有
時飛流泉瀾清澍滴瀝生響白波跳沫洶湧成音楓楮
椅櫪之樹相樟桂樟之木分形異色千族萬種結朱實
苞綠裏搖白蒂抽紫莖櫛蠹萃尊稍風鳴籟垂柯簷戶
布葉房櫳中谷澗濱華葩攢列至於青春受謝萍生泉
動則都梁含馥懷香送芬長樂負霜宜男泣露芙蓉紅
華照水臯蘇縹葉從風憑軒永眺蠲憂忘疾歲始年季
農隙時閒濁醪初熟濟縹清新則有田家野老提壺共

至班荆林下陳尊置爵酒酣耳熱屢舞嚙歎盛論箱庾
高談穀稼不求於世不逢萬物莫辨榮辱匪知毀譽浩
蕩天地之間心無怵惕之警 宋羅大經山居誌曰唐

子西云山靜似太古日長如小年子家深山之中當春
夏之交蒼蘚盈堦落花滿徑門無剥啄松影參差禽聲
上下午睡初足涎汲山泉拾松枝煮茗啜之隨意讀
周易國風左氏傳離騷太史公書及陶杜詩韓蘇文數
篇從容步山徑撫松竹與麋犢共偃息於長林豐草間
坐弄流泉漱齒濯足旣歸竹窓下則山妻稚子作筍蕨
供麥飯歡然一飽弄筆窓間隨大小作數十字展所藏

法帖墨蹟畫卷縱觀之興到則吟小詩或草玉露一兩
段再烹苦茗一杯出步溪邊邂逅園翁溪友問桑麻說
秔稻量晴較雨探節數時相與劇談一晌歸而倚杖柴
門之下則夕陽在山紫綠萬狀變幻頃刻恍可人目牛
背笛聲兩兩歸來而月映前溪矣味子西此句可謂絕
妙人能真知此妙則東坡所謂無事此靜坐一日似兩
日若活七十年便是百四一所得不已多乎

增表魏曹植求自試表曰騏驥長鳴伯樂照其能盧狗
悲號韓國知其才是以效之齊楚之路以逞千里之任
試之狡兔之捷以驗搏噬之用

淵鑑類函卷三百五

Faint vertical text columns, likely bleed-through from the reverse side of the page.

淵鑑類函卷三百六

人部六十五

行旅

逆旅

行旅一

原爾雅曰征邁行也

易曰天行健

又曰牝馬地類

行地無疆

又曰利有攸往

又曰旅人先笑後號咷

毛詩曰我行其野芃芃其麥

又曰惠而好我攜手

同行

又曰行道遲遲中心有違

禮記曰行則有隨

立則有序行而無隨則亂于塗

增周禮地官遺人凡

國野之道十里有廬廬有飲食三十里有宿宿有路室

路室有委五十里有市市有候館候館有積

原左傳

人部

淵鑑類函卷三百六

行旅

曰凡公行告於宗廟反則飲至舍爵策勲焉禮也 又
曰君行師從卿行旅從 又曰不有居者誰守社稷不
有行者誰扞牧圉 又曰先王卜征五年歲習其祥祥
習則行 又曰行李之往來共其資糧靡屨其可也
增孟子曰關譏而不征則天下之旅皆悅而願出於其
路矣 又曰行旅皆欲出於王之塗 **原**莊子曰適百
里者宿春糧適千里者三月聚糧

行旅二

原莊子曰黃帝將見大隗於具茨之山方明爲馭昌寓
參乘於襄城之野七聖皆迷適遇牧馬童子問塗焉

又曰黃帝遊乎赤水之池登於崑崙之丘 史記曰禹
乘四載隨山刊木山行乘楫泥行乘橈陸行乘車水行
乘舟 毛詩序周大夫行役過故宗廟宮室盡爲禾黍
彷徨而不忍去曰行邁靡靡中心摇摇 又曰周公東
征三年而歸曰我徂東山惛惛不歸我來自東零雨其
濛 左傳曰昔周穆王欲肆其心周行天下將皆必有
車轍馬跡焉 穆天子傳曰天子北征絕漳水西征賓
於王母天子觴西王母瑤池之上 **增**韓非子曰管仲
從威公至孤竹春往冬返迷失道管仲曰老馬之智可
用也乃放老馬而隨之遂得道 莊子曰士成綺見老

子百舍重趺而不敢息

原史記曰老子居周久之見

周之衰乃遂去關關令尹喜曰子將隱矣喜與老子俱之流沙之西家語曰齊人歸女樂魯君觀之三日不

朝孔子遂行

增後漢書曰李固步行尋師不遠千里

原又曰秦始皇至雲夢望祀虞舜於九疑浮江下觀

丹陽至錢塘臨浙江上會稽祭大禹望於南海北至琅

邪漢書曰武帝行幸雍遂北出蕭關歷獨鹿鳴澤自

代而還又曰行幸至甘泉宮賓禮外國客又行幸東

海獲赤鴈又曰武帝南巡至盛唐祀虞帝於九疑登

天柱山自潯陽浮江斬蛟江中遂北至琅邪徬海而還

所過禮祠名山大川 **增**又曰武帝使鄭莊視洩河自

請治行五日上曰吾聞鄭莊行千里不齎糧請治行者

何也 **原**又曰張騫爲郎應募使月支匈奴留之十餘

年騫持節不失西走大宛抵康居傳至大月支從月支

至大夏窮河源廣地萬里九譯至殊俗威德徧於四海

增晉書曰阮籍率意獨駕不由徑路車跡所窮輒慟

哭而返 前秦錄曰苻堅滅燕趙之後自長安至諸州

皆夾路樹槐柳二十里一亭四十里一旅行者取給於

涂工商資販於道 北史曰韋孝寬爲雍州刺史先是

路側一里置土堠經雨頽壞每煩脩之自孝寬臨州乃

救部內當瘳處植槐木代之既免脩復行旅又得庇蔭
周文後見怪問知之曰豈得一州獨爾當天下同之於
是令諸州道路一里植一木十里植二木百里植五木
焉 唐書曰魏徵勸帝行仁義至是天下大治行旅不
齋糧取給於道 一統志曰宋鄒浩號道鄉謫衡州經
長沙守溫益下逐客令旅店不敢容風雨夜渡湘江山
僧列炬迎之張栻爲浩築臺朱熹刻石曰道鄉 明劉
氏鴻書曰宋紹興辛酉周輝隨侍之鄱陽至南康揚瀾
左蠡失舟老幼僅以身免小泊沙際俟易舟信步至山
椒一寺軒名重湖梁間一木牌老僧指示是乃蘇內翰

留題登榻觀之即八月渡重湖詩也僧曰以所處深險
人跡不到故留至今宋史曰賈似道謫高州團練使
循州安置籍其家福王與芮素恨似道募有能殺似道
者送之貶所有縣尉鄭虎臣欣然請行虎臣每名片似
道輟轎蓋暴行秋日中昇轎夫唱杭州歌謔之似道至
古寺中壁有吳潛南行所題字虎臣呼似道曰吳丞相
何以至此似道慙不能對八月至漳州木棉菴虎臣屢
諷之自殺似道曰太皇許我不死虎臣曰吾爲天下殺
似道雖死何憾拉殺之元史曰憲宗征大理國自六
盤山經臨洮下西番諸城抵雪山徑盤屈舍騎徒步鄭

鼎負憲宗以行至金沙河波濤洶湧帝臨水旁危石立
馬觀之鼎諫曰此非聖躬所宜親扶下馬帝嘉之 鴻
書曰太祖在御多好微行以察人情之向背嘗以夜出
暫止逆旅枕石眠草藉上中夜有人語曰吾視乾象當
在民舍中頭枕石脚踣藉而臥室中人笑曰君得無誤
耶上聞而異之即以手足易位而寢俄其人亦至庭中
曰君果誤矣此人頭枕藉脚踣石耳上聽之不覺汗流
浹於背即夕還宮購求兩人不可得是後微行稍稀矣

弇州史料曰丘文莊公濬夫人自南海浮江而上過
鄱陽湖夜夢達官訶擁入舟曰吾乃翰林編脩戚瀾也

昔與丘先生同官義不容絕特報耳三日後有風濤之險隻帆片櫓無存可亟遷於岸夫人驚覺如其言移止寺中未幾江中果有風濤衆舟盡溺至京夫人白其事於文莊公公以聞於朝遣官諭祭文莊又爲文祭之

行旅三

原徂矣

何之

詩駕言徂矣 陵詩遊子暮何之

跋涉

劬勞

詩大夫跋

涉我心則憂草行曰跋水行曰

駢駢

蕭蕭

詩駢駢 征夫

又蕭蕭 馬鳴

增擔簦

隨牒

戰國虞卿躡屣擔簦以說趙王 漢匡衡曰但以無階朝

廷故隨牒 在遠方

萍浮

梗泛

東漢鄭康成萍浮南北後因黃中爲害復歸鄉邦 唐詩

恹惶勞梗泛 悽斷倦蓬飄

原犯霜露

適莽蒼

露以逞君心 莊

人部

自盜負凶美三下

行旅

五

子曰適莽蒼者三餐而返腹猶
不知期 必有方 詩

子然莽蒼近郊貌果然飽也
語于役不知其期曷至哉 論
不齎糧 有行色 鄭

莊事詳行旅二 悲故鄉 窮日力 古詩日暮途且
古詩車馬有行色 遠遊子悲故鄉

之力而後宿 行人彭彭 征夫捷捷 詩汶水湯湯行
多也 又四牡 焚次喪僕 懷安敗名 易旅焚其次

業業征夫捷捷 鴻旅于溜 婦歎于室 後鴻旅于溜歸不
左傳懷與 安實敗名 胡為乎中露 齊人歌曰魯人

式微之詠 高蹈之歌 詩式微式微胡不歸微君之故
之臯數年不覺使我 忽如遠客 增 各在天涯 古詩

高蹈高蹈謂遠行也 原于橐于囊 不日不月 月
天地間忽如遠行客 又各在天一涯

捷之勞 秋蓬之轉 詩豈敢定居一月三捷
古者觀轉蓬為車

捷之勞 秋蓬之轉 詩豈敢定居一月三捷
古者觀轉蓬為車

捷之勞 秋蓬之轉 詩豈敢定居一月三捷
古者觀轉蓬為車

增 匹馬

孤舟 殘茶冷酒 鄭谷倦客詩十年五年岐路中于里

悶阻春江風 李白詩朝遊九城陌肥馬香 敝裘羸

車欺殺客暮宿 五侯門殘茶冷酒愁殺人

馬 店月橋霜 唐張籍行路難湘東行人長歎息十年

飢少筋力君不見牀頭黃金盡壯士無顏色龍蟠泥中

未有雲不能生彼升天翼 溫庭筠商山早行詩晨起

動征鐸客行悲故鄉雞聲茅店月人跡板橋霜 餽

葉落山路 枳花明驛牆因思杜陵夢 鳧雁滿迴塘

金為贖 貸錢為資 孟子曰當在宋也子將有遠行行

之燕貸百錢為資及得富貴以 贖辭曰餽贖 戰國蘇秦

百金償之 徧報諸所嘗見德者 沐雨櫛風 飛雲滯

月 文選櫛風沐雨多在道路 李 傾蓋而語 班荆

與言 家語孔子之郊遭程子於途傾蓋而語終日甚相

與聲子善伍舉奔鄭聲子遇之 挾書萬里 仗劍三

於鄭郊班荆相與食而言復故

人部 南監頁心卷三十一 行旅

年揚載詩挾書萬里朝明
主仗劔三年別故鄉

行旅四

原 辭邦 去里 道長 吳王謂季孫曰國君道長大夫不出門何謂也注謂長於道路

道敞 **增** 脂牽 詩載脂載牽還車言邁 辨裝 夔勝傳曰賜祿秩以辨裝

夙駕 詩星言夙駕 周行 楚辭征夫勞于周行 跋履 左傳跋履山川踰越險阻

蜷局 楚辭僕夫悲于懷兮馬蜷局而不行 行色 莊子曰今者闕然數日不見車馬有行色

行程 楊誠齋詩到家失却行 蘭足 劉禹錫曰蘭足于里 回頭

誠齋詩知道望鄉看不見也須一步一回頭 船上下 人南北波間交語

船上馬頭 崎嶇峽 熨帖波 誠齋詩行盡崎嶇峽初逢熨帖波

支離飄泊 杜甫詩支離東北風塵 投郵問店 陳陶詩

際飄泊西南天地間

野水問店
隔荒山

原不遑起處

靡所底戾

四方之志

萬里之游

每懷靡及

匪居則寧

朝冒霧露

晝

披塵埃

登山臨水

楚辭曰悲哉秋之為氣也膠慄兮若在遠行登山臨水送將歸

膏車秣馬

韓文膏吾車兮秣吾馬

羈旅之臣

左傳羈旅之臣幸若獲宥

羈旅之情

西征賦遠行有羈旅之情

徑泥林霧

劉子翬詩徑泥黃染屢林霧白侵衣

橋穿石滑

范成大詩魂驚版橋穿足側石子滑

趁鳥下灘

誠齋詩岸中獨立東

風裏眼趁鳥離下急難

飛絮送行

又詩柳絮絆船知不住却教飛絮送儂行

車殆

馬煩

洛神賦曰日既西傾車殆馬煩

蒙霜沐雨

淮南王傳蒙霜露沐風雨

草草

勞人

縣縣遠道

張耒詩草草勞人常少睡縣縣遠道苦無情

古古今今

路

朝朝暮暮行

唐庚詩

原口倦乎叱咤

手苦乎嚮

人部

行旅

箠

夏為大暑暴炙

冬為寒風偃薄

增行色秋將

晚

交情老更新杜甫詩

客舍盈尊酒

江行滿篋詩

韋應物詩

稍聽鄰船語

初分異土言

梅堯臣詩

我行日亦

行

日歸我未歸

楊萬里詩

行旅五

原

詩古詩曰驅車遠行役悠悠涉長道四顧何茫茫東

風搖百草所遇無故物焉得不速老

增

又曰橐砧今

何在山上復安山何時大刀頭破鏡飛上天

原

魏文

帝詩曰漫漫秋夜長烈烈北風涼展轉不能寐披衣起

彷徨俯視清水波仰看明月光鬱鬱多愁思縣縣思故

鄉願飛安得翼欲濟河無梁 又於明津作詩曰遙遙

山上亭皎皎雲間星遠望使心懷遊子戀所生驅車出

北門遙望河陽城 曹植雜詩曰悠悠遠行客去家千

餘里出亦無所之入亦無所止浮雲翳日光悲風動地

起 又曰游魚潛淶水翔鸞薄天飛始出嚴霜結今來

白露晞 阮瑀詩曰臨川多悲風秋日苦清涼客子易

為戚感此用哀傷攬衣起躑躅上觀心與房三星守故

次明月未收光雞鳴當何時朝晨尚未央還坐長歎息

憂憂安可忘 又曰我行自凜秋季冬乃來歸置酒高

堂上友朋集光輝念當復離別涉路險且夷思慮益惆

張淚下霑裳衣

晉張協詩曰述職投邊城羈束戎旅

間下車如昨日望舒三五圓流波戀舊浦行雲思故山

晉陸機赴洛詩曰總轡登長路嗚咽辭密親借問子

爲何世網嬰吾身永歎遵北渚遺思結南津 又曰遠

遊越山川山川修且廣振策陟崇丘按轡遵平莽夕息

抱景寐朝徂銜思往 又尸鄉亭詩曰東遊觀鞏洛道

遙丘墓間秋草蔓長柯寒木入雲煙發軫有夙晏息駕

無愚賢 湛方生還都帆詩曰高岳萬丈峻長湖千里

清白沙窮年潔林松冬夏青水無暫停流木有千年貞

寤言賦新詩忽忘羈客情 成公綏詩曰洋洋熊耳流

巍巍伊闕山高岡碣崔嵬雙阜夾長川素石何磷磷水
禽何翩翩遠涉許潁路顧思邈縣縣鬱陶懷所親引領
情緬然陶潛赴假還江陵夜行塗口作詩曰閒居三
十載遂與塵事冥詩書敦宿好園林無俗情扣枻新秋
月臨流別友生涼風起將夕夜景湛虛明宋謝靈運
七里瀨詩曰孤客傷逝湍徒旅苦奔峭石淺水潺湲日
落山照曜又初往新安桐廬口詩曰感節良已深懷
古亦云思不有千里擢孰伸百代意既及冷風善又即
秋水駛江山共開曠雲日相照媚景夕羣物清對玩咸
可喜又夜發石關亭詩曰隨山踰千里浮谿將十夕

鳥歸息舟楫星闌命行役亭亭曉月映泠泠朝露滴
鮑昭從臨海王西鎮發新亭詩曰客行有苦樂但問客
何行攀龍不待翼附驥絕塵冥梁珪分楚牧羽鶴指全
荆狐兔懷窟志犬馬戀主情 又登黃鵠圻詩曰適郢
無東轅過夏有西浮三崖隱丹墜九派引蒼流淚竹感
湘別荆珠懷漢遊 齊孔稚圭旦發青林詩曰孤征越
清江遊子悲路長二旬倏已滿三千眇未央草雜今古
色巖留冬夏霜寄懷山中舊舉酒莫相忘 劉瓛上湘
度琵琶磯詩曰茲山挺異萼孤起秀雲中陂池激楚浪
紛紜絕宛風煙峰晦如畫寒水清若空頡頏鷗舞白流

亂葉飛紅。梁元帝經巴陵行部伍詩曰涉江望行旅
金鉦間綵旂水際含天色虹光入浪浮柳條恒拂岸花
氣盡熏舟叢林多故社單成有危樓。范雲述行詩曰
振策出燕代驅車背朔并翩翩朱蓋轉蕭蕭良馬鳴
江洪詩曰日沒風光靜遠山深無雲潮落晚洲出浪罷
沙成文挾琴上高岸望月彈明君去家未千里斷絕怨
離羣。吳均酬鮑畿詩曰振櫂出江湄依依望九疑欲
謁蒼梧帝過問沅湘姬折荷縫作蓋落羽紡成絲吾行
別有意不爲君道之。又憶費昶詩曰皎皎日將上獵
獵起微風山沒清波內帆在浮雲中直趨珠星北斜開

碧海東故人若思我當念離根蓬中又使廬陵詩曰悵

然不自悟端憂坐漠漠風急雁毛斷冰堅馬跡落客子

飢寒多江上衣裝薄何當報恩罷驅車還北郭王僧

孺中川長望詩曰長川杳難即四望四無極安流寧可

值憤風方未息危帆渡中懸孤光巖下仄岸際樹難辨

雲中鳥易識莫恨東復西誰知迂且直故鄉相思者當

春愛顏色獨寫千行淚誰同萬里憶何遜度連圻詩

曰客子行行倦年光處處華石蒲生促節巖樹落高花

金又還渡五洲詩曰睠言還九派迴艫出五洲蕭散煙

霞晚淒清江漢秋沙汀暮寂寂蘆岸夕修修又富陽

浦口和朗上人詩曰客心愁日暮徙倚空望歸山煙斂
樹色江水映霞輝獨鶴凌風逝雙鳧出浪飛故鄉千餘
里茲夕寒無衣 劉孝儀帆渡吉陽洲詩曰揚帆乘浪
華噪鼓揚風力近樹倏而遐遙山俄已逼欲比驚龍掣
將頓陽鳥翼客行悲道遠唯須前路極 劉孝威晚渡
吉陽洲詩曰江潮凌晚急鉦鼓候晨催幸息榜人唱聊
望高帆開聯村倏忽盡循汀俄頃迴疑是傍洲退似覺
前山來將與圖南競誰云勞泝洄 劉孝標月半夜泊
鵲尾詩曰客行三五夜息櫂隱中洲月光隨浪動山影
逐波流 虞騫尋沈剡夕至嘍亭詩曰命楫尋嘉會信

次歷山原捫天上雲，紉攀石下雷。奔澄潭，寫度鳥空嶺。
應鳴猿，榜歌唱將夕。商子處方昏。王筠遊望詩曰：晨

登黃馬坡，遙望白龍堆。風威晝撩折，路險車輪摧。朱

超泊巴陵詩曰：月夜三江靜，雲霧四邊收。淤泥不通挽

寒浦，劣容舟迴。風折長草，輕冰斷細流。古邨空列樹，荒

戍久無樓。庾肩吾舟中寒望詩曰：日暮敞鳧舟，層冰

合駛流。雪照齊君履，寒入楚王裘。陳陰鏗和傅郎歲

暮還湘洲詩曰：蒼茫歲欲晚，辛苦客方行。大江靜猶浪

扁舟獨，且征棠。枯絳葉盡蘆，凍白花輕。戍人寒不望沙

禽迴，未驚湘波各深淺。空軫念歸情。又晚泊五洲詩

曰客行逢日暮結纜晚洲中戍樓因巖險邨路入江窮
水隨雲渡黑山帶日歸紅遙然一柱觀欲輕千里風

又夜發詩曰夜江霧裏闊新月迴中明溜舫唯識火驚
鳧但聽聲勞者時歌榜愁人數問更周王褒始發宿

亭詩曰送人亭上別被馬樞中嘶漠漠邨煙起離離嶺
樹齊落星侵曉沒殘月半山低又和越王途中詩曰

飄飄映車幕出沒望連旗度雲還翊陣迴風即送師峽
路沙如月山峰石似眉邨桃拂紅粉岸柳被青絲錦城
遙可望迴鞍念此時北齊庾信詩曰飛蓬損腰帶秋

鬢落容顏寄言舊相識知余生入關
增周顏之推從

周入齊夜渡砥柱詩曰俠客重艱辛夜出小平津馬色
迷關吏雞鳴起戍人露鮮華劔彩月照寶刀新問我將
何去北海就孫賓 唐王勃易陽早發詩曰飭裝侵曉
月奔策候殘星危閣尋丹嶂回梁屬翠屏雲間迷樹影
霧裏失峰形復此涼颼至空山飛夜螢 駱賓王途中
有懷詩曰睠然懷楚奏悵矣背秦關涸鱗驚照轍墜羽
怯虛彎素服三川化烏棗十上還莫言無皓齒時俗薄
朱顏 沈佺期十四時常從巫峽過他日偶然有思詩
曰小度巫山峽荆南春欲分使君灘上草神女館前雲
樹悉江中見猿多天外聞別來如夢裏一想一氛氲

又從崇山向越當詩曰朝發崇山下暮坐越當陰西從
杉谷度北上竹溪深竹溪道明水杉谷古崇岑差池疑
不合繚繞復相尋桂葉藏金嶼藤花閉石林天窗虛的
的雲竇下沈沈造化功偏厚真仙迹每臨豈徒探怪異
聊欲緩歸心 張說蜀道後期詩曰客心爭日月來往
預期程秋風不相待先至洛陽城 王維陽關唱曰渭
城朝雨裊輕塵客舍青青柳色新勸君更盡一杯酒西
出陽關無故人 孟浩然夜渡湘江詩曰客行貪利涉
夜裏渡湘川露氣聞芳杜歌聲識采蓮榜人投岸火漁
子宿潭煙行旅遙相問潯陽何處邊 又旅行欲泊宣

州界詩曰西塞沿江鳥南陵問驛樓湖平津渡關風止
客帆收去去懷前浦茫茫泛夕流石逢羅刹礙山泊敬
亭幽火熾梅根渚煙迷楊柳洲離家復水宿相伴賴江
鷗又自洛之越詩曰遑遑三十載書劍兩無成山水
尋吳越風塵厭洛京扁舟泛湖海長揖謝公卿且樂杯
中酒誰論世上名杜甫發同谷縣詩曰賢有不黔突
聖有不暖席況我飢愚人焉得尚安宅始來此山中休
駕喜地僻柰何迫物累一歲四行役忡忡去絕境杳杳
更遠適停驂龍潭雲迴首白崖石臨岐別數子握手淚
再滴交情無舊深窮老多慘戚平生嬾拙意偶值棲遁

跡去住與願違仰慙林間翮又詩曰洪波忽爭道岸
轉異江湖鄂渚分雲樹衡山引舳艫邵平先入漢張翰
復歸吳莫怪啼痕數危檣逐夜鳥又詩曰夜醉長沙
酒曉行湘水春岸花飛送客檣燕語留人李白夜宿
牛渚詩曰牛渚西江夜青天無片雲登舟望秋月空憶
謝將軍余亦能高詠斯人不可聞明朝挂帆席楓葉落
紛紛綦毋潛早發上東門詩曰十五能行西入秦三
十無家作路人時命不將明主合素衣空染洛陽塵
祖詠過鄭曲詩曰路向滎川谷晴來望盡通細煙生水
上圓月在舟中岸勢迷行客秋聲亂草蟲旅懷勞自慰

浙浙有涼風

常建泊舟盱眙詩曰泊舟淮水次霜降

夕流清夜久潮侵岸天寒月近城平沙依鴈宿候館聽

雞鳴鄉國雲霄外誰堪羈旅情

郭向途中口號詩曰

抱玉三朝楚懷書十上秦年年洛陽陌花鳥弄歸人

岑參奉和杜相公初發京城詩曰按節辭黃閣登壇戀

赤墀銜恩思報主授律遠行師野鵲迎金印郊雲拂畫

旗叨陪幕中客敢和出車詩

張繼楓橋夜泊詩曰月

落烏啼霜滿天江楓漁火對愁眠姑蘇城外寒山寺夜

半鐘聲到客船

盧綸江行次武昌縣詩曰客寄五湖

間扁舟往復還年年生白髮處處上青山去國空知遠

安身竟不開更悲江畔柳長是北人攀 又晚次鄂州
詩曰雲開遠見漢陽城猶是孤帆一日程估客晝眠知
浪靜舟人夜語覺潮生三湘愁鬢逢秋色萬里歸心對
月明舊業已隨征戰盡更堪江上鼓鼙聲 韓偓尤溪
道中詩曰水自潺湲日自斜盡無雞犬有鳴鴉千邨萬
落如寒食不見人煙空見花 李商隱詩曰君問歸期
未有期巴山夜雨漲秋池何當共翦西窗燭却話巴山
夜雨時 戴叔倫宿灌陽灘詩曰十月江邊蘆葉飛灌
陽灘冷上舟遲今朝未遇高風便還與沙鷗宿水渚
賈宗旅泊江津言懷詩曰征途幾迢遞客子倦西東乘

流如泛梗逐吹似驚蓬飄飄萬里外辛苦百年中異縣
心期阻他鄉風月同雲歸全嶺暗日落半江紅自然堪
迸淚非是泣途窮 衛葉晚投南邨詩曰客行逢日暮
原野散秋暉南陌人初斷西林鳥盡歸暗蓬沙上轉寒
葉月中飛邨落無多在聲聲近擣衣 李端曉發瓜洲
詩曰曉發悲行客橈停獨未前寒江半有月野戍漸無
船棹唱離南岸鴻嘶發遠田誰知避徒御對酒一潸然
歐陽詹自淮中却赴洛途中詩曰惆悵策疲馬孤蓬
被風吹昨東今又西冉冉長路岐歲晚樹無葉夜寒霜
滿枝旅人恒辛苦冥冥天何知 又晨裝行曰邨店月

西入山枝鴨鵝聲求燈徹夜席束囊事晨征寂寂人常
眠悠悠天未明豈無偃息心所務前有程 劉禹錫途
中早發詩曰中庭望啓明促促事晨征寒樹鳥初動霜
橋人未行水流白煙起日上彩霞生隱士應高枕無人
問姓名 姚合客行詩曰客行無定處多在路岐間馬
是賒來貴僮緣借得頑詩書愁觸兩店舍喜逢山舊業
嵩山下三年不得還 于武陵南遊有感詩曰杜陵無
厚業不得駐車輪重到曾遊處多非舊主人東風千里
樹西日一洲蘋又渡湘江水湘江水復春 又西歸詩
曰不繫與舟閑悠悠吳楚間羞將新白髮却到舊青山

一葉忽離樹幾人同入關長安有家住秋至又西還

又早春山行詩曰江草暖初綠雁行皆北飛異鄉那久
客野鳥尚思歸十載過如夢素心應已違行行家漸遠
更苦得書稀 又客中詩曰楚人歌竹枝遊子淚霑衣
異國久爲客寒宵頻夢歸一封書未返千樹葉皆飛南
過洞庭水更應消息稀 賈島早行詩曰早起赴前程
鄰雞尚未鳴主人燈下別羸馬暗中行蹋石新霜滑穿
林宿鳥驚遠山鐘動後曙色漸分明 劉得仁早行詩
曰萬類半已動此心寧自安月沈平野盡星隱曙空殘
馬渡橫流廣人行湛露寒還思猶夢者不信早行難

許渾早發洛中次甘水詩曰帶月飯行侶西遊關塞長
晨雞鳴遠戍宿雁起寒塘雲卷四山雪風凝千樹霜停
驂一迴首隱隱見嵩陽

姚鵠曉發詩曰旅行宜早發

況復是南歸月影綠山盡鐘聲隔水微殘星螢共失落
葉鳥和飛去去度南曉邨中人出稀

趙嘏旅次高山

詩曰役役依山水何曾似問津斷崖如避馬芳樹欲留
人日夕猿鳥伴古今京洛塵一枝甘已失辜負故園春

劉駕早行詩曰馬上續殘夢馬嘶時復驚心孤多所

虞僮僕近我行棲禽未分散落月照古城莫羨閑居者
溪邊人已行

司空圖江行詩曰初程風信好迴望失

津樓日帶潮聲晚煙含楚色秋戍旗當遠客島樹轉驚
鷗此去非名利孤帆任白頭 崔塗巴山道中除夜書
懷詩曰迢遞三巴路羈危萬里身亂山殘雪夜孤燭異
鄉春漸與骨月遠轉於僮僕親那堪正漂泊明日歲華
新 又途中感懷詩曰久客厭岐路出門吟且悲平生
未到處落日獨行時芳草長不綠故人無重期那堪更
南度鄉國已天涯 張喬商山道中詩曰春去計秋期
長安在夢思多逢山好處少值客行時雲起爭風勢花
交隱澗枝停驂一惆悵應祇嶺猿知 又荆楚道中詩
曰前程曾未到岐路擬何爲返照行人急荒郊去鳥遲

春宵多旅夢閨夏遠相期處處牽愁緒無窮是柳絲

又吳江旅次詩曰行人愁落日去鳥倦遙林曠野鳴流水空山響暮砧旅途歸計晚鄉樹別年深寂寞逢邨酒

漁家一醉吟

羅鄴早發詩曰一點殘燈魯酒醒已攜

孤劒事離情愁看飛雪聞雞後獨向長空背雁行白草

近關微有路濁河連底凍無聲此中來往本迢遞況是

驅羸客塞城

又行次詩曰終日長程復短程一山行

盡一山青路傍君子莫相笑天上由來有客星 又詩

曰花開只恐看來遲及到愁如未看時家在楚鄉身在

蜀一年春色負歸期

杜荀鶴秋江夜泊詩曰一望一

蒼然蕭騷起暮天遠山橫落日歸鳥度平川家是去年
別月當今夜圓漁翁似相伴徹曉葦蕩邊 又早發詩

曰東窗未明塵夢蘇呼僮結束登征塗落葉鋪霜馬蹄
滑寒猿哭月人心孤時送帽檐風刮頂旋呵鞭手凍粘
鬚青雲伎活一未見爭得安閒釣五湖 又舟行即事

詩曰年少髭鬚雪欲侵別家三日幾般心朝隨商客憂
風色夜逐漁翁宿葦林秋水鷺飛紅蓼晚暮山猿叫白
雲深重陽酒熟茱萸紫却向江頭倚櫂吟 王貞白隨

計詩曰徒步隨計吏辛勤鬚易凋歸期無定日鄉思羨
迴潮冒雨投前驛侵星過斷橋何堪穆陵路霜葉更蕭

蕭 羅隱早行詩曰北去南來無定居此生生計竟何
如酷憐一覺平明睡常被鄰雞半夜啼 宋梅堯臣早
發大信口詩曰犬吠知船解邨墟尚閉門霜泥粘纜尾
冰水閣潮痕撇撇鷓鴣去纖纖舡艫昏梅湖到不遠寄
信向田園 又將赴表臣會呈杜挺之詩曰莫怪去遲
遲予心君亦知膝前嬌小女眼底寧馨兒學語渠渠問
牽裳步步隨出門雖不遠情愛未能移 孔武仲舍轎
馬而步詩曰嚴風駕雪霜吾轎頗溫燠白日暖郊原吾
馬悽馳逐二者皆得用翩如兩黃鵠馬驕倦提策轎狹
厭攀束何以救斯弊奔馳有吾足副之兩革靴隨以一

筇竹鳧趨上高岡虎步出平陸折花得低枝照影臨深
谷道逢田間叟時訪以耕牧北音稍入耳俚語俄滿腹
行行及前堆小汗已霰霰芳草可爲茵吾眠不須褥人
生忌太佚終歲居華屋醉飽耳目昏軟煖筋骸縮今吾
異於此千里干微祿朝隨麇麇騁夜侶鴻雁宿戶樞勞
乃久金礦鍛方熟聊歌以自娛不作楊朱哭 孔平仲
雍丘驛作曰京塵漠漠稍侵衣秣馬雍丘日未西驛舍
蕭然無與語遠牆閒覓故人題 王安石江寧夾口詩
日落帆江口月黃昏小店無燈欲閉門側出岸沙風半
死繫船應有去年痕 蘇軾八月七月初入贛過惶恐

灘詩曰七千里外二毛人十八灘頭一葉身山憶喜歡
勞遠夢地名惶恐泣孤臣長風送客添帆腹積雨扶舟
減召鱗便合與官充水手此生何止略知津 又題重
湖詩曰八月渡重湖蕭條萬象疎秋風片帆急暮靄一
山孤許國心猶在康時術已虛岷峨千萬里投老得歸
無 又過嶺寄子由詩曰七年來往我何堪又試曹溪
一勺甘夢裏似曾遷海外醉中不覺到江南波生濯足
鳴空澗霧繞征衣滴翠嵐誰遣山雞忽驚起半巖花雨
落珍珍 陳師道過杭留別曹無逸朝奉詩曰陳蕃解
榻爲留連俯仰徒驚歲月遷故意斯人柰風雨多情於

我獨山川可憐顏貌非前日依舊窮愁似去年後夜相

思隔煙水夢魂空寄過江船又馬上口占呈立之詩

白廉纖小雨濕黃昏十里塵泥不受辛轉就鄰家借油

蓋始知公是最閒人文同晚泊金牛詩曰一襟初覺

晚霜清短鞵垂頭任馬行斜日斂回疎木影急風收斷

落泉聲望窮好景番番別題徧新詩闕闕精終是教人

伏潘令許多才調賦西征張耒自巴河至蘄陽口道

中得詩曰落葉娟娟墜半環嘔啞鳴櫓轉荒灣東南地

缺天連水春夏風高浪卷山旅食每愁邨市散近秋已

覺暑衣單自慙老病心兒女三日離家已念還范鎮

詩曰南來十日盡山行北去前驅野稍平邊日照人如
月色野風吹草似泉聲周必大舟行憶永和兄弟詩
曰一挂吳帆不計程幾回繫纜幾回行天寒有日雲猶
凍江闊無風浪自生數點家山常在眼一聲寒雁正關
情長年忽得南來鯉恐有音書作急烹朱熹山行兩
日至金步復見平川行夷路計程七日可到家矣詩曰
行穿仄徑度荒山又蹋深泥過野田路轉忽然開遠望
眼明復見此平川江煙浦樹悲重疊楚水閩山喜接連
稅駕有期心轉迫稜稜瘦馬不勝鞭范成大長安聞
詩曰吾觀舟中子一一皆可哀大爲聲利驅小者飢寒

催古今共來往所得隨飛灰我乃羈旅人胡爲乎哀哉
又早發竹下詩曰結束晨裝破小寒跨鞍聊得散疲
頑行衝薄薄輕輕霧看放重重疊疊山碧穗炊煙當樹
直綵紋溪水趁橋灣清禽百轉似吟客正在有情無思
間 又自寧國溪行至宣城詩曰波驚石險夜喧雷晚
泊旗亭笑眼開休問行人緣底瘦適從百八十灘來

陸游望江道中詩曰吾道非邪來曠野江濤思此欲
何之起隨烏鵲初翻後宿及牛羊欲下時風力漸添帆
力健櫓聲常雜雁聲悲晚來又入淮南路紅樹青山合
有詩 又將離江陵詩曰莫莫過渡頭旦旦走隄上舟

人與關吏見熟識顏狀癡頑久不去常恐遭誚讓昨日
倒檣干今日聯百丈買薪備雨雪儲米滿餅盎明當遂
去此障袂先側望 又馬上詩曰殘年流轉似萍根馬
上傷春易斷魂烘煖花無經日藥漲深水過去年痕迷
行每問樵夫路投宿時敲竹寺門不信太平元有象牛
羊點點散煙邨 楊萬里考試河南漕司南歸值雨詩
曰我亦知我生有涯長將病骨抵風沙天寒短日仍爲
酒日暮長亭未是家又苦征夫催去去更甘飛雨故斜
斜舊聞行路令人老便恐霜花一半加 又詩曰園花
落盡露花開白白紅紅各自媒莫問早行奇絕處四方

八面野香來。又夜離零陵以避同寮追送之勞留簡
諸友詩曰思歸日日只空言一棹今真水月間半夜猶
聞郡樓鼓明朝應失永州山。又泊泠水浦詩曰前夕
放船湘口步約到衡州來日午五程一減作三程謝渠
江漲半篙清今日雨來三四五又閉疎篷聽暮雨長年
商量泊舟所雨外青山更青處。又庚子正月五日曉
過大臯渡詩曰霧外江山看不真只憑雞犬認前邨渡
船滿版霜如雪印我青鞋第一痕。又舟過謝潭詩曰
夾岸百里沒人家最苦江流曲更斜嶺草已青今歲葉
岸蘆猶白去年花。又清明日欲宿石門未到而風雨

大作泊靈星小海詩曰一生行路竟如何樂事還稀苦
事多知是風波欺客子不知客子犯風波 又下橫山

灘望金華山詩曰篙師只管信船流不作前灘水石謀
却被驚湍旋三轉倒將船尾作船頭 又丹陽舍舟登

陸渡江詩曰小泊樓船鐵甕城匆匆又作絕江行看他
蠟燭幾回翦聽盡雞聲不肯明水底霜寒還十倍夜來
月上恰三更篙師好事君知否江面侵晨鏡樣平 又

過松源晨炊漆公店詩曰莫言下嶺更無難賺得行人
錯喜歡正入萬山圈子裏一山放出一山攔 又四更

發青陽縣西五里柯家店詩曰轎中萬兀路千縈死盡

邛雞無一鳴落月正明知未曉暗泉甚遠只聞聲自綠
客子行來早豈是秋天不肯明午熱未來先下店却將
晝睡補宵征 又道中紀行詩曰君看人跡蝶來輕
得林間路作坑古路今人行不得一時移上上頭行

黃公度冬日道間詩曰歲熟牛羊飽邛寒鳥雀呼霜餘
山骨露水落澗毛枯歸艇收漁網行人問酒壚微軀任
南北未覺旅懷孤 又道間即事詩曰花枝已盡鶯將
老桑葉漸稀蠶欲眠半濕半晴梅雨道乍寒乍暖麥秋
天邛壚酤酒誰能擇郵壁題詩盡偶然方寸怡怡無一
事麤裘糲食地行仙 劉克莊湘中口占詩曰船頭吹

火盧仝婢馬後肩書類士奴安得世間名畫手寫子出
嶺泛湘圖 方岳道中即事詩曰十月山寒雨不休僕
其痛矣得無愁老夫自愛歸程好肯爲春泥怨鶉鳩

元趙孟頫題秋山行旅圖詩曰老樹葉如雨浮嵐翠欲
流西風驢背客吟斷野橋秋 陳孚越上早行詩曰青

鞋三十里草露惹衣斑潮落曹娥渡雲昏夏禹山秋聲

黃葉裏天影白鷗間欲問錢塘路漁家半掩關 薩都

刺登金山雄跨亭詩曰朱欄六曲倚高秋元氣茫茫日
夜浮客去客來天地老潮生潮落古今愁疎鐘水國前
朝寺落日海門何處舟更擬黃昏盡餘興却從燈火望

揚州

貢奎郊行詩曰雙溪溪上路重到五年遲桑柘

成陰處鶯花向老時泊舟隨岸曲坐石看雲移政愛沙

鷗狎驚飛底見疑

何中早發東阿午經東平晚宿汶

上是日雪詩曰嚴裝齊地曉投館魯鄉暮天寒客心速

雪下車聲去迷獸出桑畦流人披野路淺靄須城山斜

橋汶津樹前聖有遺業惆悵經行處荷蓀與耦耕何其

得深趣

楊奐宿南石橋詩曰江流入乎楚山勢繞連

秦岸柳猶含凍溪花欲破春石銜車轍古沙印虎蹄新

晚境長爲客空山不見人

劉承之經湖口縣詩曰古

縣開湖口高檣集岸隈山從廬阜起江向武昌來近水

皆楊柳荒城半草萊客心元自速更遣曉風催
戴良

營丘詩曰空壕廢堞繞營丘一望淒然使我愁賜履封
侯千古在尋盟霸業此時休鴉啼古木西膠暮雁落平
蕪北海秋回首江南萬餘里異鄉如此若為留
黃鎮

成舟過石門梁安峽詩曰書畫船頭載酒迴滄洲斜日

隔風埃一雙白鳥背人去無數青山似馬來天際兩帆

梁峽出水心雲寺石門開同遊有客如高季授簡惟慙

賦峴臺 又東陽道中詩曰出谷蒼煙薄穿林白日斜

岸崩迂客路木落見人家野碓喧春水山橋枕淺沙前

邨烏柏孰疑是早梅花 高克恭過信州詩曰二千里

地佳山水無數海棠官道傷風送落紅攬馬過春光更
比路人忙 明林環盧溝詩曰疎星寥落曉寒淒月色
沙光入望迷野戍連雲微見雁人家隔水遠聞雞波間
素影涵林淨天外清暉映樹低馬上曾驚殘夢斷鐘聲
遙度禁城西 李夢陽赴懷玉山詩曰始臨清溪寺不
謂茲路艱崎嶇踰南嶺轉見山鬱盤重陰起北谷凍雨
響前巒志定邁孰禦勇往竟孤攀挽葛接懸狖架木凌
飛湍律律巖壑變颯颯嵐風寒隔港望絕岫亭亭已雲
端 楊慎行旅詩曰行旅苦日短勞人知路遙忽忽歲
云暮客心中摇摇曠野積寒氣四望俱寂寥嚴霜下豐

草朔風鳴枯條浮雲起爲蓋堅冰結爲橋白日隱餘照
元陰晦層霄鳴轂無停輪嘶馬不解鑣飛鳥夕知還征
途何迢迢無以慰苦辛興言自成謠 文徵明閩門夜
泊詩曰閩闔城西暮雨收西虹橋下水爭流蒼茫野色
千山隱突兀寒煙萬堞浮燈火旗亭喧夜市月明歌吹
滿江樓烏啼不復當時境依舊鐘聲到客舟 沈一貫
章邨道中詩曰雪霽雲開一徑明花香日暖筍輿輕野
山歷歷皆人姓春鳥交交亦自名怪石滿溪驚駐馬東
風吹酒忽聞鶯種荅蒔藥邨邨好谷口何知有漢卿
喬世寧行役詩曰行役何倉皇登涉念徒御白日息虞

淵行子在中路杪秋多悲風搖落不可顧我非草與木
胡爲被霜露不辭霜露侵但恐歲云暮 馮惟訥春日
關山道中詩曰春色被蘭皋春風引使旄天光落澗小
山氣入雲高錦谷花爲幄飛泉雪作濤誰言九折坂叱
馭不辭勞 吳明卿寄王元美塞上詩曰王郎別我未
銷魂六傳飛揚出薊門鼓角秋聲迴地軸佩刀寒色照
天關馬肥首着黃金勒客醉蒲萄白玉尊回首中原風
雨過不知揮淚向誰論

原賦漢劉歆遂初賦曰歆好左氏春秋欲立於學宮時
諸儒不聽歆乃移書太常貢讓深切爲朝廷大臣所非

求出補吏後徙五原太守志意不得經歷故晉之域感

今思古遂作斯賦曰得元武之嘉兆守五原之烽燧馳

太行之巖

一作巖

防入天井之喬關望亭隧之皦皦飛旗

幟之翩翩迴百里之無家路修遠之縣縣勒障塞而固

守奮武靈之精誠據趙奢之策慮威謀完乎金城後

漢班彪北征賦曰紛吾去此舊都兮駢遲遲以歷茲遂

舒節以遠逝兮指安定以爲期飛雲霧之杳杳涉積雪

之皚皚遊子悲其故鄉兮心愴恨以傷懷攬余涕以於

邑兮哀生民之多故諒時運之所爲兮永伊鬱其誰訴

曹世叔妻班氏東征賦曰惟永初之有七兮余隨子

乎東征時孟春之吉日兮撰良辰而將行遂去故而就
新兮志愴恨而懷悲明發曙而不寐兮心惺惺而有違
亂曰君子之思必成文兮盍各言志慕古人兮 蔡邕
述行賦曰余有行於京洛遘淫雨之經時途屯遭其蹇
連潦汙滯而爲災聊弘慮以存古宣幽情而屬詞行遊
目以南望覽太室之威靈顧大河於北垠覩洛汭之始
并牽陵阿以登降赴偃師而精勤壯田橫之奉首義一
士之夾墳 魏崔琰述初賦曰琰性頑口訥至二十九
粗閱書傳聞北海有鄭徵君者當世名儒遂往造焉道
田齊都而作述初賦曰有鄭氏之高訓吾將往乎發矇

洒余髮於蘭池振余珮於清風望高密以亟征戾衡門
而造止覲游夏之峨峨聽大猷之篇記高洪崖之耿介
羨安期之長生登山川以永望臨洞浦之廣溟左揚波
於暘谷右濯岸於濛汜運混元以升降與三光而終始
蓬萊蔚其潛興瀛河崑以駢羅列金臺之蹇產方玉闕
之嵯峨 晉陸機行思賦曰背洛浦之遥遥浮黃川之
裔裔遵河曲以悠遠觀通流之所會啓石門而東滌汾
汴渠其如帶託飄風之習習冒沈雲之靄靄商秋肅其
發節元雲霈而垂陰涼風淒其薄體零雨鬱而下淫觀
川禽之遵渚看山鳥之歸林揮清波以濯羽翳綠葉而

弄音行彌久而情勞塗愈近而思深羨品物以獨感悲
綢繆而在心嗟逝官之永久年荏苒而歷茲越河山而
託景眇四載而遠期孰歸寧之弗樂獨抱感而弗怡
又思歸賦曰余以元康六年冬取急歸而王師外征職
典中兵與聞軍政懼兵革未息宿願有違懷歸之思憤
而成篇節運代序四氣相推寒風肅殺白露霑衣嗟行
邁之彌留感時逝而懷悲彼離思之在人恒戚戚而無
歡悲緣情以自誘憂觸物而生端晝輟食而發憤宵假
寐而興言羨歸鴻以矯首挹谷風而如蘭歲靡靡而薄
暮心悠悠而增楚風霏霏而入室響泠泠而愁予旣遨

遊於川沚亦改駕乎山林伊我思之沈鬱愴感物而增
深歎隨風而上逝涕承纓而下尋冀王事之暇豫庶歸
寧之有時候涼風而警策指孟冬而爲期願靈暉之促
景相立表以望之

潘岳西征賦曰歲次元枵月旅麤

賓潘子馮軾西征自京徂秦皇鑒揆余之忠誠俄令余

以末班牧疲人於西夏攜老幼而入關余乃越平樂過

街郵秣馬臯門稅駕西周澡孝水而濯纓嘉善名而在

茲登嶠坂之威夷仰崇嶺之嵯峨臯託墳於南陵文違

風於北阿躡函谷之重阻看天險之襟帶迹諸侯之勇

怯算嬴氏之利害或開關以延敵競遁逃而奔竄發閔

鄉而警策遡黃卷而濟潼眺華嶽之陰崖覲高掌之遺
蹤倦狹路之迫隘軌崎嶇以低仰蹈秦郊而始關豁爽
塏以宏壯黃壤千里沃野彌望華實芬敷桑麻條暢邪
界褒斜右濱汧隴寶雞前鳴甘泉後湧面終南而背雲
陽跨平原而連嶓冢九峻截薛太一龍從吐清風之颺
戾納歸雲之鬱蔚南有元灞素滻湯井溫谷北有清渭
濁涇蘭池周曲浸浹鄭白之渠漕引淮海之粟林茂有
鄠之竹山挺藍田之玉履犬戎之侵地疾幽后之詭惑
舉僞烽以沮衆淫嬖褒以縱慝軍敗戲水之上身死驪
山之北異哉秦始皇之爲君也傾天下以厚葬自開闢

而未聞匠人勞而弗圖俾生埋以報勤外惟西楚之禍
內受牧豎之焚語曰行無禮必自及此非效與乾坤以
有親可久君子以厚德載物觀夫漢高之興也非徒聰
明神武豁達大度而已乃實慎終追遠篤誠愛澤靡
不漸恩無不逮率土且猶不遺而況於鄰里乎而況於
卿士乎於斯時也乃摹寫舊豐制造新邑故社易置枌
榆遷立街衢如一庭宇相襲渾雞犬而亂放各識家而
競入籍含怒於鴻門沛跼躄而來王范謀害而未許陰
授劔以約莊搦白刃以萬舞危冬葉之待霜爾乃階長
樂登未央汎太液凌建章縈馭娑而款駘蕩輔朽詣而

輓承光徘徊桂宮惆悵柏梁鷺雉鳴於臺陂狐兔窟於
殿傍何黍苗之離離而予思之茫茫 郭璞流寓賦曰
戒雞晨而星發至猗氏而方曉觀屋落之隳殘顧但見
乎丘棗嗟城池之不固何人物之稀少越南山之高嶺
脩焦丘之微路駭斯徑之峻絕感王陽而增懼詰朝發
於解池辰中暨乎河北思此縣之舊名蓋曩日之魏國
詠諷人之流歌信風土之儉刻昔茲邑之迴逝何險難
之多歷望陝城於南涯存號氏之疆場實我姓之攸出
邈有懷乎乃迹陟函谷之高關壯斯勢之險固過王城
之丘墟想穀洛之合鬪惡王靈之壅流奇子喬之輕舉

遊華輦而永懷乃凭軾以寓目思文公之所營蓋成周
之墟域張載敘行賦曰歲大荒之孟夏余將往乎蜀
都脂輕車而秣馬循路軌以西徂朝發軔於京宇兮夕
余宿於穀洛踐有周之舊墟陟丘荒以寥廓贊王孫於
北門問九鼎於東郭實公且之所卜曷斯水之噴薄入
函谷而長驅歷新安之鹵阜行逶迤以登降陟二嶠之
重阻經欽岑之險巖想姬文之避雨出潼關以迴逝仰
華嶽之崔嵬勤大禹之疏導豁龍門之洞開舍予車以
步趾玩卉木之璀璨翳青青之長松蔭肅肅之高柞緣
阻岑之絕崖蹈偏梁之懸閣石壁立以切天岌岌隗其

欲落超陽乎而越白水稍幽夢以迴深乘重巒之百層
轉木末於九岑浮雲起於轂下零雨集於麓林上昭晰
以清陽下杳冥而晝陰聞山鳥之晨鳴聽林猿之夜吟
雖處者之所樂嗟寂寞而愁予心造劒閣之崇關路盤
曲以晻靄山崢嶸以峻狹仰青天其如帶兼習坎之重
固形東隘以要害豈乾坤之分域將隔絕乎內外 袁
宏東征賦曰惟吾生於末運託一葉於鄧林顧微軀之
眇眇若絕響之遺音壯公瑾之明達吐不世之奇策挫
百勝於崇朝靡雲旗於赤壁三光一舉而參分四海指
麾而中隔過武昌以逍遙登樊山以流眄訪遺老以證

往乃西鄂之舊縣曩有吳之初基升員丘而豹變爾乃
出桑落會通川背彭澤面長泉洲渚迢躡巖岫虛懸即
雲似嶺望水若天日月出乎波中雲霓生於浪間嗟我
行之彌留跨晦朔之倏忽風塞林而蕭瑟雲出山而逢
渤向孫氏之南面鑽靈龜以相土模豐鎬之制度寫河
洛之規矩經始郭郭築室葺宇金城萬雉崇墉百堵君
臣有章上下獲敘所以能三分天下而有其文武到吳
都以停舟覽閭闔之餘塵建修城以營郭引通流而發
津遠矣吳德舊邦惟新太伯被髮仲雍文身言偃以文
學遺風季札以讓國稱仁高節顯於華夏端委行乎海

濱

宋謝靈運歸塗賦昔文章之士多作行旅賦或欣

在觀國或怵在斥徒或述職邦邑或羈役戎陣事由於

外興不自己雖高才可推求懷未愜今量分告退反身

草澤經塗履運用感其心賦曰承百世之慶靈遇千載

之優渥匪康衢之難踐諒跬步之易局踐寒暑以推換

眷桑梓以緬邈褫簪帶於窮城返巾褐於空谷果歸期

於願言獲素念於思樂於是舟人告辦佇楫在川觀鳥

候風望景測圓背海向谿乘潮傷山悽悽送歸愍愍告

旋時旻秋之杪節天旣高而物衰雲上騰而雁翔霜下

淪而草腓舍陰漠之舊浦去陽景之芳蕤林承風而飄

落水鑑月而含輝發青田之枉渚逗白岸之空亭路威
夷而詭狀山側背而易形停余舟而淹留搜縉雲之遺
跡漾百里之清潭見千仞之孤石歷古今而長在經盛
衰而不易 鮑照遊思賦曰雲遙兮海衝上潮兮送風

秋水兮架浦涼煙兮冒虹暮氣起兮遠岸黑陽精滅兮
天際紅波茫茫兮無底山嶮嶮兮萬重舍堂宇之密親
坐江灑而為客對蒹葭之遂黃視零露之方白鴻晨驚
以響湍泉夜下而鳴石瞻荆吳之遠山望邯鄲之長陌
塞風馳兮邊草飛胡沙起兮雁揚翻雖燕越之異心在
禽鳥之同戚 齊謝朓思歸賦曰余菲薄以固陋受恩

靈而不訾拖銀黃之沃若剖金符之陸離舟未濟而河
廣途方遙而馬疲紛吾生之遊蕩彌一紀而歷茲自下
車於江海涉青春於是時睠崇芒而引領望大夏而長
思離曲街之委陋猶寤寐而見之余乃眷言興慕南眺
悠然將整歸轡願受一廛考華城之直陌相洛浦之廻
阡於是籬插芳槿門拂長楊檐桃春發窗竹夏涼晨露
晞而草馥微風起而樹香恒離居以歲月痛銷落而徒
傷 梁簡文帝述羈賦曰奉明后之霑渥將遠述於荆
楚歎雲霞之宥漫對江山之遙阻是時孟夏首節雄風
吹句晚解纜乎鄉津涕淫淫其若霰舟飄飄而轉遠顧

帝都而裁見遠山碧暮水紅日旣晏誰與同雲嵯峨而
出岫江搖漾而生風奉璽言而邁邁改余玉於江隈遵
陽塗而中正軫悲心其若頽引領京邑瞻望弗遠戀逐
雲飛思隨蓬卷觀江水之寂寥願從流而東反又阻
歸賦曰觀建國之皇王選能官於前古元帝慈而布教
豈齊聖而作輔伊吾人之固陋宅璇漢而自通躡九枝
而耀景總六翮而搏風屬元琰之啓異逢玉弩之相驚
頓天羅於八表騰雲驅於四溟發伏螿之雄氣耀策馬
之高星地邇朔場疆鄰北極隴樹饒風胡天少色上月
斜臨寒松遙直雲向山而欲斂雁疲飛而不息何愁緒

之交加豈樹萱與折麻聞繁鉦之韻冰聽流風之入笳
終知客遊之阻無解鄉路之賒 江淹待罪江南思北

歸賦曰惟江南兮丘墟經萬里兮長蕪帶封狐兮比景
連雄虺兮蒼梧當青春而離散方仲秋而遂徂雲清冷
而多緒風蕭條而無端猿之吟兮日光迴歎之啼兮月
色寒况北州之賤士爲炎土之流人共颺颺而相偶與
蟪蛄而爲鄰秋露下兮點劒舄春苔生兮綴衣巾

增

又去故鄉賦曰日色暮兮隱吳山之丘墟北風折兮絳
花落流水散兮翠葉疎愛桂枝而不見悵浮雲而離居
迺凌大壑越滄洲茫茫積水葳葳斷山窮陰匝海平蕪

帶天於是泣故關之已盡傷故國之無際出汀洲而解
冠入澗浦而捐袂聽蒹葭之蕭瑟知霜露之流滯對江
臯而自憂弔海濱而傷歲撫尺書而無悅倚尊酒而木
持去室宇而遠客遵蘆葦以爲期情嬋娟而未罷愁爛
漫而方滋切趙瑟以橫涕吟燕笳而坐悲

原

丘遲還

林賦曰爰自京師言歸舊嶺今風古轍每動寸衷因事
而書不覺成卷非謂爲文聊記行途所經爾太皞弭節
祝融聳駕炎鐘汎響青籥靜吹丘子稅轅畿路總舳川
湄褫魂故嶺結夢舊墀揆身世而載懷鏡古今而興辭
驗難停於楊轍昭易改於墨絲匪追舉而辨命豈適伊

而問著擔簦無白癖之想負書靡黑貂之悲纜解山潮
首顧京滙仰絳堞之紛迴與素津之容裔荃撓往來芟
蓋經過依稀子陵之釣髣髴滄浪之歌出入風霞游息
雲露階伺禽飛窗高月度踟躕七教徘徊五禮永翦帶
於關上長緝巾乎林底 沈約愍塗賦曰結榜窮渚思
臨長嶼情依舊越身經故楚彼長路之多端伊客心之
無緒懽因循而易失悲由心而難拒此江海之信遼知
余思之方阻日掩長浦風埽聯葭疊雲凝憤廣水騰華
聽奔沸於洲嶼望晦曖乎煙沙依雲邊以知國極鳥道
以瞻家免悽愴於羈離亦殷勤於行路歎余塗之屢蹇

奚前芳之可慕

張纘南征賦曰歲次姬訾月惟仲呂

余謁帝於承明將述職於南楚忽中川而反顧懷舊鄉
而延佇沂金牛之迅渚覩靈濤之雄壯標素嶺乎青嶷
蒼頰文於翠障跳巨石以驚湍批衝巖而駭浪鏟千尋
之峭峰深萬仞之大壑隱日月以蔽虧搏風煙而迴薄
崖映川而晃朗水騰光以倏鑠下流湍而洊險上岑崟
而將落於是近睇赭峰遙瞻鵲岸島嶼蒼茫風霜蕭散
值時雨之新晴觀百川之浩汗水泓澄以闇夕山參差
而辨旦忽臨睨於故鄉渺江天其無畔獨向風而舒情
蹇芳洲而誰玩於是千流共歸萬嶺分狀清江洗滌平

湖夷暢翻光轉彩出沒搖漾岷山蟠冢悠遠寂寥青溢
赤岸控汐引潮界飛流於翠薄耿長虹於青霄若夫灌
莽川涯曾潭水將游泳之所往還喧鳴之所攢聚聆寡
鶴之偏叫問孤鴻之慕侶在客行而多思獨傷魂而淒
楚 陳沈炯魂歸賦曰值天地之輻裂遭日月之霧虹
去父母之邦國埋形影於胡戎絕君臣而辭骨肉踏厚
地而跼蒼穹抱北思之胡馬望南飛之夕鴻泣露襟而
雜露悲微吟而帶風履峨峨之層冰面颼颼之嚴霜去
莫敖之所縊過臨川之折軸矧今古之悲涼並攢心而
露被渡狹石之敲危跨清津之幽咽雁虛弓而自隕猿

叫子而腸裂歷江漢之逶迤及樊郡之參差望隆中之
大宅映峴首之沈碑乃尋折而歷裔遂經秦而至洛覺
高蹈之清遠見風雲之倏鑠何武關之狹隘而漢祖之
英雄山萬重而仰雲霧水百仞而寫蜿蜒去青泥而踰
白鹿越滄水而至青門長卿之賦可想邵平之迹不存
咄嗟驪山之阜惆悵灞陵之園訪軹道之長組拾藍田
之璵璠登未央之北闕望長樂之基趾伊太后之所居
築旗亭而成市槐路鬱以三條方塗阻而九軌觀阡陌
之遺蹤實不乖於前史傍直城而北轉臨橫門而左起
泊涇泥之混濁盥渭渚之清波指咸陽而長望何李趙

之經過息甘泉而避暑猶爽塏而清和至誠可以感鬼
秉信可以祈天何精隕而魄散忽魂歸而氣旋解龍驂
而見送走却驛而停傳出向來之大道及初入之山川
受繞朝之贈策報李陵之別篇淚未悲而自隋語有噎
而無宣

增唐高適東征賦曰霜封野樹水凍寒苗岸

草無色蘆花自飄幸息肩於人事願投迹於漁樵思魏
闕而天遠向秦川而路遙候雞鳴以進帆趨亂流以爭
迅縱孤舟於浩大撫垂堂以誠慎 歐陽詹出門賦曰
出門辭家兮人有志而思遲余紛然以遠遊別天性之
至慈去人情之好仇嚴訓誡余以勿久指蒲柳以傷秋

弱室咨余以遄歸目女蘿而起愁心眷眷以纏繇淚浪
浪而共流惕懷安以敗名曾何可以少留於是驅忠信
以爲車執藝業以爲贄越三江踰五嶺望堯旌以求試
庶以程功取爵建德揚名獲甘旨以報勤光晝錦以迴
衡如弧斯張如鳥斯征射百步而期中飛三年而不鳴
蕭瑟天寒崢嶸歲晚鵲連翩而不定蓬悠揚而自轉逮
前程之尚遙顧所離而日遠事紛拏以爭校情交戾而
不和退藩籬則弱羽戀於雲路激龍門則纖鱗限乎尺
波身違日月之晨昏懷戀戀而莫遣親益年年之羸老
思搖搖而若何 又將歸賦曰憶求名於薄藝曾十稔

以別離纔還鄉以半齡又三年於路岐紅顏始長白日
如馳荏苒皆盡悠悠爲誰親有父母情有閨闈居惟苦
飢行加相思加相思兮寧苦飢辭家千里兮欲與偕歸
南陔之蘭北山之薇一芳一菲何是何非歸去來兮秋
露霑衣 宋沈括懷歸賦曰歸休乎嗟生亦勞兮歲常

九行而一息四方已莫不異兮欲終往而安即披荆榛
以孤鶩涉大塗之梗塞投孱顏以全入孰爲眠而朝食
馨歎一山而百折兮況千里之緜邈高浪鱗卷而電劃
兮近不保乎咫尺嗟乎子乘此而安之兮託扶搖以寸
翮 〇邢居實南征賦曰皇命之不可淹兮方仲春而

戒行惟甲子之良晨侍安輿而南征昔仲尼之去魯車
遲遲以淹留此雖非吾之舊邦兮猶慘慘而懷憂賓朋
肅駕而來餞兮班豆觴於水湄執余手以踟躕兮不覺
涕下而霑衣舟軋軋而不能前兮馬蕭蕭而反顧念長
路之超遠兮恐白雲之云暮敕僕夫使整駕兮遂奮袂
而辭去將發軔而回首兮望國門之穹崇唯小人之眷
戀兮情鬱結乎余衷經土山之盤紆兮入空谷之豁鴻
野曠蕩而無垠兮榛林蕭條而來風鹿呦呦以鳴羣兮
鳥嚶嚶而求友悵遑遑於中野兮徒悵悵其誰咎明
劉鳳送遠賦曰重忍情兮緘愛劇割念兮去家解分攜

今目前剽遙隔兮門限瞻馬首兮北河造羊腸兮九坂
俄燕吳兮異域倏萬里兮陘嶽冥驅塵兮策葦汎浴涉
兮載鳶陋繫匏兮株守從轉蓬兮茹連冷夕飈之起閨
子翛然而顧影寧惻愴於弱戀猶迴照於衣領眴睨佯
笑而設絕戚屬墜心而淒哽宥佚慙恩兮少年之場慷
慨徇知兮國士之請非竊慕兮何邀徒有銜兮欲逞輕
道里兮薛阮忘軀馳兮隱軫立然諾兮無侵奉慎忭兮
能隕朝未假於齋裝夕何遑於擔屨崒標劔以乍辭哀
蠶氣以灼爚穆姱節兮誕驕苞狄遐於伊邇視宇下以
未殊豈時往之覺駛表表北征賦曰涉徂冬以就役

遵修轍而遐征緬井甸之絡繹睇郊牧之縱橫泝廣澤
而戒楫指通關以抗旌慨故里之睽絕憂煩傷以寡懽
元雲變其下覆兮密雪霏霏於林端飢鳥叫嘯於中野
兮層冰憑岸而洄瀾念徒御之劬勞兮畏道路之險艱
聊騁目以宣寄兮申鬱陶於詠歎 陸深南征賦曰亶
肅肅以宵征兮悲往路之未央懼中道之折軸兮思改
轍又惡夫無良顧僕夫以先後兮喟河廣之誰航瞻桑
梓之翳翳兮孰云忍捐夫故鄉方青春之駘蕩兮何雨
雪之縱橫白日匿其耿光兮鬱浮雲以翻揚睇山川以
無極兮陵谷杳乎其孰明祥烏嗥而風厲兮何有於翮

翔之鳳皇昔宣尼之遑遑兮固蒙笑於楚狂展直躬以
事人兮卒三黜乎舊邦李夢陽述征賦曰仲夏赫炎
兮草木畢揭鞿絀赴徵兮夜發梁國抑情順志兮強食
自解亂流渡河兮忽焉而寐所以懷恨揮霍兮中情苑
而內傷明散而交加兮翩冥冥吾以行覽衆芳而橫涕
兮莽皇皇莫知所投曷暵杲杲方上進兮雲披離而蔽
之飄風磕而曾波兮湖水擊而震盪慨川廣而難越兮
朝余翱翔乎河上既涉衛以奔鶩兮又逾淇而渡漳去
故鄉以就遠兮霑余襟兮浪浪

序唐柳宗元送文郁師序曰讀孔氏書邈而之釋背

笈篋懷筆牘挾海沂江獨行山水間

逆旅

三國策

來來

與之

命當立

相

荀爽曰

禮

易曰旅瑣瑣斯其所取災又曰旅即次懷其資得

童僕貞曰又曰旅焚其次喪其童僕貞厲又曰旅于

處得其資斧我心不悛又曰窮大者必失其居故受

之以旅旅而無所容故受之以巽巽者入也詩曰于

時廬旅禮記曰諸侯不臣寓公周禮曰環人掌送

逆邦國之通賓客以路節達諸四方舍則授館原左

傳曰荀息假道于虞曰今虢爲不道保于逆旅以侵敝

邑之南鄙晉史曰逆旅逐末廢農亡命依湊敕當除

人部

逆旅

逆旅

逆旅

之十里置一官攤使老小貧戶守之差吏主掌依客舍收錢潘安仁上議

增石林燕語曰宋初京師職事官舊皆無公廨雖宰相執政官亦僦舍而居每遇出省或有中批外奏急速文字則省吏徧持於私第呈押既積緩又多漏泄

逆旅二

源史記曰師尚父東就國道遠行遲逆旅主人曰吾聞時難得而易失客寢處甚安殆非就封者也太公聞之夜衣而行至國萊侯來伐與之爭營丘

增說苑曰鄭桓公東會封於鄭暮舍於宋東之逆旅逆旅之叟從外

來曰客將焉之曰會封於鄭逆旅之叟曰吾門之時難
得而易失也今客之寢安殆非封也鄭桓公門之援轡
自駕其僕接淅而載之行十日夜而至釐何與之爭封
左傳曰叔孫婍所館者雖一日必葺牆屋去之如始

至史記曰秦孝公卒太子立公子虔告商君欲反發
吏捕商君商君亡至門下欲舍客舍舍人曰商君之法
舍人無驗者坐之商君歎曰爲法之弊一至此哉又
曰藺相如奉璧西如秦秦王舍相如廣成傳舍
武故事曰上嘗至柏谷夜投亭長亭長不內乃宿於逆
旅逆旅翁謂上曰汝長大多力當勤種稼穡何忽帶劔

羣聚夜行動衆此不欲爲盜則淫耳上默然不應有頃
還內上使人覘之見翁方要少年十餘皆持弓矢刀劔
欲圖上嫗曰吾觀此丈夫非常人也不如因禮之出謂
上曰此翁好飲酒狂悖今日且令公子安眠無他因殺
雞作食平明上去是日還宮乃召逆旅夫妻見之賜嫗
金十斤其夫爲羽林郎自是懲戒希復微行

增水經

曰漢武微行遇辱竇門感其妻深識之饋既返玉階厚
賞賚焉賜以河津令其嚮渡今竇津者是也

漢書曰

塊相爲茂陵令御史大夫桑弘羊客詐稱御史止傳丞
不以時謁客怒縛丞相疑其有姦收捕案致其罪論棄

客市茂陵大治

原東觀漢記曰第五倫自度仕宦牢

落變易姓名自稱王伯齊嘗與奴販鹽北至太原販賣
每所至客舍去輒爲糞除道上號曰道士開門請求不
復責舍宿直

增

又曰趙孝字長平父普爲田禾將軍

任孝爲郎嘗白衣步擔從長安還欲止郵亭亭長先時
聞孝當過以有長者客埽灑待之孝旣至不自名長不
肯內因問曰聞田禾將軍子當從長安來何時至乎孝
曰尋到矣於是遂去 又曰梁鴻適吳依臯伯通居廡
下爲人賃舂 又曰劉寵累登卿相家無貨積嘗出京
師欲息亭舍亭吏止之曰整頓灑埽以待劉公不可得

也寵無言而去時人稱其長者

原郭林宗別傳曰林

宗每行宿逆旅輒躬灑掃及明去後人至見之曰此必

郭有道昨宿處也

續漢書曰靈帝數遊戲於西園中

令後宮彩女爲客舍主身爲商賈服行至舍彩女下酒

食因共飲食以爲戲樂

書謝承後漢書曰陳留夏馥

避黨事遁跡黑山弟靖載絹往餉之於深陽縣客舍見

馥顏色毀不復識聞其聲乃覺之

原晉書曰桑虞嘗

行寄逆旅同宿客失脯疑虞爲盜虞默然便解衣償之

書

三輔決錄曰平陵士孫奮富貴聞京師性儉悵當

宿客舍雇錢直少主人曰君惜錢如此欲作士孫景卿

耶 燕史曰梁琛使秦琛從兄奕先在秦爲尚書郎會
罷秦主欲令琛止奕舍琛語有司曰昔諸葛亮兄弟各
處三國及其聘集公朝相見退無私面君子之志余敢
忘乎竟不止奕數就邸舍因問東國起居琛曰今二方
鼎據兄弟並蒙附寵論心各有所在今欲以東國事語
君恐非西國之所欲聞何以見問 梁書曰范雲嘗與
梁武同宿顧嵩之舍妻方產鬼在外曰此中有王有相
雲起曰王當仰屬相以見歸因是盡心推事 類林曰
梁徐勉戒子曰吾清明門宅西旣施與宣武寺不復方
幅意謂此逆旅舍耳何事華飾嘗笑時人謂是我室古

今豪富繼踵宛其死矣知是誰室 太平廣記曰唐李

靖於旅中遇一虬鬚客客問太原有異人可一見否靖

曰靖之友劉文靜與之狎可見也遂與俱入太原虬鬚

既見太宗謂靖曰真天子也但須與道兄見之某日請

復會於汾陽橋至是道士虬鬚客皆在文靜飛書迎文

皇看碁文皇至道士一見慘然罷奕請去出謂虬鬚客

曰此世界非公世界他方可圖也言訖吁嗟而去貞觀

中靖位僕射南蠻奏有海賊十萬人扶餘國殺其王自

立國已定靖曰虬鬚客成功也 唐書曰馬周留汴爲

浚儀令崔賢所辱遂感激而西舍新豐逆旅人不之顧

周命酒一斗八升悠然獨酌衆異之 又曰杜甫少貧不自振常客吳越齊趙間寄食於人又嘗臥病長安旅次多雨生魚青苔及榻尋常車馬之客舊雨來今雨不來 又曰李義山遊長安投宿旅店適會客因召與坐不知爲義山也酒酣客賦木蘭花詩衆皆誇示義山後成詩曰洞庭波冷曉侵雲日日征帆送遠人幾度本蘭舟上望不知船是此花身坐客大驚詢之方知是義山 鴻書曰唐錢起寓宿驛舍聞窗外有人曰曲終人不見江上數峰青後十年就試座主李暉試湘靈鼓瑟句意久不屬遂以此二句結之乃中魁選 南部新書曰

濠州西有高塘館俯近淮水御史閻敬愛宿此館題詩
曰借問襄王安在哉山川此地勝陽臺今朝寓宿高塘
館神女何曾入夢來軺軒來往莫不吟諷有李和風者
至此又題詩曰高唐不是這高塘淮畔江南各一方若
向此中求薦枕參差笑殺楚襄王讀者莫不解頤後因
失印求新鑄始添濠字 宋史曰穆修善鼓琴儵舍甚
湫隘彈琴獨酌累補潁川文學參軍 又曰蘇舜欽既
放廢寓於吳中買水石作滄浪亭益讀書時發憤懣於
歌詩 事文類聚曰蘇子由謫雷州不許占官舍遂儵
民屋章子厚又以為強奪民居下本州追民究治以儵

券甚明乃已不一二年子厚謫雷州亦問舍於民民曰
前蘇公來爲章丞相幾破我家今不可也 元史曰太
祖命皇子察哈歹出鎮西域有旨從博爾木受教博爾
木教以人主經涉險阻必獲善地所過無輕舍止太祖
謂皇子曰朕之教汝亦不踰是 明詞林人物考曰河
陽逆旅夜有朱趙二人異舍而宿朱怨家後追至乃誤
殺趙朱實不知也主人疑朱殺之執送官考掠誣服刑
部侍郎劉季篪獨疑之曰是邂逅相聚非素有負計其
裝非有圖也特緩其獄居亡何有司竟得殺趙者而朱
以緩獄不死 獻徵錄曰嚴本爲大理丞奉命督辦太

平者非一人公館不能容則分寓僧寺一日民有懷白金數十兩詣寺賂他督辦者而誤詣本既見民驚愕欲引却不能訊之具以實對即日徙寓學舍僧莫知其由自疑有失而見遠也懇留且謝過笑曰吾欲就儒者談耳絕口不與人知竣事去懷金者乃顯言其事又曰王古直旅食三十年無僮僕不置釜甑有大籠五六惟詩畫數百幅中貯壺酒晨出飲一再勺已復鐫之以去

逆旅三

增顧燕

賦鷓鴣

東漢馮衡字平子南陽西鄂人旅寓洛陽生計無聊有命駕之意因顧梁燕曰

秋風已至客興難久留也唐蕭穎士旅寓東陽思歸不得作白鷓鴣賦意謂已之不得歸猶鷓鴣之困於籠不得

出也故雍陶和孫明府懷舊山詩秋
來見說多歸思自起開籠放白鷗
晉霸 陳亡明

子產語錄曰春秋之世晉人崇大諸侯之館而賓至如歸
襄公知其必亡

原 供過客 湊亡命 後漢周陽少孤微嘗備

報旅一 下詳 **增** 失其居 得所入 居易曰窮大者必失其

無所容故受之以 萬里眼 百年身 杜詩曰乾坤萬

身 又曰常為萬 川中狗 草上煙 廣州押衙崔慶

內庫抵皇華驛舍見美婦人曰今日見君君必有疑今

日舍君我寧不悔俟君迴轅別圖後會擲書云川中狗

百姓眼馬撲兒御廚飯泊還不敢宿皇華寓旅邸前婦

命青衣進酒終不舉酸乃作詩云妖魄才魂自古靈多

情心膽似平生知君不是風流物却上幽原怨月明青

衣曰小娘子常養鸚鵡十餘年竟不言今其驢平婦人
歎曰是矣乃作啞鸚鵡詩曰雕籠馴養許多時終歲曾
人部 世旅 日三

無一句詞深恨化工情太誤因何偏與好毛木擲紙於
地燈火俱滅丁晉公嘗見十二子曰川中狗蜀犬也獨
字百姓眼民目也眼字馬撲兒瓜子也孤字御廚飯官
食也館字乃獨眠孤館四字使命常數程打過好
者舖卒名為草上煙有勢力使命常數程打過好
事作詩云過此唯尋草上煙數程打過苦尤偏
鄉詩 五花館 唐會昌時有題三鄉詩者云余本家若
第不幸良人已矣逸然無依帝里方春弔影東邁涉漘
水歷渭川背終南陟太華登號路抵陝郊楫嘉祥之清
流面女几之蒼翠凡經過之所皆昔謀笑之地遂命筆
聊題終不能滌其懷抱翰墨非女子之事名字故隱而
不書詩曰昔逐良人西入關良人身歿妾空還謝娘倚
女不相待為雨為雲歸舊山和者十一首王說詩曰女
凡山前嵐氣低佳人留恨此中題不知雲雨歸何處空
使王孫見即迷劉谷詩曰蘭蕙芬芳見玉姿路傍花笑
景遲遲荳蔻山下無窮意并在三鄉惜別時張綺詩曰
洛陽依舊好風光蓮帳無因見女郎雲雨散來音信斷
此生遺恨寄三鄉 荆南舊有五花館待賓之上地也
故蔣肱上成納詩云不是上台憐姓字五花賓館敢從

容

廣成傳

橐街邸

廣成秦客館名橐街漢客館名俱魏都賦

濃花發

黃葉稀

唐詩曰孤館蕭條黃葉稀又曰

原館穀底寧

薪

水自備

晉劉寔字子真杖策徒行每止不累主人薪水自備

商君自做

桓公

寢安

秦商鞅曰為法自做商君令舍人無驗者死

夜宿於宋東之逆旅逆旅之吏曰時難

桓公會封於鄭暮

得而易失今客之寢安殆非就封者也

戰國策蘇秦之楚三日乃得見王談卒辭

食王炊桂

白飯青芻

行楚王曰願留秦曰楚國食貴於玉薪貴

於桂謁者難見於鬼王難見於帝今臣食王炊桂因鬼

見帝其可得乎杜詩曰肯訪浣花老翁無為君酣酒

滿眼酖與奴

并州十霜

蜀郡五載

唐賈島渡系乾

白飯馬青芻

十霜歸心日夜憶咸陽無端更渡桑乾水却望并州是

故鄉杜詩五載客蜀郡十年歸梓州如何關塞阻轉

作瀟湘遊萬事已黃髮殘生隨

白鷗安危大臣在何必淚長流

人部

逆旅

逆旅四

原路室

楚詞曰路室之女子方桑兮孔子過之以自侍注

桑一心不視善其

曾廚傳

漢書曰宣帝元康詔吏或

譽

去國

莊子曰不聞夫越之流人乎去國數日見其

喜及期年也見似人者而喜矣不亦去人滋久思人

深乎夫此虛空者蔡藿柱乎駐融之徑跟位其空聞人

足音聲然而喜矣況乎昆弟

思歸

漢書曰韓王信報

親戚之警歎於其側者乎

羈旅

左傳羈旅之臣又張耳傳

人不忘視勢不可耳

萍寄

唐小史李撥乞

定心遊子孟浩然詩慈母手

折大刀

杜詩滿目飛明

化緇衣

唐詩風塵不覺化緇衣又云

原盤飧之饋

郡

淄染

謝元暉詩誰能久

折大刀

杜詩滿目飛明

主人之恩

暫託棟梁

元鎮詩暫託陳梁何用喜

生計南枝

白居易詩生計南枝鳥

雁書蛩夢

王欲詩雁外無書為客久蛩邊有夢到家家多畫堂玉珮繁

風響不及桃

問鵲占蛛

黃庭堅詩我家白髮問烏鵲他家紅妝古蛛絲

源歛乃歌

挑燄撥灰

陳師道詩寒燈挑不釵殘火撥

懷旅夢

韓愈詩孤遊曠耿介旅宿夢婉婉

時來入夢

蘇軾詩婉婉有時來入夢溫柔何日聽還鄉

愁聲點腸

又詩

他時夜雨困移牀坐見愁聲點客腸

逆旅五

詩魏文帝雜詩曰西北有浮雲亭亭如車蓋惜哉時

不遇適與飄風會吹我東南行行行至吳會吳會非我

鄉安能久留滯棄置勿復陳客子常畏人晉王讚雜

人部

逆旅

四九

詩曰朔風動秋草邊馬有歸心胡寧久分析靡靡忽至
今王事離我志殊隔過商參昔往倉庚鳴今來蟋蟀吟
人情懷舊鄉客鳥思故林師涓久不奏誰能宣我心

隋孔德昭夜宿荒邨詩曰縣縣夕漏深客恨轉傷心撫
絃無人聽對酒時獨斟故鄉萬里絕窮愁百慮侵秋草
思逞馬繞枝驚夜會風度谷餘響月斜山半陰勞歌欲
敘意終是白頭吟 唐沈佺期夜宿七盤嶺詩曰獨遊

千里外高臥七盤西山月臨窗近天河入戶低芳春年
仲綠清夜子規啼浮客空留聽猿城聞曙雞 王維宿

鄭州詩曰朝與周人辭暮投鄭人宿他鄉絕儔侶孤客

親僮僕宛洛望不見秋霖晦平陸田父草際歸却童雨
中牧主人東臯上時稼遠茅屋蟲鳴機杼休雀喧禾黍
熟明當渡京水昨夜猶金谷此去欲何之窮邊徇微祿
李白客中作曰蘭陵美酒鬱金香玉盃盛來琥珀光
但使主人能醉客不知何處是他鄉 祖詠江南旅情

詩曰楚山不可極歸客但蕭條海色晴看兩江聲夜聽
潮劍留南斗近書寄北風遙爲報空潭橘無媒贈洛橋
劉長卿餘干旅客詩曰搖落暮天迴青楓霜葉稀孤
城向水閉獨鳥背人飛渡口月初上鄰家漁未歸鄉心
正欲絕何處擣寒衣 孟郊渭上思歸詩曰獨訪千里

信迴臨千里河家在吳楚鄉淚寄東南坡崔塗旅懷
詩曰水流花謝兩無情送盡東風過楚城蝴蝶夢中家
萬里杜鵑枝上月三更故園書動經年絕華髮春惟滿
鏡生自是不歸歸便得五湖煙景有誰爭戎昱詩曰
隔窗雲影滅復流北風微雨虛堂秋蟲聲竟夜引鄉淚
蟋蟀何知人自愁張籍薊北春思詩曰渺渺水雲外
望來鄉信稀因逢過江使却寄在家衣問路更愁遠送
人空說歸今朝薊城北又見塞鴻飛又宿江店詩曰
野店臨寒浦門前有橘花停燈待賈客賣酒與漁家夜
靜江水白路迴山月斜閒尋舟泊處潮落見平沙宋

孔武仲旅枕詩曰旅枕春風底儵然一夢驚漏移清禁
遠天入小窗明桂玉梁園費山椒楚客情蕭條過百五
猶有賣花聲 蘇軾詩曰五湖歸夢常苦短一寸客愁
無奈多慈母每占烏鵲喜家人應賦戾戾歌 黃庭堅
長安秋夕詩曰八月更漏長愁人起常早閉門寂無事
滿地生秋草昨宵西窗風先入荆南道遠客歸去來在
家貧亦好 文同長舉驛樓詩曰爽氣浮空紫翠濃隔
江無限有奇峰君如要識營丘畫請看東頭第五重
程俱旅舍寫懷詩曰半世江湖寄此身冰墟何意及陽
春離騷痛飲非名士款段還鄉亦善人病木作花真強

活長魚沈陸恐摧鱗清時英俊如麻葦敢歎長年甑有
塵 張耒項城道中詩曰塵壁蒼茫有舊題十年重見
一傷悲野僧欲與論前事自說年多不復知 鼉補之
題穀熟驛舍詩曰驛後新籬接短牆枯荷衰柳小池塘
倦遊到此忘行路徙倚軒窗看夕陽 又曰一官南北
鬢將華數畝荒池淨水花埽地開窗置書几此生隨處
便爲家 范成大宿清湘城外田家詩曰驅馬力猶彊
奏牀身始疲淨淨雲拂帳滴滴水鳴籬未熟燈前夢閒
尋道上詩湘中多夜雨客枕最先知 陸游山邨經行
因旌樂詩曰逆旅人家近野橋偶因秣蹇暫逍遙邨翁

不解讀本草爭就先生辨藥苗 又旅舍詩曰寺鐘吹
動四山昏繫纜來投江上邨木落不妨生意足水歸猶
有漲痕存爐紅手煖書差健鼎沸湯深酒易溫勿爲無
年憂寇竊信信小犬護籬門 又上虞逆旅見舊題歲
月感懷詩曰舴艋爲家東復西今朝破曉下前溪青山
銀處日初上孤店開時鶯亂啼倦枕不成千里夢壞牆
閒覓十年題漆園傲吏猶非達物我區區豈足齊 又
果州驛詩曰驛前官路埃纍纍歎息何時送我歸池館
鶯花春漸老窗扉燈火夜相依孤鸞怯舞愁窺鏡老馬
貪行強受鞵到處風塵常撲面豈惟京洛化人衣 楊

萬里都下無憂館小樓春盡旅懷詩曰病眼逢書不敢
開春泥謝客亦無來更無短計消長日且繞闌干一百
回又分宜逆旅逢同郡客子詩曰在家兒女亦心輕
行路逢人總弟兄未問後來相憶否其如臨別不勝情
又道傍店詩曰路傍野店兩三家清曉無湯況有茶
道是渠儂不好事青蕓餅插紫薇花又宿新市徐公
店詩曰春光都在柳梢頭揀折長條插酒樓便在家
寒食看邨歌社舞更風流戴復古秋夜旅中詩曰旅
食思鄉味砧聲起客愁夜涼風動竹人靜月當樓浮世
百年夢他鄉幾度秋店翁新酒熟一醉更何求又萍

鄉客舍詩曰草罷惜春賦持杯亦鮮歡檐楹雙燕語風
雨白花殘小閣無聊坐征衣不耐寒地爐燒石炭強把
故書看 真山民三山旅夜詩曰獨坐本無況悽涼更
旅中檻低檐礙月窗破紙吟風鄰館笛三弄譙樓鼓二
通半觴聊自適新荔劈輕紅 又漁浦晚秋旅懷詩曰
西風吹夢越中遊翦翦輕寒入短裘雁字不將鄉信寫
蛩聲空和旅吟愁郵亭冷雨孤燈夜漁市斜陽一笛秋
是處山川即我土仲宣何用怯登樓 元郭奎嘗塗客
舍詩曰姑孰溪邊獨倚樓江城二月似深秋孤雲無處
求親舍先隴何人祀首丘花落始知寒食過雁歸渾是

夕陽愁故山應有王孫怨春草萋萋沒盡頭 又早秋

旅夕詩曰初月涼風夜向闌倚樓愁到笛聲殘天高闔
闔銀河白露滴梧桐金井寒多病馬卿猶是客幾時張
翰也辭官年年怕近清秋日憶殺湖邊舊釣竿 何中

水口夜思詩曰牢落不成寐荔陰寒石磯潮生灘響盡
海近夜涼歸旅思隨時改鄉音逐遞非燕南與越北祇
足費征衣 楊奐未歸詩曰渭水遙通洛函關近隔秦

百年垂老日千里未歸身夢寐嫌爲客妻孥不諱貧一
官無可戀花氣五陵春 戴良除夜客中詩曰歲月遽
如許蹉跎老却人一年惟此夜明日又逢春湖海未歸

客風塵多病身感時渾不寐燈火獨相親
又宿高密
詩曰客路信悠悠荒城許暫投黃塵齊地晚紅葉海邦
秋燈影明官驛鐘聲度縣樓去家今幾許猶自夢東州
岑安卿和來竺西見寄詩曰歲暮重峰寺詩文喜共
論暝雲昏疊障寒雨滯孤邨別後病飜劇書來身幸存
藤枝肯扶老終扣月中門 又沙縣小樓詩曰半載客
延平沙場夢愈驚蛩鳴深巷靜月昃半樓明故國三千
里歸途一月程西風在庭樹締綌不勝情 明劉基旅
興詩曰日落天氣涼逍遙步庭墀蟋蟀已在宇鴻雁來
何遲少壯輕遠遊衰老傷別離念我親與友各在天一

涯音容兩契闊悲歡絕相知
顰羽懷舊林戢鱗思故池
百年能幾何逝者無還期
俛仰增感歎有懷當語誰
殷勤託宵夢聊用慰所思
梁寅旅舍詩曰寒闌山社迹
淒涼江海情巴歌從俗好
楚服爲人輕把劔秋風起
憂時白髮生黃金雖所貴
未敢論縱橫茅大方客舍詩
曰停車傳舍息煩痾
謾涼風振樹柯欲寐不成
翻起坐布衾疎薄柰秋何
楊時秀江南旅懷詩曰客夢家
千里鄉心柳萬條
片雲遮海嶠一雨送江潮
戀闕緜袍在懷人尺素遥
春光看又晚何處灞陵橋
徐禎卿在武昌作白洞庭木葉下
瀟湘秋欲生高齋今夜雨獨臥

武昌城重以桑梓念淒其江漢情不知天外雁何事樂
南征 夏言宿宣風館詩曰石梁潦水靜依痕雲碓斜
春沙港渾寒葉隋林迷徑路暝煙生野失山邨歸心遠
客情偏劇望眼高堂日又昏厭聽候蟲眠旅館坐燒紅
燭役吟魂 謝榛宿淇門驛詩曰駐馬淇門夕空堂暑
氣徂暝煙官樹合寒雨驛燈孤濁酒聊幽興悲歌亦壯
圖相違舊朋好三徑日荒蕪 許邦才夜投林泉觀詩
曰落日相將萬疊山深林何處有柴關不因邂逅巖扉
宿誰信天台隔世間

原賦 晉左思魏都賦曰營客館以周坊飾賓侶之所集

廣成之傳無以儔橐街之邱不能及

增元陸文星夜

聲賦曰微醺醒中夜獨寤當逆旅心清聽斯聰聲動臆
可舉

增

明袁衷思歸賦曰旅荒徼以羈處兮心忡忡

而多憂陽春逝以流邁兮曜靈迅馳而不留涉恢台之
炎夏兮赫焦灼以鬱蒸瘴暄暄以中人兮觸沈疴以驟
興寒熱搏而襲逆兮苦疢崇之相乘乏單豹之內養兮
二豎伏而伺升哀吾生之孔艱兮逢百罹以備嘗進觸
藩以跼踏兮退曳尾而摧藏嘉魯連之肆志兮雖貧賤
其何傷世好朋而習佞兮懼悻直之構殃遜幽谷以逾
紀兮忽奔走乎遐方豈好爵之吾縻兮實簡書之可畏

收孟明於三北兮蒙羸繆之渥惠奉周任之炯戒兮勉
陳力以就位冀鉛刀之一割兮庶伐檀之無媿老冉冉
之將至兮疾疢糾其相仍俟河清之幾時兮恐朝露之
易零誦夫子之雅言兮疾沒世之無稱紛王事之鞅掌
兮籲天闔而乞身積頽思而寢息兮憎愠愉而怵惕喟
中情之莫我察兮眷懷歸而未得夜申旦以不寐兮就
角枕而反側蟲蔚蔚以潛飛兮聽空除之蟋蟀先秋氣
以哀唵兮感時物之數易魂營營以夢歸兮覩故鄉之
髣髴歎驚寤以在牀兮怛懔怛以惓惓昔鍾儀之囚晉
兮操土風而不忘彼莊烏之仕楚兮詠越聲以傍徨覽

李倫之奏引兮思娛老於河陽繹陶令之賦詞兮脩初
服於柴桑人情各懷土兮豈必經營乎四方余既不能
徇華以苟祿兮又焉能棲棲於此邦孔接浙以違齊兮
軻濡滯而出晝欽疏傅之炳幾兮脫桎梏於組綬梁歌
噫以竄稽兮梅挂冠以遯吳仲樂志於園藪兮張興思
於蓴鱸鴻冥冥於寥廓兮超繳矰而遠徂非斯人其誰
與歸兮永逍遙於江湖亂曰元鷄黑烏號寢宮兮鳳皇
翩飛匿林中兮人各有心紛不同兮靜躁殊趣貴中庸
兮塊獨居此將安從兮我思古人希哲蹤兮

原

議

晉潘岳上客舍議曰謹按客舍逆旅之設其所由

來遠也行者賴以頓止居者得收其直交易貿遷各得其所因民成利惠加百姓語曰許由辭帝堯之命而舍于逆旅春秋外傳曰晉陽處父過甯舍於逆旅魏武帝亦以爲宜其詩曰逆旅整設以通商賈然則自唐到於今未有不得客舍之法惟商鞅尤之此固非聖世之所言也方今四海會同九服納貢八方翼翼公私滿路近畿輻輳客商亦稠芻秣成行器用取給又諸劫盜皆起於迴絕而止乎人衆十里蕭條則姦宄先生心連陌接館則寇情震懾且聞聲有救已發有追不救有罪不追有戮禁暴捕亡恒有司存凡此皆客舍之益率歷代之舊

俗獲行留之歡心使客舍灑埽以待征旅擇家而息豈
非衆庶顛顛之望

增傳明宋濂李疑傳曰金陵之俗以逆旅爲利旅至授
一室僅可榻俛以出入曉鐘動起治他事遇夜始歸息
盥濯水皆自具然月責錢數千否必詆誚致訟或疾病
輒遣出病危氣息尚屬明明未瞑即昇棄之而斂其貲
婦孕將產者以爲不祥擯不舎其少恩如此非其性固
然地在輦轂下四方人至者衆其勢致爾也猶李疑以
尚義名於其時疑字思問居通濟門外閭巷子弟執業
造其家得粟以自給不足則以六物推入休咎固貧甚

然獨好周人急金華范景淳吏吏部得疾無他子弟人
殆之不肯舍杖踵疑門告曰我不幸被疾人莫會我聞
君義甚高能假我一榻乎疑謝許諾延就坐除明爽室
具牀褥爐竈使寢息其中徵醫師視脈躬爲煮糜鍊藥
旦暮執其手問所苦如事親戚既而疾滋甚不能起溲
矢汙衾席臭穢不可近疑日爲刮摩浣滌不少見顏面
景淳流涕曰我累君矣恐不復生無以報厚德囊有黃
白金四十餘兩在故逆旅邸願自取之疑曰患難相恤
人理宜爾何以報爲景淳曰君脫不取我死恐爲他人
得何益乎疑遂求其里人偕往攜以歸面發囊籍其數

而封識之數日景淳竟死疑出私財買棺殯於城南聚
寶山舉所封囊寄其里人家往書召其二子及二子至
疑同發棺取囊按籍而還之二子以米饋却弗受反贖
以貨遣歸平陽耿子廉械逮至京師其妻孕將育衆拒
門不納妻臥草中以號疑問故歸謂婦曰人孰無緩急
安能以室廬自隨哉且人命至重倘育而爲風露所感
則母子俱死吾寧舍之而受禍何忍死其母子乎俾婦
邀以歸產一男子疑命婦事之如疑事景淳踰月始辭
去不取其報人用是多疑名士大夫咸喜與疑交見疑
者皆曰善士善士疑讀書爲文亦可觀嘗以儒舉辭不

就然其行最著云

增奏記柳宗元邠寧奏記曰凡諸侯述職之禮必有棟宇建於京師朝覲爲修容之地會計爲交政之所其在周典則皆邑以具湯沐其在漢制則皆邸以奉朝請唐興因之則皆院以備進奏

淵鑑類函卷三百六

平妻於京師障驪馬新客之此會皆爲文文之代其五
曹表直琳宗正丞寧表直曰凡當新並鄰之豔必有琳
源於其百景著云給不足則以六物并人神谷國會其

淵鑑類函卷三百七

人部六十六

遊覽

遊覽一

原禮記月令曰仲夏之月可以遠眺望可以升山陵

增又內則曰從長者而上丘陵則必鄉長者所視登城

不指城上不呼

原詩曰以遨以遊

穀梁傳曰常視

曰視非常曰觀

周禮曰禁屬遊飲食于市者

淮南

子曰所謂樂者遊雲夢陟高丘耳聽九韶六莖口味煎

熬芬芳馳騁夷道釣射鷓鴣之謂樂乎

遊覽二

人部

淵鑑類函卷三百七

遊覽

原穆天子傳曰天子遂襲崑崙之丘遊軒轅之宮眺望
鍾山之嶺玩帝者之寶勒石王母之山紀迹元圃之上
乃取其嘉木豔草奇鳥怪獸玉石珍瑰之器重膏銀燭
之寶 又曰天子北升于春山之上以望四野春山是
惟天下之高山也天子五日觀于春山之上 **增**列子
曰周穆王肆意遠遊命駕八駿之乘右服繭駟而左駮
耳右馱赤驥而左白棊主車則造父爲御商角爲右次
車之乘右服渠黃而左踰輪左馱盜驪而右山子相天
上車馱伯爲御奔戎爲右一日行萬里 **原**家語曰孔
子北遊登農山子路子貢顏回侍孔子四望喟然歎曰

二三子各言爾志

韓詩外傳曰齊景公遊於牛山而

北望齊曰美哉國乎鬱鬱蒸蒸

說苑曰齊景公遊海

樂之不歸六月

范蠡既佐越滅吳遂乘扁舟出

一江五湖

原莊子曰莊子與惠子游濠梁之上莊

魚出遊從容是魚樂也惠子曰子非魚焉知魚

之樂十三子曰子非我焉知吾不知魚之樂也

新序

曰晉平公遊西河中流而歎曰嗟乎安得賢士與共此

樂乎 戰國策曰昔楚王登彊臺而望崇山左江右湖

以臨方渚其樂忘死 說苑曰楚昭王欲之荆臺游司

馬子綦進諫曰荆臺之遊左洞庭之波右彭蠡之水南

望獵山下臨方淮其樂使人遺老而忘死 列女傳曰

楚昭王燕遊蔡姬在左越姬參乘王親乘駟以逐登附
莊之臺以望雲夢之囿乃顧謂二女曰樂乎吾願與子
生若此 史記曰秦始皇十七年上會稽山望於南海
立石刻頌秦德還過吳從江乘渡傍海上北至琅邪

增淮南子曰盧敖遊大海至蒙谷之上見一士卷龜谷
而食蛤蜊敖曰夫子可與敖爲友矣士歎曰我方南遊
乎罔畧之野北息乎沈默之鄉西窮冥冥之里東貫鴻
濛之光吾與子汗漫遊於九垓之上乃舉臂脊身入雲
中敖仰視曰吾比夫子猶黃鵠與壤蟲也 史記曰漢

太史公有子名遷遷生龍門耕牧河山之陽年十歲則
誦古文二十而南游江淮上會稽探禹穴闕九疑浮於
沅湘北涉汶泗講業鄒魯之都觀孔子之遺風鄉射鄒
嶧危困鄙薛彭城過梁楚以歸高士傳曰向長字子
平讀易至損益卦喟然歎曰吾已知富不如貧貴不如
賤但不知死何如生耳爲子嫁娶畢敕家事斷之云當
如我已死與同好禽子夏俱遊五岳名山不知所終
漢侍中習郁於峴山南依范蠡養魚法作魚池池邊有
高隄種竹及長楸芙蓉綠岸菱芡覆水是遊燕名處山
簡每臨此池未嘗不大醉而還曰此是我高陽池也

世說新語曰晉羊祜鎮襄陽好山水每風景必造峴山
置酒言詠終日不倦 晉謝安於土山營墅樓館林竹

甚盛每攜中外子姪往來游集殺饌亦費百金世頗以
此譏焉常往臨安山中坐石室臨濬谷悠然歎曰此與
伯夷何遠 世說曰晉王羲之去官與東土人士營山

水弋釣之娛又與道士許邁共修服食徧采名藥遊名
山泛滄海歎曰我當以樂死 南史曰宋謝靈運為永

嘉守郡有名山水遂肆志遨遊所至輒為詩詠以致其
意登躡嘗著木屐上山則去前齒下山去其後齒 世
說曰宋宗炳字少文好山水愛遠遊有疾還江陵歎曰

老病俱至名山恐難徧觀惟當澄懷觀道臥以遊之凡
所遊歷皆圖之於室謂人曰撫琴動操欲令衆山皆響
南史曰宋袁粲領丹陽尹獨步園林詩酒自適家居
負郭每杖策逍遙當其得意悠然忘返郡南一家頗有
竹石粲率爾步往不通主人嘯詠自得世說曰許詢
字元度好遊山水而體便登陟時人云許非徒有勝情
實有濟勝之具南史曰張子偉居京口得故刁景純
廢圃結茅齋居焉啜粥飲水嘯傲松竹之下十有餘年
一日聞江東湖湘山川之盛杖策獨行登廬阜從彭蠡
經洞庭南至衡山數年而返所過雖兔穴鳥道人迹所

不及必窮搜極覽以盡其意 又曰陶弘景愛山水每
經澗谷必坐臥其間吟詠不已 世說曰梁簡文入華
林園顧謂左右曰會心處不必在遠翳然林木便自有
濠濮間想也不覺鳥獸禽魚自來親人 唐王勃既廢
客劔南嘗登葛隕山曠望慨然長思 唐書曰李白懇
求還山帝賜金放還白浮游四方常乘舟與崔宗之自
采石至金陵著宮錦袍坐舟中宛若無人晚好黃老渡
牛渚磯至姑孰悅謝家青山欲終焉及卒葬東麓元和
末宣歙觀察使范傳正祭其冢禁樵采訪後裔惟二孫
女嫁爲民妻進止仍有風範因泣曰先祖志在青山頃

葬東麓非本意傳正爲改葬立二碑焉告二女將改妻
士族辭以孤窮失身命也不願更嫁 王維字摩詰太
原人得宋之問藍田別墅在輞川輞水周於舍下竹洲
花塢與道友裴迪浮舟往來彈琴賦詩嘯詠終日 唐
書曰杜甫往來梓夔間大曆中出瞿塘下江陵泝沅湘
以登衡山因客耒陽游嶽祠大水遽至涉旬不得食縣
令具舟迎之乃得還常從李白及高適過汴州酒酣登
吹臺慷慨懷古人莫測也 又曰張志和以親旣喪不
復仕居江湖自稱煙波釣徒著元真子亦以自號兄鶴
齡恐其遽世不還爲築室越州東郭茨以生草豹席椽

屨每垂釣不設餌志不在魚也顏真卿爲湖州刺史志
和來謁真卿以舟敝漏請更之志和曰願爲浮家泛宅
往來苕霅間善圖山水嘗撰漁歌曰西塞山前白鷺飛
桃花流水鱖魚肥青箬笠綠蓑衣斜風細雨不須歸憲
宗求其歌不能致李德裕稱爲嚴光之比又曰孟郊

調溧陽尉縣有投金瀨平陵城林薄蒙翳下有積水郊
聞往坐水旁裴回賦詩而曹務多廢令白府以假尉代
之李約司徒沂公子雅度元機蕭然沖遠嘗得古鐵
一片擊之清越又養一猿名山公嘗以自隨逐月夜泛
江登金山擊鐵鼓琴猿必嘯和傾壺達旦不俟外賓

宋史曰黃山谷遊灑皖山谷寺石牛洞樂其勝因自號山谷道人云 又曰張愈六召不應常浮沅觀浙江升羅浮入九疑買石載鶴以歸 世說補曰宋錢文僖守西都謝絳歐陽修同在幕下一日遊嵩山自潁陽歸暮抵龍門香山俄而雪作登石樓望都城各有所懷忽於煙靄中有車馬渡伊水來既至則文僖遣廚傳歌伎至語曰山行良佳少留龍門賞雪無遽歸也 鴻書曰明方孝孺嘗偕葉夷仲輩夜登巾山絕頂飲酒望月縱談千古竟夕不眠謂葉曰昔蘇子瞻夜登黃樓觀王定國諸公登桓山吹笛飲酒乘月而歸以爲太白死三百年

無此樂矣斯樂又子瞻死三百年後所無也諸君皆大笑孫一元與殷近夫相友善泛舟西湖戴華陽巾披高士服把酒四望謂近夫曰昔青蓮居士與尚書郎張謂泛沔州南湖因改爲郎官湖今日子與子遊頗追蹤前迹而湖可改爲高士湖矣時已醉甚信口成長歌云

獻徵錄曰呼良朋以都督致政歸時登麟巖騁望徘徊觀滄海溟濛慨然歎曰吾結髮從戎乘風破浪於此蓋三十年往矣乃今得朝夕膝下優游泉石間誰之賜也又曰劉陽嘗登泰山絕頂遊衡岳夜半坐祝融峰披手裘觀海日超然遠覽薄視色界一切晚闌雲霞之

館於三峰翠微坐半雲洞天與諸同志講道飲泉茹蔬
悠然樂之 又曰徐舫築室江皋日苦吟於煙雲出沒
間儵然若與世隔因自號曰滄江散人天大雪乃泛舟
釣江中終日戀戀若不忍舍去見者疑其非世間人

又曰唐寅字子畏禮闈被黜掾於浙藩歸而不往或勸
少貶異時亦不失一命寅大笑放浪形迹翩翩遠遊扁
舟獨邁祝融匡廬天台武夷觀海於東南浮洞庭彭蠡
奇趣時發或寄於畫 詞林人物考曰王世懋性嗜佳

山水其登泰岱觀日出憩靈巖謁孔林入關過華嶽具
行滕布履自青柯坪而上西北臨大漠稍南眺岷峨積

雪東俯中原一宿而下謂平生之觀無踰此矣行部江
右窮匡廬表裏之勝按閩縱浪九鯉湖諸山爲幽絕觀
歸自關中單騎走龍門砥柱嵩山少林神禹之所疏鑿
而菩提達摩之所紹統者慨然若覩其人至洞庭兩山
京口三島固凡案問物也意與境會輒爲文以紀之
又曰童珮嘗冒雪遊九華峰南嶽祝融坐雲氣間泰山
日觀峰候夜半出日以爲奇遂有九華遊記南嶽東岱
詩 周公謹邀趙子固放舟湖上飲酣子固脫帽以酒
晞髮箕踞歌離騷薄暮入西泠掠孤山檣檣茂樹間指
林麓最幽處瞪目絕叫曰此是董北苑得意筆也鄰舟

數十皆驚歎以爲真謫仙人

遊覽三

原寓目

寫憂

左傳曰君憑軾而觀之得臣與寓目焉詩曰駕言出遊以寫我憂

樂

丘

增遊觀

晉趙文子觀于九原曰樂哉斯丘禮記曰仲尼與于蜡賓事畢出遊于觀之上謂

然而

神人

水仙

劉訐嘗著穀布巾被衲衣每遊山澤輒流連忘返神理閒正姿貌甚

華在陵谷之間意氣彌遠遇者皆謂神人田業擇家人不

欺能守事者悉付之身則泛遊江湖徧行天下住往

數載不歸見其子孫成人皆不辨其名字也自制三舟

備極工巧一舟自載一舟置賓一舟置飲饌客有前進

士孟彥深進士孟雲卿布衣焦遂各置僕妾共載而峴

有女樂一部嘗奏清商曲逢山泉則窮其境物乘興春
行峴且名聞朝廷又值天下無事經過郡邑無不招延
峴拒之曰某麋鹿閒人非王公上客
詠卷阿
原刺

亦有未招而詣者吳越中號爲水仙
遊覽

宛丘詩曰有卷者阿飄風自南豈弟君子來遊來歌召

上兮刺陳幽增涉天庭通帝座廬公廬山記曰匡

公遊蕩無度增涉天庭通帝座廬公廬山記曰匡

極高峻人所罕經也太史公東遊登其峰而遐觀南眺

五湖北望九江東西肆目若涉天庭焉唐李白登華

山落雁峰曰此山最高呼吸想通帝座記蘭亭賦

恨不攜謝朓驚人詩來搔首問青天耳

赤辟王羲之序曰永和九年歲在癸丑暮春之初會於

林修竹又有清流激湍映帶左右引以為流觴曲水

蘇軾賦曰壬戌之秋七月既望蘇子與客泛舟遊於赤

下之妙高臺峻極院流瀨湧月色如畫遂共登山

頂妙高臺命歌者袁絢歌曰明月幾時有把酒問青天

歌罷公為起舞劉伯壽洛陽九老中一人也築室嵩

山下每登嵩頂則於峻極中院記歲月捐館之年題

云余今年若干歲登頂凡七十四次矣精力雖疲心未

足也後王輔道學士與其孫之靜遊嵩至峻極中院作

一絕句云爛紅一點出浮漚夜坐嵩峰頂上頭笑對松

窗談祖德當年
七十四回遊
埃盞外
泉石間
上詳遊覽五宋登
春語下詳遊覽

二呼良
朋語
千巖萬壑
樵語牧唱
世說曰顧長康從會
稽還述山川之美云

千巖競秀萬壑爭流
草木蒙籠其上若雲興霞蔚
又和詵山行喜聞樵語
牧唱曰洗盡五年塵土腸胃

東山往來
南樓嘯詠
謝太傅思會稽東山於城東築
土以擬之營立樓館植林木甚

盛每攜中外子姓往來游集
殺饌屢費百金晉書曰
庾太尉亮鎮武昌秋夜氣佳景清
佐吏殷浩王胡之徒

登南樓嘯詠音調始適俄而庾公至
諸賢欲起避之公
徐曰諸君少住老子於此興復不淺
因便據胡牀與諸

人談詠
莊周六氣
李白三帖
乘天地之正而御六

氣之辨以遊無窮者彼且惡乎待哉
謂御陰陽風雨晦
明之六氣以遊於無物之始而無所窮也
胡文穆記

李白三帖其一乘興蹋月西入酒家
不覺人物兩忘身
在世外其二夜來月下臥醒花影零亂
滿人襟袖疑如

濯魄於冰壺也其三樓虛月白秋宇
物化於斯憑
闌身世飛動把酒自忘此興何極
非太白不能道
漁

人部
遊覽

童樵青

丹砂白石

唐肅宗嘗賜張志和配為夫婦名之曰漁童樵青漁

童捧釣收綸蘆中鼓柁樵青蘇蘭薪桂竹裏煎茶以此放浪終於江湖間

下詳遊覽五宋登春二童子

柳渾出遊

盧鈞遨遊

柳渾罷政事免後數日置酒召故人出遊酣肆乃還曠然無點

免意志數移病不事事邀遊林野累日一還

子偉漫遊記

子偉獨行隨

元晦遠遊篇

張子偉間湖山川之盛杖策獨行隨

十九歲作遠遊篇曰朝登南極道暮宿臨太行睨即萬里超忽凌八荒無為斃足者終日守空堂

遊覽四

原 桃達

詩曰桃兮達兮在城闕兮

增 逍遙

詩曰羔裘逍遙又

原

盤遊

慢遊是縱觀是娛

增 凌雲

世說曰荀中郎登北

山便使人有凌雲意若秦漢之君必當褰裳濡足

原 橫海

楚辭曰覽冀州兮

窮

奇山水

吳萊字立夫浦江人好遊每遇奇絕處輒忼慨高歌呼酒自慰頗謂有司馬子

長遺風嘗謂人曰胷中無三萬卷書眼中無

大文章

李白曰陽春召我以文章

剖胷襟

陶潛字元亮聞田間水聲倚杖聽之歎曰

穠稻已秀翠色染人如剖胷襟一洗荆棘

爽心目

羊元所居屋舍山當戶峰巒奇秀終日笑傲或

偃臥看山謂客曰此翠屏宜晚對爽人心目

應接不暇

世說曰王子敬云從山陰道上行山

川自相映發使人應接不暇

原浩蕩忘歸

楚辭曰登崑崙兮四望心飛揚兮浩蕩日將暮

兮悵忘歸遺極浦兮悟懷

增登山泛海

李詩曰興引登山履情催泛海船

浮家

泛宅

詳遊覽二張志和語

雲海盪心胷

鐵脚道士嘗采藥至於衡嶽夜半登况融峰觀

日出仰天大叫曰雲海盪吾心胷

花樹攪離思

焦光嘗與仲遜共遊陸渾山時春和景妍

花樹攪人離思

人部

游覽

游覽

十

遊覽五上

原詩古詩曰青青陵上柏磊磊澗中石人生天地間忽
如遠行客驅車策駑馬遊戲宛與洛長衢羅夾巷王侯
多第宅兩宮遙相望雙闕百餘尺極宴娛心意戚戚何
所迫 魏文帝于清河作詩曰方舟戲長水澹澹自浮
沈弦歌發中流悲風漂餘音 **增**又芙蓉池詩曰乘輦

夜行遊逍遙步西園雙渠相漑灌嘉木繞通川卑枝拂
羽蓋修條摩蒼天驚風扶輪轂飛鳥翔我前丹霞夾明
月華星出雲間上天垂光采五色一何鮮壽命非松喬
誰能得神仙遨遊快心意保己終百年 **原**王粲詩曰

悠悠涉荒路靡靡我心愁
四望無煙火但見林與丘
城郭生榛棘蹊徑無所由
萑蒲竟廣澤葭葦夾長流
遊客多悲傷淚下不可收
朝入譙郡界曠然消人憂
詩人美樂土雖客猶願留
又詩曰列車息衆駕相伴綠水湄
幽蘭吐芳烈芙蓉發紅暉
百鳥何繽翻振翼羣相追
投網引潛鯉強弩下高飛
白日已西邁歡樂忽忘歸
陳琳詩曰高會時不娛
羈客難爲心殷懷從中發
悲感激清音投觴罷歡坐
逍遙步長林蕭蕭山谷風
黯黯天路陰惆悵忘旋反
歔歔涕霑襟又詩曰節運時
氣舒秋風涼且清閑居心
不娛篤言從友生翱翔戲
長流逍遙

登高城東望看疇野迴顧覽園庭嘉木凋綠葉芳草殲
紅榮騁哉日月逝年命將西傾建功不及時鐘鼎何所
銘收念還房寢慷慨詠墳經庶幾及君在立德垂功名
晉棗據詩曰矯足登雲閣相伴步九華徒倚憑高山
仰攀桂樹柯延首觀神州迴睛盼曲阿芳林挺修榦一
歲再三花何以濟不朽噓吸漱朝霞重巖吐神瀦傾觴
挹涌波恢恢大道間人事足爲多

增

謝混遊西池詩

曰悟彼蟋蟀唱信此勞者歌有來豈不疾良遊嘗蹉跎
逍遙越城肆願言屢經過迴阡被陵闕高臺眺飛霞惠
風蕩繁囿白雲屯層阿景仄鳴禽集水木湛清華褰裳

順蘭芷徙倚引芳柯美人愆歲月遲暮獨如何無爲牽
所思南榮戒其多

原

陸沖詩曰命駕遵長途繇邈塗

難尋我行一何艱山川阻且深洿澤無夷軌重巒有層
陰零雨淹中路元雲蔽高岑俯悼孤行獸仰歎偏翔禽
空谷回悲響流風漂哀音 又詩曰肆觀野原外放心

希太和景嶽造天漢豐林冒重阿清芬乘風散豔藻映
渌波 宋謝靈運初往新安至桐廬口詩曰絺綌雖淒

其授衣尚未至感節良已深懷古徒役思不有千里棹
孰申百代意遠協尚子心遙得許生計旣及冷風善又

即秋水駛江山共閒曠雲日想照媚景夕羣物清對玩

咸可喜

增

又從遊京口北固應詔詩曰玉璽戒誠信

黃屋示崇高事爲名教用道以神理超昔聞汾水遊今
見塵外鑣鳴笳發春渚稅鑾登山椒張組眺倒影列筵
矚歸潮遠巖映蘭薄白日麗江皋原隰萋綠柳墟圍散
紅桃皇心美陽澤萬象咸光昭顧已枉維繫撫志慙場
苗工拙各所宜終以反林巢曾是縈舊想覽物奏長謠
又石壁精舍還湖中詩曰昏旦變氣候山水含清暉
清暉能娛人遊子憺忘歸出谷日尚早入舟陽已微林
壑斂暝色雲霞收夕霏芰荷迭映蔚蒲稗相因依披拂
趨南徑愉悅偃東扉慮澹物自輕意愜理無違寄言攝

生客試用此道推。又登石門最高頂詩曰晨策尋絕
壁夕息在山棲疏峰抗高館對嶺臨迴谿長林羅戶庭
積石擁階基連巖覺路塞密竹使徑迷來人忘新術去
子感故蹊活活夕流駛噉噉夜猿啼沈冥豈別理守道
自不攜心契九秋幹目玩三春萋居常以待終處順故
安排惜無同懷客共登青雲梯。又於南山往北山經

湖中瞻眺詩曰朝旦發陽崖景落憩陰峰舍舟眺迴渚
停策倚茂松側徑既窈窕環洲亦玲瓏俛視喬木杪仰
聆大壑淙石橫水分流林密蹊絕蹤解作竟何感升長
皆丰容初篁苞綠籜新蒲含紫茸海鷗戲春岸天雞弄

和風撫化心無厭覽物眷彌重不惜去人遠但恨莫與
同孤遊非情歎賞廢理誰通 又從斤竹澗越嶺谿行

詩曰猿鳴誠知曙谷幽光未顯巖下雲方合花上露猶

泣透迤徬隈隩迢遞陟陁峴過澗旣厲急登棧亦凌緬

川渚屢徑復乘流翫迴轉蘋萍泛沈深菰蒲冒清淺企

石挹泉飛攀林摘葉卷想見山阿人薜蘿若在眼握蘭

勤徒結折麻心莫展情用賞爲美事昧竟誰辨觀此遺

物慮一悟得所遣 謝惠連泛湖歸出樓中翫月詩曰

日落泛澄瀛星羅遊輕橈憩榭面曲汜臨流對迴潮輟

策共駢筵並坐相招要哀鴻鳴沙渚悲猿響山椒亭亭

映江月颺颺出谷颺
斐斐氣霧岫泫泫露盈條
近矚祛
幽蘊遠視盪誼顛
晤言不知罷從夕至清朝
原謝莊

遊豫章西山觀洪崖井詩曰
幽願平生積野好歲月彌
舍簪神區外整褐靈鄉垂
林遠炎天隔山深白日虧
遊陰騰鵠嶺飛清起鳳池
隱曖松霞被容與澗煙移
將遂丘中性結駕終在斯
增鮑昭行藥至城東橋詩曰雞

鳴關吏起伐鼓早通晨
嚴車臨迴陌延瞰歷城闈
蔓草緣高隅修楊夾廣津
迅風首旦發平路塞飛塵
擾擾遊宦子營營市井人
懷金近從利撫劔遠辭親
爭先萬里途各事百年身
原齊謝朓和徐勉出新林渚詩曰宛

洛佳遨遊春色滿皇州結軫青郊路迴瞰滄江流日華
川上動風光草際浮桃李成蹊徑桑榆蔭道周又遊
東田詩曰戚戚苦無悰攜手共行樂尋雲陟累榭隨山
望菌閣遠樹暖芊芊山煙紛漠漠魚戲新荷動鳥散餘
花落不對芳春酒還望青山郭

釋梁武帝登北顧樓

梁史武帝大同十年三月幸京口城登北固樓更名北顧詩曰歇駕止行警迴輿暫

遊識清道巡丘壑緩步肆登陟雁行上差池羊腸轉相
逼歷覽窮天步矚矚盡地域南城連地險北顧臨水側
深潭下無底高岸長不測舊嶼石若構新洲花如織

原梁簡文帝薄晚逐涼北樓迴望詩曰平衢望如掌曾

雉暖相連斷雲留去石長山減半天戲鳧乘汛下漁舟
冒浪前 又大同八年秋九月詩曰大君重九節下輦
上林中酒闌嘉宴罷車騎各西東時余守西掖脂車歸
北宮車分獨坐道扇拂冶城風落照塹中滿浮煙槐外
通長樂舍初紫安榴折晚紅 又大同九年秋七月詩

曰高樓闢左扇迴望依蘭橈晚風搖颺來落照參差好

增

又往虎窟山寺詩曰塵中諠慮積物外衆情捐茲

地信爽塏墟壠曖阡縣藹藹車徒邁飄飄旌旒懸細松
斜繞徑峻嶺半藏天古樹無枝葉荒郊多野煙分花出
黃鳥挂石下新泉菊鬱均雙樹清虛類八禪棲神紫臺

上縱意白雲邊徒然嗟小藥何由齊大年

原又登錦

堂詩曰孫生酸棗寺王子杖江樓何如登石鏡因閒猶

豫遊

又應令詩曰蠡浦急兮川路長白雲重兮出帝

鄉平原忽兮遠極目江甸阻兮羈心傷樹廬岳兮高且

峻瞻派水兮去泱泱遠煙生兮含山勢風散花兮傳馨

香臨清波兮望石鏡瞻鶴嶺兮睇仙莊望邦畿兮千里

曠悲遙夜兮九迴腸顧龍樓兮不可見徒送目兮淚霑

裳

元帝出江陵縣還詩曰遊魚迎浪上雒雉向林飛

遠邨雲裏出遙船天際歸

又詩曰朝出屠羊縣夕反

仲宣樓水滿還侵岸沙盡稍開流

又登江州百花亭

懷荆楚詩曰目極纔千里何由望楚津落花灑行路垂
楊拂砌塵柳絮飄春雪荷珠漾水銀試酌新春酒遙勸
陽臺人 沈約登高望春詩曰登高眺京洛街巷何紛
紛回首望長安城闕鬱盤桓齊童躡珠履趙女揚翠翰
春風搖雜樹蕨蕤綠且丹寶瑟玫瑰柱金羈玳瑁鞍淹
留宿下蔡置酒過上蘭日出照鈿黛風過動羅紈

增

又鍾山應西陽王教詩曰靈山紀地德險峭資嶽靈終
南表秦觀少室邇王城翠鳳翔淮海衿帶繞神垆北阜
何其峻林薄杳蔥青發地多奇嶺干雲非一狀合沓共
隱天參差互相望鬱律構丹嶽峻嶒起青嶂勢隨九疑

高氣與三山壯即事旣多美臨眺殊復奇南瞻儲胥觀
西望昆明池中咸可悅賞逐四時移春光發隴首秋
風生桂枝多值息心侶結架山之足八解鳴澗流四禪
隱巖曲窈冥終不見蕭條無可欲所願從之遊寸心于
此足君王挺逸趣羽旆臨崇基白雲隨玉趾青霞雜桂
旗淹留訪五藥顧步佇三芝於焉仰鑣駕歲暮以爲期
又登元暢樓詩曰危峰帶北阜高頂出南岑中有凌
風榭迴望川之陰岸險每增減湍平互淺深水流本三
派臺高乃四臨上有離羣客客有慕歸心落暉映長浦
煥景燭中潯雲生嶺乍黑日下谿半陰信美非吾土何

事不抽簪

原

劉孝威出新林詩曰芒山眠洛邑函谷

望秦京遙分承露掌遠見長安城故鄉已可識遊子必
勞情霧罷前邨見風息涌川平坐觀暮潮落漸見夕煙
生無由一羽化徒想風御輕 蕭子範東亭極望詩曰
晚流稍東急暝景促西暉水鳥銜魚望蓮舟拂芰歸郊
原共超遠林野雜依菲從君采蘿葛寧復想輕肥 蕭
子暉應教使客春遊詩曰上林看草色河橋望日暉洛
陽城閉晚金鞍橫路歸 蕭子雲落日郡西齋望海山
詩曰漁舟暮出浦漢女采蓮歸夕雲向山合水鳥望田
飛蟬鳴早秋至蕙草無芳菲故隱天山北夢想日依依

吳均迎柳吳興道中詩團團日西靡客念已蹉跎長
風倒危葉輕練網寒波白雪光彩麗青松意氣多所言
飽恩德忘我北山蘿 庾肩吾暮遊山水賦韻得磧應
令詩曰餘春屬清夜西園恣遊歷入徑轉金輿開橋通
畫鷁細藤初上援新流漸涵磧雲峰沒城柳電影開巖
壁 王僧孺落日登高詩曰憑高且一望目極不能舍
東北指青門西南見白杜軫軫河梁上紛紛渭橋下爭
利亦爭名驅車復驅馬寧訪蓬蒿人誰憐寂寞者 又
至牛渚憶魏少英詩曰楓林暖似畫沙岸淨如埽空籠
望元石迴斜見危島綠草間遊蠶青葢集輕搗徘徊洞

初月浸淫瀆春滂非願歲物華徒用風光好
劉綏和
晚日登樓詩曰所以登臺榭正重接煙霞長虹觸闌斷
歸鳥避空斜俯巢窺暝宿臨樹摘高花百雉時方晚九
層光尚賒

曾

北周庾信遊山詩曰聊登元圃殿更上

增城山不知高幾里低頭看世間唱歌雲欲聚彈琴鶴
欲舞澗底百重花山根一片兩婉婉藤倒垂亭亭松直

豎

原

宗懷和歲首寒望詩曰旅騎出平原征饒徧野

喧接里開都邑連車駐小門稻車迴故塢獵馬轉新邨
古碑空戴石山龕未上旛所言春不至未有桃花源
陳陰鏗和登百花亭懷荆楚詩曰江陵一柱觀潯陽千

里潮風煙望似接川路恨成遙落花輕未下飛絲斷易
飄藤長還依格荷生不避橋陽臺可憶處唯有暮將朝
又登武昌岸望詩曰遊人試歷覽舊迹但丘墟巴水
縈非字楚山斷類書荒城高仞落古柳細條疎煙蕪遂
若此當不爲能居

曾

隋盧思道河曲遊詩曰鄴下盛

風流河曲有名遊應徐託後乘車馬踐芳洲丰茸雞樹
密遙裔鶴煙稠日上疑高蓋雲起類重樓金羈自沃若
蘭棹成夷猶懸匏動清吹采菱轉豔謳還珂響金埒歸
袂拂銅溝唯畏三春晚勿言千載憂袁朗和洗掾登
娥雨坂望京邑詩曰二華連陌塞九隴統金方與區稱

富貴重險擅雄強龍飛灞水上鳳集岐山陽神臯多瑞
跡列代有興王我后膺靈命爰來宅此土宸居法太微
建國資天府元風隔黎庶德澤浸區宇醒醉各相扶謳
歌從聖主南登少陵岸還望帝城中帝城何鬱鬱佳氣
迺蔥蔥金鳳凌綺觀璇題敞蘭宮複道東西合交衢南
北通萬國朝前殿羣公議宣室鳴珮舍早風華蟬曜朝
日柏梁宴初罷千鍾歡未畢端拱肅巖廊思賢聽琴瑟
逶迤萬雉列隱軫千閭布飛甍夾御溝曲臺臨上路處
處歌鐘鳴喧闐車馬度日落長楸間含情兩相顧是月
冬之季陰寒晝不開驚風四面集飛雪千里迴狐白登

廊廟牛衣出草萊詎知韓長孺無復重煇灰

唐陳子

昂度荆門望楚詩曰遙遙去巫峽望望下章臺巴國山

川盡荆門煙霧開城分蒼野外樹斷白雲隈今日狂歌

客誰知入楚來

駱賓王春晚從李長史遊開道林故

山詩曰幽尋極幽壑春望陟春臺雲光棲斷樹靈影入

仙杯古藤依格上野徑約山隈落葉翻風去流鶯滿樹

來興闌荀御動歸路起浮埃

又出石門詩曰層巖遠

接天絕嶺上栖煙松低輕蓋偃藤細弱絲懸石明如挂

鏡苔分似列錢暫策爲龍杖何處得神仙

宋之問遊

禹穴迴出若邪詩曰禹穴今朝到邪溪此路通著書聞

太史鍊藥有仙翁鶴往籠猶挂龍飛劍已空石帆搖海上天鏡落湖中水底零露白山邊墜葉紅歸舟何慮晚日暮使樵風 崔湜冀北春望詩曰回首覽燕趙春生兩河間曠然萬里餘際海不見山雨歇青林潤煙空綠野閒問鄉何處所目送白雲還 薛稷早春魚亭山詩曰春氣動百草紛榮時斷續白雲自高妙徘徊空山曲陽林花已紅寒澗苔未綠伊余息人事蕭寂無營欲客行雖云遠翫之聊自足 張說遊石門墨山二山相連有禪堂觀天下絕境詩曰菌輪江上山近在華容縣常涉巴丘首天晴遙可見佳遊屢前諾芳月愆幽眷及此

符守移歡言臨道便旣攜賞心客復有送行掾竹徑入
陰宵松崖上空蘓草共林一色雲與峰萬變探窺石門
斷緣越沙澗轉兩山勢爭雄峰巘相顧眄藥妙靈仙寶
境華巖壑選清都西淵絕金地東敞宴池果接園畦風
煙邇臺殿高尋去石頂曠覽天宇徧千山紛滿目百川
豁對面騎來雲飛迎人去鳥聲戀長揖桃源士舉世同
企羨 又游洞庭湖湘詩曰平湖曉望分仙嶠氣氛氳
鼓枻乘清渚尋峰弄白雲江寒天一色日靜水重文樹
坐參猿嘯沙行入鷺羣緣源斑篠密骨徑綠蘿紛洞穴
傳虛應楓林覺自熏雙童有靈藥願取獻明君 高適

同薛司直秋霽曲江俯見南山詩曰南山鬱初霽曲江
湛不流若臨瑤池間想望崑崙丘回首見黛色眇然波
上秋深沈俯崢嶸清淺延阻修連潭萬木影插岸千巖
幽杳靄信難測齋淪無暗投片雲對漁父獨鳥隨虛舟
我心寄青霞世事慙白鷗得意在乘興忘懷非外求良
辰自多暇欣與數子遊 孟浩然秋登蘭山寄張五詩
曰北山白雲裏隱者自怡悅相望試登高心隨飛雁滅
愁因薄暮起興是清秋發時見歸邨人平沙渡頭歇天
邊樹若薺江畔舟如月何當載酒來共醉重陽節 岑
參早秋與諸子號州西亭觀眺詩曰亭高出鳥外客到

與雲齊樹點千家小天圍萬嶺低殘虹挂陝北急雨過
關西酒榼緣青鉞瓜田傍綠谿微官何足道愛客且相
攜唯有鄉園處依依望不迷 李頎望秦川詩曰秦川

朝望迴日出正東峰遠近山河淨透迤城闕重秋聲萬
戶竹寒色五陵松客有歸歟歎淒其霜露濃 王維冬

日遊覽詩曰步出城東門試騁千里目青山橫蒼林赤
日圍平陸渭北走邯鄲關東出函谷秦地萬方會來朝
九州牧雞鳴咸陽中冠蓋相追逐丞相過列侯羣公餞
光祿相如方老病獨歸茂陵宿 李白入彭蠡經松門
觀石鏡緬懷謝康樂題詩書遊覽之志詩曰謝公之彭

蠡因此遊松門余方窺石鏡兼得窮江源將欲繼風雅
豈徒清心魂前賞逾所見後來道空存況屬臨泛美而
無洲渚喧漾水向東去漳流直南奔空濛三川夕回合
千里昏青桂隱遙月綠楓鳴愁援水碧或可采金精祕
莫論吾將學仙去冀與琴高言 又送友人尋越中山

水詩曰聞道稽山去偏宜謝客才千巖泉灑落萬壑樹
縈廻東海橫秦望西陵繞越臺湖清霜鏡曉濤白雪山
來八月枚乘筆三吳張翰杯此中多逸興早晚向天台
又望九華贈青陽韋仲堪詩曰昔在九江上遙觀九
華峰天河挂綠水秀出芙蓉我欲一揮手誰人可相

從君爲東道主于此臥雲松 杜甫望嶽詩曰岱宗夫
何如齊魯青未了造化鍾神秀陰陽割昏曉盪舟生層
雲凌背入歸鳥會當凌絕頂一覽衆山小 又望嶽詩
曰西嶽峻嶒竦處尊諸峰羅立似兒孫安得仙人九節
杖拄到玉女洗頭盆車箱入谷無歸路箭括通天有一
門稍待秋風涼冷後高尋白帝問真源 又漢陂行詩
曰岑參兄弟皆好奇攜我遠來遊漢陂天地黯慘忽異
色波濤萬頃堆琉璃琉璃汗漫泛舟入事殊興極憂思
集鼉作鯨吞不復知惡風白浪何嗟及主人錦帆相爲
開舟子喜甚無氛埃鳧鷖散亂權謳發絲管啁啾空翠

來沈竿續蔓深莫測菱葉荷花淨如拭宛在中流渤澥
清下歸無極終南黑半陂已南純浸山影動裊窕沖融
間船舫冥夏雲際寺水面月出藍田關此時驪龍亦吐
珠馮夷擊鼓神龍趨湘妃漢女出歌舞金支翠旗光有
無咫尺但愁雷雨至蒼茫不曉神靈意少壯幾時柰老
何向來哀樂何其多 又瞿塘兩崖詩曰三峽傳何處
雙崖壯此門入天猶石色穿水忽雲根猿獮鬚顙古蛟
龍窟宅尊羲和冬馭近愁畏日車翻 又渡江詩曰春
江不可渡二月已風濤舟楫欹斜疾魚龍偃臥高渚花
張素錦汀草亂青袍戲問垂綸客悠悠見汝曹 又登

兗州城樓詩曰東郡趨庭日南樓縱目初浮雲連海岱
平野入青徐孤嶂秦碑在荒城魯殿餘從來多古意臨
眺獨躊躇 又西閣雨望詩曰樓雨霑雲幔山寒著水
城徑添沙面出湍減石稜生菊榮淒疎放松林駐遠情
滂沱朱檻濕萬慮倚檐楹 又曉望白帝城鹽山詩曰
徐步移班杖看山仰白頭翠深開斷壁紅遠結飛樓日
出清江望暄和散旅愁春城見松雪始擬進歸舟 又
野望詩曰清秋望不極迢遞起曾陰遠水兼天淨孤城
隱霧深葉稀風更落山迴日初沈獨鶴歸何晚昏鴉已
滿林 又滕王亭子詩曰君王臺榭枕巴山萬丈丹梯

尚可攀春日鶯啼修竹裏仙家犬吠白雲間清江碧石
傷心麗嫩榮濃花滿目斑人到于今歌出牧來遊此地
不知還 又詩曰寂莫春山路君王不復行古牆猶竹
色虛閣自松聲鳥雀荒邨暮雲霞過客情尚思歌吹入
千騎把霓旌 又登高詩曰風急天高猿嘯哀渚清沙
白鳥飛迴無邊落木蕭蕭下不盡長江滾滾來萬里悲
秋常作客百年多病獨登臺艱難苦恨繁霜鬢潦倒新
亭濁酒杯 劉長卿秋雲嶺詩曰山色無定姿如煙復
如黛孤峰夕陽後翠嶺秋天外雲起遙蔽虧江迴頻向
背不知今遠近到處猶相對 錢起送包何東遊詩曰

水國嘗獨往送君還念茲湖山遠近色昏旦煙霞時予
好謝公跡常吟孤嶼詩果乘扁舟去若與白鷗期野趣
及春好客遊欣此辭入雲投館僻采碧過帆遲江上日
回首琴中勞別思春鴻刷歸翼一寄杜蘅枝 韋應物
龍門遊眺詩曰鑿山導伊流中斷若天闢都門遙相望
佳氣生朝夕素懷出塵意適有攜手客精舍繞層阿千
龕鄰峭壁緣雲路猶緬憩澗鐘已寂花樹發煙華淙流
散石脈長嘯招遠風臨潭漱金碧日落望都城人間何
役役 孟郊越中山水詩曰自覺耳目勝我來山水州
蓬瀛若髣髴四野如泛浮碧嶂幾千繞清泉萬餘流莫

窮合杳步孰盡派別遊越水淨難污越天陰易收氣鮮
無隱物目視遠更周舉俗媚蔥蒨連冬擷芳柔菱湖有
餘翠茗圃無荒疇賞異忽已遠探奇誠淹留永言終南
色去矣銷人憂 戴叔倫晚望詩曰山氣碧氤氳深林

帶夕曛人歸孤嶂晚犬吠隔谿雲杉竹何年種煙塵此
地分桃源寧異此猶恐世間聞 元稹西郊遊曠詩曰

東風散餘沍陂水澹已綠煙芳何處尋杳靄春山曲新
禽哢暄節晴光泛嘉木一與諸君遊華觴秋見屬 白

居易遊坊口懸泉偶題石上詩曰濟源山水好老尹知
之久常日聽人言今秋入吾手孔山刀劒立沁水龍蛇

走危磴已懸泉澄灣轉坊口虛明見深底淨綠無纖垢
僊權浪悠揚塵纓風抖擻巖寒松相短石古莓苔厚錦
座嬰高低翠屏張左右雖無安石妓不乏文舉酒談笑
逐身來管弦隨事有時逢杖錫客或值垂綸叟相與澹
忘歸自辰將及酉 又秋日與張賓客舒著作同遊龍
門醉中狂歌凡二百三十八字詩曰秋天高高秋光清
秋風嫋嫋秋蟲鳴蒿峰餘霞錦綺卷伊水細浪鱗甲生
洛陽閒客知無數少出遊山多在城商嶺老人自追逐
蓬丘逸士相逢迎南出鼎門十八里莊居邈迤橋道平
不寒不熱好時節鞍馬穩慢衣衫輕並轡踟躕下西岸

扣舷容與繞中汀
開懷曠達無所繫
觸目勝絕不可名
荷衰欲黃荇猶綠
魚樂自躍鷗不驚
翠藻蔓長孔雀尾
彩船櫓急寒雁聲
家醞一壺白玉液
野花數把黃金英
朝遊回看西日暮
夜話坐及東方明
暫停杯觴輒吟詠
我也狂言君試聽
丈夫一生有二志
兼濟獨善難得并
不能救療生民病
即須洗濯塵土纓
况吾頭白眼已暗
終日戚促何所成
不如展眉開口笑
龍門醉臥香山行
又東樓南望詩曰
不厭東南望江樓
對海門風濤生
有信天水合無痕
鷁帶雲帆動鷗和
雪浪翻魚鹽聚爲
市煙火起成邨
儲嗣宗春遊望仙
谷詩曰清無車馬

塵深洞百花春雞大疑霑藥耕桑似避秦登山樵采路
臨水浣紗人若得心無事移家便卜鄰 朱長文望中

有懷詩曰龍向洞中銜雨出鳥從花裏帶香飛白雲斷
處見明月黃葉落時聞擣衣 韋莊南昌晚眺詩曰南

昌城郭枕江煙章水悠悠浪拍天芳草綠遮仙尉宅落
霞紅襯賈人船霏霏閣上千山雨皛皛雲中萬樹蟬怪
得地多章句客庾家樓在斗牛邊 宋王禹偁春遊南

靜川詩曰南過高車嶺川源似掌平峰巒開畫障畎畝
列棊枰帝女柔桑綠王孫野草生提壺催我醉戴勝勸
人耕商嶺堪攜妓丹河好濯纓蓋圓松影密鞭亂竹根

獐勃勃會田氣磷磷水塏聲野桃誰似主山鳥不知名
欲舞寧無蝶思歌亦有鶯官閒春日永擔酒此中行

趙抃遊青城山詩曰三十六峰峻維岷在蜀奇方行刺
史部重款文人祠凍雪諸蕃隔晴雲六面披訪山窮寶
洞敷鬼覘豐碑泉落寒崖響蘿依古木垂良工存舊筆
老叟琢新詩陟險齊雙屐逢幽鼓七絲盤桓不忍去還
作更來期 又出雁蕩回望常雲峰詩曰遊徧名山未
肯休征車已發尚回眸高峰亦似多情思百里依然一
探頭 林逋湖樓晚望詩曰湖水混空碧憑闌凝睇勞
夕寒山翠重秋淨雁行高遠意極千里浮生輕一毫叢

林數未徧杳靄隔漁舫 又上河閒泛機舟石函因過

下湖小墅詩曰平臯望不極雲樹遠依依及向扁舟泊

還尋下瀨歸青山連石埭春水入柴扉多謝提壺鳥留

人到落暉 蘇舜欽獨遊輞川詩曰行穿翠靄中絕磴

落疎鐘數里蹋亂石一川環碧峰暗林麋養角當路虎

留蹤隱逸何曾見孤吟對古松 又遊招隱道中詩曰

揚鞭望招隱塵思漠然收雲接青林合泉兼碧草流疎

鐘傳別壑晚日動前樓嘉遯平生志吁嗟得覩遊 梅

堯臣希深惠書言與師魯子聰永叔幾道遊嵩因誦而

韻之曰聞君奉宸詔瑞祝疑靈岫山水聊得遊志願庶

可就豈無朋從俱況此一二秀方斬建春陌十刺殘畫
漏初經緱氏嶺古柏尚鬱茂却過轅轅關巨石相撐闢
夕齋禮神祠法袞被藻繡畢事登山椒常服更短後從
者十數人輕齋不爲陋是時天清陰力氣勇奔驟雲巖
杳虧蔽花草藏澗竇傍林有珍禽驚聒若避殼盤石暫
憩休泓泉助吞漱上窺玉女窗嶄絕非可構下玩擣衣
碓焜燿金紋透尹子體雄恢攀緣逾習狃歐陽稱壯齡
疲軟屢顛踣競歡相扶持芒屨資踐蹂八仙存故壇三
醉孰云謬鄙哉封祝碑數子昔鐫鏤偶識一時事曷虞
來者詬絕頂瞰諸峰隘然輕宇宙遙思謝塵煩欲知羣

鳥獸韓公傳石室聞之固已舊當時興稍衰不暇苦尋
究東崖暗壑中釋子持經咒于今二十年飲食同猿狖
君子聆法音充爾溢膚腠嘗期躡屐過吾儕色先愀遂
乖真諦言茲亦甘自咎中預會幾望涼蟾皓如晝紛紛
坐談詭草草具觴豆清露濕巾裳誰人苦羸瘦便即忘
形骸胡為戀纓綬或疑桂宮近斯語豈狂瞽歸來遊小
室嶠崿殊引脰石室迢遰過探訪仍邂逅捫蘿上岑邃
仙屋何廣袤乳水出其間涓涓自成溜凡骨此熏蒸靈
真安可覲霞壁幾千尋四字侔篆籀咸意苔蘚文誠爲
造化授標之神清洞民俗未嘗遘忽覺風雨冥無能久

瞻扣息息遂宵征勝事皆可復俚歌縱誼譁怪說多駭
糅凌晨關塞陽追賞顏匪厚窮極四百里寧憚疲左右
昨朝書報予聞甚醉醇耐所嗟遊遠方心焉倍如疚

又魯山山行詩曰適與野情愜千山高復低好峰隨處
改幽境獨行迷霜落熊升樹林空鹿飲溪人家在何許

雲外一聲雞 余靖遊水南寺詩曰雙刹聳浮雲層軒

絕世塵松溪千蓋雨茶圃一旗春夜梵龕燈暗朝香篆
火新暫來猶永日堪羨白蓮人 歐陽修和丁寶臣遊

甘泉寺詩曰江上孤峰蔽綠蘿縣樓終日對嵯峨叢林
已廢姜祠在事迹難尋楚語訛空餘一派寒巖側澄碧

泓亭涵玉色野僧豈解惜清泉蠻俗那知為勝迹西陵
老令好尋幽時共登臨向此遊敲危一徑穿林樾盤石
蒼涼留客歇山深雲日變陰晴澗柏巖松度歲青谷裏
花開知地暖林間鳥語作春聲依依渡口夕陽時却望
層巒在翠微城頭暮鼓休催客更待橫江弄月歸 又
豐樂亭遊春詩曰綠樹交加山鳥啼晴風蕩漾落花飛
鳥歌花舞太守醉明日酒醒春已歸 又曰春雲澹澹
日輝輝草惹行襟絮拂衣行到亭西逢太守籃輿酌酌
插花歸 又曰紅樹青山日欲斜長郊草色綠無涯遊
人不管春將老來往亭前蹋落花 韓維登湖光亭詩

曰雪盡塵消徑露沙公家池館似山家翠痕滿地初生
草紅氣通林未放花匝岸平波清照雁壓城危榭斗回
鴉自慙白首猶圭組此地年年賞物華 米芾望海樓

詩曰雲間鐵甕近青天縹緲飛樓百尺連三峽江聲流
筆底六朝帆影落尊前幾番畫角催紅日無事滄洲起
白煙忽憶賞心何處是春風秋月兩茫然 秦觀次韻

子由題平山堂詩曰棟宇高開古寺間盡收佳處入雕
闌山浮海上青螺遠天轉江南碧樹寬雨檻幽花滋淺
淡風巵清酒漲微瀾遊人若論登臨美須作淮東第一
觀 又次韻子由題摘星亭詩曰崑崙左右兩招提中

起孤高雉堞西不見燒香成宿霧虛傳裁錦作障泥螢
流花苑飛星亂蕪滿春城綠髮齊長憶凭闌風雨後斷
虹明處海天低 又金山晚眺詩曰西津江口月初弦
水氣昏昏上接天清渚白沙茫不辨只應燈火是漁船
范成大拄笏亭晚望詩曰林泉隨處有清涼山繞闌
干客自忙溪雨不飛虹尚飲亂蟬高柳滿斜陽 又上
清宮詩曰歷月捫參興未闌丹梯通處更躋攀冥濛蜀
道一雲氣破碎岷山千髻鬢但覺星辰垂地上不知風
雨滿人間蝸牛兩角渾如夢更說紛紛觸與蠻 又最
高峰望雪山詩曰大面峰頭六月寒神燈收罷晚雲班

浮空忽湧三銀闕云是西天雪嶺山 劉宰北固山望

揚州懷古詩曰北固城高萬象秋煙竿一縷認揚州試
乘綠漲三篙水要見朱簾十里樓淚濕宮衣朝霧重愁
熏寒草夕陽浮隋堤舊事無人問雨雨垂楊繫客舟

戴復古烏聊山登覽詩曰抖擻塵上翠微旁溪寺上
坐題詩忽聞啼鳥不知處細看好山無厭時風掃雲煙

開遠景人攜香火謁叢祠客來千里登臨意說與時人
未必知 又登快閣黃明府強使和山谷先生留題之

韻曰未登快閣心先快紅日半檐秋雨晴宇宙無邊萬
山立雲煙不動八窗明飛來一鶴天相近過盡千帆江

自橫借問金華老僊伯幾人無忝入詩盟 黃公度與

邨晚望詩曰山逐寒雲斷天隨暮靄低稻畦迷上下樵

徑自東西故國存書劔他鄉咽鼓鼙涓埃期補報未敢

卜幽棲 謝翱遊釣臺詩曰古臺臨釣渚遺像在蒼煙

有客隨槎到無僧依樹禪風塵侵祭器樵獵避兵船應

有前朝蹟看碑數漢年 呂定望岱岳詩曰岱宗東望

鬱嵯峨萬丈仙橋鳥外過秦樹千年空老大漢碑終古

不消磨天壇夜靜垂星斗石磴春深長薜蘿記得舊遊

曾載酒頽然峰頂放長歌 林景熙重遊鏡曲次韻詩

曰青眼重逢白髮新舊遊却恐是前身野鳩妬客招呼

兩江燕隨人管領春曾附僊舟追李郭獨提詩律繼黃
陳鏡中恨不移家住山水蒼蒼老釣綸 真山民光霽
閣晚望詩曰一閣納萬象危闌俯渺茫白沙難認月黃
葉易爲霜宿鳥投煙嶼歸樵趁野航孤吟誰是伴漁笛
起滄浪 元周權次韻秋望詩曰莫鴉歸處斷霞明搔
首風前萬里情煙抹山光翠屏冷水涵天影玉壺清蟲
鳴沙徑宵初永雁落蘆汀月未生何事數聲江上笛吹
將離恨滿孤城 揭傒斯遊麻姑山雲關詩曰君子荷
初服恩至若無榮穆穆芳雨散悠悠蒼山行危關擁霧
黑飛桁綠雲青苔蘚滑如積松杉香冥冥時逢負芝翁

忽聞流水聲舉足向益高矯然欲遐征徒隸各忘倦矧
彼高人情黃清老登平遠堂鰲頂峰詩曰六鰲簸蕩
元圃碎三島崩騰失空翠海風掣斷南山雲分我滄江
半江水臺南巖谷青岌岌奇松怪石作人立山巔恐有
風雨來林徑空濛落花濕水東劣削結平綠積霧飛嵐
坐堪掬蓬萊迢迢幾萬里一碧天光浸寒玉吟翁回首
看不足緩步策驢度空谷誰知咫尺山中幽望斷殘暉
立脩竹許有壬登岳陽樓詩曰半空輪奐壯巴丘消
得騷人一繫舟雲氣遠攜湘雨至湖光寒入蜀江流山
川信美非吾土天地無窮有此樓三十四年如夢過可

憐華髮賦重遊

王翰遊枕煙寺詩曰石磴招提古松

蘿冥不分排雲雙樹轉隔水一鐘聞林影疑殘兩山光
倚夕曛醉來歸路遠秋思正紛紛 成廷珪登望江樓
詩曰長江不可極岸幘獨登臨潮信自朝暮山光無古
今碑亭流水涸輦路積苔深欲寫興亡恨西風萬葉吟
巖士貞方山詩曰遙望羣峰擁翠鬢登臨殊覺倦躋
攀枯藤倒挂長松上峻瀑斜飛兩峽間龍卷雲歸常帶
雨犬隨人去自登山湫池只在危岑頂欲啓瑤函論大
還 又臺山詩曰乘興行歌上古臺衆峰環處一徘徊
怪松歲老縈蒼蔓小殿春深長綠苔霧暗雨池龍隱見

煙消萬里鳥飛迴山頭老嫗知消息驚問適從何處來
又廣德觀詩曰瑤臺瓊館古朱砂知是神仙第一家
不向山中餐柏實却來溪上看桃花玉壺春暖融瓊液
金鼎朝寒護碧霞須待三千功行滿御風同駕五雲車
又壽聖觀詩曰來遊磊石訪元關雨漬莓苔繞砌斑
歲月如流宮殿廢溪山無主鼓鐘閒數聲漁唱蒼茫外
一片仙碑紫翠間獨挂瘦筇空佇立竹松疎處看銀山
明劉基郊遊詩曰草根螻蝻鳴湖上蒹葭靡繁林濕
深綠清池散圓紫離居昧節序陶情類佳士汎舟出郊
甸緩步信所履壺觴展倡酬及此晴日美嘯歌望山川

慷慨集悲喜歸兩入禹穴返照射宛委鳥啼樹有風帆
過煙在水興盡各言還適意聊復爾 又晚同方舟上
人登獅子巖作曰落日下前峰輕煙生遠林雲霞媚餘
姿松柏澹清陰振策縱幽步披榛陟層岑槿花籬上明
莎雜草間吟涼風自西來颼颼吹我襟榮華能幾時搖
落方自今逝川無停波急弦有哀音顧瞻望四方悵焉
愁思深 又古戍詩曰古戍連山火新城殷地銘九州
猶虎豹四海未桑麻天迴雲垂草江空雪覆沙野梅燒
不盡時見兩三花 高啓郊野雜興詩曰幽事向誰誇
孤吟對晚沙浣衣江動月繫艇岸垂花行蟻如知路歸

鳧自識家一尊茅屋裏隨意荅春華
何景明玉泉詩

曰行遊金口寺坐愛玉泉名雲去隨龍女風來動石鯨
入宮朝太液穿苑象昆明却望天河水迢迢萬古情

李夢陽九潭詩曰峇峇千仞嶺下有百尺潭夕風起微
瀾洑洑動晴嵐俯之鑒我心佇翫雲波涵流蕤颺寒清
躍魚胡可探蹊暝樵響歇猿鳥來相參寄語泥中物長
蟠恐未堪 薛瑄遊習池詩曰谷口一徑入蒼山四邊

開中有習池水水碧無纖埃微風一蕩拂林影久徘徊
寒光空心性俯翫何悠哉 孫一元紫陽山中徐步詩

曰窮壑臥孤松寒風生杖履幽人獨往來鳥弄自成句

因山幸得秋欣然有餘趣片雨弄江光孤雲起汀樹望
中水似天嘯坐漁舟去 又權舟西湖登孤山拜和靖
處士墓詩曰向晚南屏路相攜上釣輪山根晴亦濕湖
氣夜難昏月色留吹笛鷗羣迴洗尊來尋林處士地下
有知音 頓銳出聖水關往鳳皇山詩曰嶠兀攢沈寥
參差入煙霧漸與人世隔遂愜平生素嵌壁關門轉
石亂流怒陰崖匯靈淵未冬已寒沍帶嶠蒼靄微慕頂
白雲度斷徑屢猿接傾巖數狼顧肆貪意與奇強制心
膽怖睨憎仄磴危足試敲岑固絕壑迺無地登天疑有
路空寂排宴詮清虛獲元悟 華察遊善卷碧仙居詩

曰落日下空門齋鐘出林莽偶茲叩精廬再宿翠微上
舊遊不知處但見松杉長巖虛露氣清坐覺心魂爽月
白山窗高夜靜風泉響遂令寤寐中超然脫塵網雲壑
永可棲願言稅歸鞅 又澄觀樓曉坐詩曰曉色澄秋
林霞明暎山翠貪奇事夙興爽氣醒殘醉空霜日夜繁
坐見木葉瘁天高宿霧收白雲出平地初日照重巖寒
流響虛隧景物清心魂泠然起遐致 又過埃陽山居

詩曰林泉愜嘉趣乘興訪幽蹤野曠餘寒照山深多亂
峰潭煙生暮色水木澹秋容不是桃源地虛疑物外逢
胡纘宗登天柱閣詩曰與客上江樓橫江山欲浮雲

當天柱出月傍小孤流帆外收吳楚尊前落斗牛瀾漫
忽千里倚檻思悠悠 劉大夏玉泉道中詩曰晚來聯
騎蹋晴沙風景蒼蒼一道斜幾處白雲前代寺數邨流
水野人家鶯啼別墅春猶在馬到西山日未斜回首不
知歸路遠九重宮殿隔煙霞 楊基登岳陽樓詩曰春
色醉巴陵闌干落洞庭水吞三楚白山接九疑青空闊
魚龍舞嬋娟帝子靈何人夜吹笛風急雨冥冥 喬世
寧馬湖登覽詩曰四海車書一干旄萬里揚牂柯今作
郡魑魅舊爲鄉江自金沙出山連玉嶠長歲時常霧雨
草樹但青蒼 陳有守登齊雲詩曰夙齡志遐討西征

恣遊目三年歷大行旬月棲王屋洵美自冀方駕言歸
海陸策杖登雲峰振衣問天谷白岳標神臯紫崖峙靈
輿雲亭望仙馭虛館探真籙薄霄叩金庭御風轡玉輅
天門挹非煙日觀攀若木晞髮九垓城舒嘯三洲閣乞
山稱外臣樓居肇枚卜李先芳德藩白雲亭觀珍珠
泉詩曰帶礪開宗國湖山列祖筵泛槎滄海上張樂白
雲巔臺榭吞寒浦笙歌拂夕煙地靈噴玉屑天派瀉珠
泉鮫室光逾媚驪宮夜不眠月中疑蚌出水底見星懸
詞客頻中聖君王正渴賢本支流不盡千古鏡常圓
皇甫訪遊仙都同樊侍御詩曰寡諍謝畫牘懷仙抗晨

旌怪石巖壁立危峰類削成陽火伏未息陰湖鑿以清
下有干霄木上有承露莖漢武建柏寢秦皇慕蓬瀛惜
哉無靈氣安得遂冲升軒后獨不朽鼎寶垂鴻名柱史
良地主邀我釣天行黃金九奏發白玉雙童迎聊從避
驄路一展攀顙情

李攀龍登黃榆馬陵諸山是太行

絕頂處詩曰黃榆高不極臨眺亦奇哉河勢中原坼山
形上黨來白雲橫塞斷寒峽倚天開搖落清秋色多慙
作賦才

又集開元寺詩曰流陰拂層岑返照翳深谷

古寺入蕭條迴巖抱幽獨梵影淨香臺鐘聲殷石屋絕
壁棲禪誦懸崖下樵牧秋花雨還瘦老樹霜逾禿寒泉

可瑩心白雲況極目登臨客自佳
搖落時何速蔬色蕩腥羶苔光清
簡牘新詩發神秀舊遊耿初服歸
來杖履便老去煙霞狀高城出睥
睨燈火通林麓言旋轉多興後期
此同宿又遠遊篇曰乘屩萬里外
言造太微庭雲霞曜朱闕日月夾
丹楹羣后儼金止仙女紛玉亭隨
風列以雨出窈而入冥沆瀣飛素
液芝草不復零虹霓爲我帶雜佩
搖華星濯纓河漢流清波正泠泠
俯視世間人泛泛如浮萍王世貞
與黎職方呂光祿共賦峴山石尊詩
曰李相昔鯨飲顏公復鴻騫遂令
茲山名遠並太傅尊聞季大火流
清陰猶未崦選勝仍選良避蒸

因避喧稍驚蒙茸豁遂辭窗窾捫儼然見中窪宛爾發
清源北斗與南箕不挹名空存安得瀉天瓢下注此石
罇左攬仙人箸右洗玉女盆夕旭代爲薪青山借作餐
遙吹從東來密箐輕颺一酌澆磊塊再舉超籠樊首
驂華胥路息駕衆妙門始知泛三雅有待猶爲煩 又

陟牛首山詩曰金陵信佳地茲山仍麗觀標形自牛首
遙勢應龍盤叢楸入晝暝長松當夏寒雲梯界危漢梵
宇繪層巒仰窺象緯逼俯覺塵世寬江拖萬里練巖橫
千仞丹 王世懋汎太湖抵西洞庭詩曰具區昔載勝
包山始薄遊理檝戒良辰景氣及凜秋帆輕岸猶近舟

海鏡集四卷三十一
三十一
敬風始道洪波蕩無涯超忽薄天浮初陽麗遠岑微陰
帶中流隱見遙羣峰出沒或環洲舉白屬飛鴻高詠驚
潛虯崩澹餘胥怒徜徉存蠹謀弔古有遺思會心故忘
憂疲茶儻可捐庶彼沙中鷗 徐中行春晚同順甫元
美遊姚園詩曰落魄憐吾黨流光憶去年狂歌依白雪
醉眼望青天詞賦非時好漁樵自舊緣試看芸閣吏何
似竹根眠 宗臣同元美明卿集張氏園亭詩曰古臺
荒自出石磴曲相臨忽起千秋思能空萬里心明月有
如此幽人不可禁何須賦搖落夜色五雲深 吳國倫
登七臺山絕頂詩曰真氣鬱不改結爲谿上山峯曉七

頂秀逶迤三郡間
熒熒吐南斗歷歷排天關
寥子久臥閣欲往無羽翰
茲晨挈霞友矯足窮躋攀
絕磴蔭榭梓陰磴飛潺湲
逡巡造無際忽擁仙人壇
苔蘚蝕故鼎伊誰睹還丹
龍蛻亦已遠鶴馭當來還
岑樓俯冥壑列嶂趨危闌
且復剗葦苓麋鹿羣相歡
登高望遠海天路何漫漫
海風吹白雲須臾卷層巒
衣裳濕空翠几席衝驚湍
竒賞一以愜何當此休餐
凌虛但長嘯高枕青林端
又遠遊篇曰一隅非我宅
九土安足州迫厄從世人
四顧嬰百憂經營甕盎間
區區欲何求金石良易斲
曜靈忽以邁白雲啓閭闔
飄然思遠遊道逢赤松子
仙藥

爲我投舉翼崑崙顛息駕扶木丘扶木挂東海元氣鼓
洪流下枝九陽伏上枝一陽浮神魚戴五城氣吐金銀
樓登樓瞰列鼓六漠何悠悠始知泰初理可與天地侔

淵鑑類函卷三百七

精部置丹射欒衣自起射烟當來對本勢瑞冥遠何此
鉅壑炎爲對紅血無烈多疑山人聲昔藉時姑換
閣於封無休鍊寸異法寶支欲只真穆攀無傲新
而衣盡對三橋開與共七南半潔風掛天閣寒千八列